

МЪЗГИНИЙА ЛЬ ГОРА ЛУҚА

Пешготъна институте

Луқа йэки йунани дохтор (h'эким) у дирокзан (т'арихзан) бу. Эви т'эви Павлос гэлэки р'евити кьрийэ (Фьлимон 24; Колоси 4:14; 2 Тимот'ейо 4:11) у нава шьхөле шандитийа^Ф Павлосда жи гэлэки алик'арийа ви кьрийэ.

Бь фькьра гэлэк зана эва Мьзгинийа^Ф незики сала 80-и һатийэ нъвисаре, щики нээ'йан жь Фьльстине дэр.

Дэстпебуна к'ьтебеда дэрһэда буйина Йуһ'эннайе^Ф ньхөмдар^Ф, мьзгинийа буйина Иса^Ф у шькьрдайина чэнд мэрьвада^Ф нъвисар э, к'ижана һатъна Исайэ жь Хwэдеда дьданэ к'ьфше. Ве Мьзгинийеда бона э'мьре Иса һе гэлэки дьбежэ, жь буйина Йуһ'эннайе ньхөмдар гьрти һ'эта жь нав мьрийа р'абуна Иса. Луқа хwэстийэ дэрһэда э'мьре Исада бь һур-гъли бьнъвисэ. Пэй мьрьн-р'абуна бир'а Луқа дэрһэда бэлабуна Мьзгинийеда к'ьтеба «К'аред Шандийа» нъвисийэ.

«Мьзгинийа ль гора Луқа» э'йан дькэ кө Иса чава Хьлазкьре^Ф создайи бона Израеле^Ф жь Хwэдеда шанди йэ у өса жи Хьлазкьре һ'эму мэрьва йэ. Эва Мьзгинийа бь тьһэрэки башқэ һ'эзкьрьна Хwэде дьдэ к'ьфше, илаһи^Ф һьндава мэрьвед шкэстида. Гэлэка наве ве мьзгинийе данийэ: «Мьзгинийа бона гөнэк'ара^Ф, шкэстийа, бэлэнгаза, бехwэйа, жьнэбийа у хэриба».

Ве Мьзгинийеда фькьра «шабун у шькьрдайине» жи һэйэ, илаһи сэрийед пешьнда, кө ль сэр э'ламкьрьна һатъна Иса дьнъвисэ. Чэнд к'өламед шькьрдайине

жи вьра һэнэ у хвәденаса гәләк қөр'нада бь ван к'олама һ'әбандьна хвә дәрбаз кьрьнә. Мәсәлә, к'олама мьлйак'әта^ф (2:14), йа Мәрийәме^ф (1:46-55), йа Зәкәрийя (1:68-79) у йа Шьмһ'ун (2:29-32). Хьлазийя к'ьтебеда жи нета шабуне к'ьфш дьбә, ль к'ө Иса дьчә ә'змен у йед ль пәй Иса п'арьстгәһеда^ф дьщывьн, шькьрийя хвә дьдьянә Хвәде (24:52-53).

һьнәк п'аред бәрбьч'әв жи әв ьн, кө чәнд сәрһати у мәсәлә т'әне ве мьзгинийеда һәнә. Ава мәсәлә: К'олама мьлйак'әта, дәма буйина Иса, һазьрийя шьвана, Исайе донздәһ сали п'арьстгәһеда, мәсәла «көр'е ондабуйи у бьре ви», т'обәкьрьна^ф қачахәки сәр хаче^ф у тьштед майин.

Сәрәщәма фькьра к'ьтебе

Пешготьяна Луқа (1:1-4)

Буйина Йуһ'әннайе ньхөмдар, буйина Иса у зар'отийя ван (1:5-2:52)

Қөльхе Йуһ'әннайе ньхөмдар (3:1-20)

Ньхөмандьн^ф у щер'ьбандьян^ф Иса (3:21-4:13)

Даннасини у шьхөлед Исайә ль Щәлиледа^ф (4:14-9:50)

Р'ийя Исайә жь Щәлиле һ'әта Оршәлиме^ф (9:51-19:27)

Һ'әфтийя Исайә хьлазийе ль Оршәлиме у дор-бәрәд веда (19:28-23:56)

Р'абуна Исайә жь мьрьне, хөйябуна ви шагьртава^ф у жорһьлатьяна ви (24:1-53)

Пешготьна Луқа Т'ейофилор'а

1 ¹ Т'ейофилоие хвэйицэдър, ньһа гэләка дэстпекьрийә сәрһатийа ван тыштед нава мәда буйи өса р'ез кьн, ² чава әвед кө пешийе бь ч'ә'ве хвә дитьбун у әв Мьзгини^ф бәла дькьрьн, мәр'а готьн. ³ Әз жи чава йәки һе зува р'аст пәй ван һ'әму тышта дьчум, мьн р'е тер'а дит кө бь һур-гьли тәр'а бьньвисьм, ⁴ wәки тө р'астийа ван тыштед кө һин буйи, бьзаньби.

Мьзгинийа мьлйак'әт^ф бона буйина Йуһ'әннайе^ф ньхөмдар^ф

⁵ Чахе һеродәс п'адшайе Щьһустане^ф бу, к'аһинәк^ф жь бәрәка Әбийа һәбу, наве ви Зәкәрийа бу. Жьна ви жи жь ә'сьле һарун^ф бу, наве we Елизабет. ⁶ Әвана һәр дө жи ль бәр Хвәде р'аст бун у нав һ'әму т'әми у һәқийа Хөданда^ф беқөсур дьчун. ⁷ Ле зар'ед ван т'өнәбун, чьмки Елизабете зар' нәданин у һәр дөйа жи ә'мьре хвә дәрбаз кьрьбун.

⁸ Ава чахе Зәкәрийа дора бәрәка хвәда хьзмәтк'арийа к'аһинтийе ль бәр Хвәде дькьр, ⁹ бь ә'дәте к'аһинтийеда п'әшк бир'а к'әт, кө һәр'ә п'арьстгәһа^ф Хөдан, бьхуре^ф бышәвьтинә. ¹⁰ У дәма шәвьтандьна бьхуре, т'әмамийа щьмә'те дәрва дөа дькьр. ¹¹ һьнге мьлйак'әте^ф Хөдан вива хөйа бу у алиие р'астева к'еләка^ф горигәһа^ф бьхуре сәкьни. ¹² Чахе Зәкәрийа дит, т'әвиһәв бу у сав к'әтә сәр ви. ¹³ Ле мьлйак'әт бир'а гот: «Зәкәрийа, нәтьрсә! Дөа тә һатә бьһистьне, к'өлфәта^ф тә Елизабете тәр'а көр'әки бинә у те наве ви Йуһ'әнна^ф дайни.

¹⁴ Әве тәр'а бьбә әшқ у шайи
у гәләке бь буйина ви ша бьн.

¹⁵ Чьмки әве ль бәр Хөдан мәзын бә,

we шәрав-араҫе т'ө щар вәнәхвә*

у һе зьке дийа хвәда, we бь Р'öh'e^Ф Пироз т'ъжи бә.

¹⁶ We жь зар'ед Исраеле^Ф гәләка бәрбь Хөдан Хвәдейе
ван вәгәр'инә.

¹⁷ Әwe бь р'öh' у қәwата Елийас^Ф п'ехәмбәр^Ф пешийа
Хөданва һәр'ә,

we дьле бава сәр зар'ада у нәельма бәрбь фә'мдарийа
р'аста вәгәр'инә,

wәки щьмә'тәке бона Хөдан һазьр кә».

¹⁸ Зәкәрийа мьльак'әтр'а гот: «Әзе ве йәке чава
бьзаньбьм? Әз кал ьм у к'өлфәта мьн жи ә'мьре хвә иди
дәрбаз кьрийә».

¹⁹ Мьльак'әт^Ф ле вәгәр'анд у готе:

«Әз Щьбрайил ьм, кө ль бәр Хвәде дьсәкьньм.

У әз һатьмә шандьне,

кө тәр'а бежьм у ве мьзгинийе бьдьмә тә.

²⁰ Ньһа те лал би у нькарьби хәбәр ди,

һ'әта we р'ожа кө әв тышт бенә сери,

чьмки тә бавәрийа хвә ван готьнед мьн нәани,

кө we wәхте хвәда бенә сери».

²¹ Н'әта һьнге щьмә'т һивийа Зәкәрийа бу у ә'щәбмайи
дьман, кө әw п'арьстгәһеда дәрэнги дьк'әт. ²² У чахе әw
дәрк'әтә дәрва, иди нькарьбу ванар'а хәбәр да. Wана
шьк бьр, кө п'арьстгәһеда тышт һатийә ль бәр ч'ә'ва. У
әwi бь нишана ванар'а хәбәр дьда у лал ма. ²³ Гава
р'ожед хьзмәткьрьна wi хьлаз бун, чу мала хвә. ²⁴ Пәй
ван р'ожар'а, к'өлфәта wi, Елизабет һ'әмлә дәрк'әт, пенщ
мәһа әwe хвә вәдьшарт у дьгот: ²⁵ «Әв чь йәк бу ван

* 1:15 Әва зар'а, awa готи Йуһ'әннайе^Ф ньхөмдар^Ф йәки «нәзир^Ф»
дьһатә һ'әсабе. Бона щур'ә-щур'ә қәйдә-қанунед нәзир Жьмар 6:1-21-
да бьхуньн.

р'ожада Хөдан бона мьн кър, һ'але мьнда ньһер'и у қара мьн жь нав мәрва^ф да һьлдане».

Мьзгинийа мьльак'эт бона буйина Иса^ф

²⁶ Мәһа шәшада Хвәде мьльак'эт^ф Щьбрайил шандә бажарәки Щәлиле^ф кө наве ви Ньсрәт бу, ²⁷ щәм қизәкә бьк'ьр^ф, йа кө мәрвәки бь наве Усьве^ф мала^ф Давьдр'а^ф нишанкьри бу. Наве қизьке Мәрийәм^ф бу. ²⁸ Мьльак'эт вева хөйа бу у готе: «Сьлав ль тә қизька к'әрәм^ф ле буйийе, Хөдан г'әви тә йә». ²⁹ Әва сәр готьна ви т'әвиһәв бу у фькьри: «Гәло әв чь сьлав ә?» ³⁰ У мьльак'эт жер'а гот: «Мәрийәм, нәтьрсә! Чьмки тә к'әрәм жь Хвәде станд. ³¹ Ньһа те һ'әмлә дәрәйи көр'әки бини у наве ви Иса^ф дайни.

³² Әве мәзын бә у Көр'е Йе һәри Жорьн ве бе готьне. У Хөдан Хвәде ве т'әхте баве ви Давьд бьдә ви.

³³ Әве һ'әта-һ'әтайе п'адшатийе сәр мала^ф Ақуб^ф бькә у хьлазийа П'адшатийа ви ве т'өнәбә».

³⁴ Мәрийәме мьльак'әтр'а гот: «Әв йәке чава бьбә, чьмки әз һәла һе қиз ьм?» ³⁵ Мьльак'әт ле вәгәр'анд у гот: «Р'өһ'е Пироз ве бе сәр тә у қәвата Йе һәри Жорьн ве сәр тә бькә си. Бона ве йәке әв Пирозе кө ве жь тә бьбә, әв Көр'е^ф Хвәде ве бе готьне. ³⁶ Ва йә омьда тә Елизабет жи, йа кө безөр'әт дьһатә готьне, ве мәзынайийа хвәда әва мәһа шәша йә көр'әкида һ'әмлә йә. ³⁷ Чьмки щәм Хвәде тьштәки нәбуйине т'өнә». ³⁸ Ви чахи Мәрийәме гот: «Әз щарийа Хөдан ьм. Бьра анәгори готьна тә бона мьн бьбә». У мьльак'әт жь щәм ве чу.

* 1:28 Нав дәстньвисаред һьнәкада аһа йә: «Тө нав к'өлфәтада бьмбарәк и».

Мәрийәм сәрики Елизабете дьхә

³⁹ Ван р'ожада Мәрийәм р'абу ләз чу алийе ч'ийа, бажарәки Щьһуда^Ф. ⁴⁰ Әw к'әтә мала Зәкәрийа у сьлав да Елизабете. ⁴¹ Гава Елизабете сьлава Мәрийәме бьһист, зар'ок зьке веда львийа. Елизабет Р'öh'e Пирозва т'ьжи бу ⁴² у бь дәнгәки бьльнд кьрә гази гот: «Тө нав к'өлфәтада бьмбарәк и у бәре зьке тәда жи бьмбарәк ә. ⁴³ Әв чь бәхтәварик ә кә дийа Хөдане мьн сәр мьнда һат? ⁴⁴ Гава дәнге сьлава тә к'әтә гөһе мьн, зар'ок зьке мьнда жь шабуна лист. ⁴⁵ Хwәзи ль we, кә бавәрийа^Ф хwә готьна Хөдан тинә, кә чь жер'a һатийә готьне, we бе сери». ⁴⁶ Мәрийәме гот:

«Нәфса мьн пәсьне Хөдан дьдә

⁴⁷ у р'öh'e мьн бь Хwәде Хьлазкьре^Ф мьн ша дьбә,

⁴⁸ чьмки әви бәре хwә мьлуктийа щарийа хwәда кьр.

Жь вьр шунда һ'әму ньсьле^Ф хwәзийа хwә ль мьн
биньн,

⁴⁹ чьмки Хwәдейе Зор бона мьн тыштед п'ьр' мәзьн
кьрн.

Наве ви пироз ә.

⁵⁰ Р'ә'ма ви қьр'нә-қьр'нә ль сәр ван ә,

йед кә жь ви дьтьрсьн.

⁵¹ Қәwата дәсте хwә әви да к'ьфше

у йед кә дьле^Ф хwәда к'өбар-бабах ьн бәла-бәлайи
кьрн.

⁵² Йед қәwат жь к'өрсийа анин хwаре

у йед мьлук бьльнд кьрн.

⁵³ Йед бьр'чи бь тыштед қәнщ т'ер кьрн

у йед дәwләти дәствала вәр'екьрн.

⁵⁴ Р'ә'ма хwә ани бира хwә,

али хөламе хвә, Израел кър,

⁵⁵ чава кал-бавед мә, Бьраһим^Ф у зөр'эта wir'a бона
һ'эта-һ'этайе созе хвә дабу».

⁵⁶ Мәрийәм wәкә се мәһа щәм Елизабете ма, паше
вәгәр'ийа мала хвә.

Буйина Йуһ'әннайе ньхөмдар

⁵⁷ Ава дәма wәльдандьна Елизабете пер'а гьһишт,
көр'әк жер'а бу. ⁵⁸ һәвал-һогьред we бьһистьн кө Хөдан
р'ә'ма хвәйә мэзын бона we кьрийә, т'әви we ша дьбун.

⁵⁹ Р'ожа һ'әйштада һатьн кө көр'ьк сьнәт^Ф кьн у наве
баве wi Зәкәрийа ле кьн. ⁶⁰ Ле дийа wi гот: «На, наве
wi гәрәке Йуһ'әнна бә». ⁶¹ Wer'a готьн: «Нава мәрьвед
тәда бь wi нави кәсәк т'өнә». ⁶² һьнге вана бь нишана
жь баве wi пьрсин кө чь нави дьхвазә wi кә. ⁶³ Әви
жи т'әхтәк хвәст у ль сәр ньвиси: «Наве wi Йуһ'әнна
йә». һ'әму ә'щәбмайи ман. ⁶⁴ Дәстхвәда зар-зьмане^Ф wi
вәбу, хәбәр да, шькьри да Хвәде. ⁶⁵ Тьрсе һ'әму щинаред
ван гьрт у т'әмамийа ч'ийайед Щьһустанеда бона ве йәке
дьһатә готьне. ⁶⁶ һ'әмуьед кө дьбьһистьн, бира хвәда
хвәй дькьрьн, дьготьн: «Гәло әв көр'ьке бьбә чь?» Чьмки
дәсте Хөдан пер'а бу.

П'ехәмбәртийа^Ф Зәкәрийа

⁶⁷ Баве wi Зәкәрийа бь Р'өһ'е Пироз т'ьжи бу,
п'ехәмбәрти кьр у гот:

⁶⁸ «Шькьр жь Хөдан Хвәдейе Израелер'а
кө сәрик да щьмә'та хвә у азайи жер'а ани.

⁶⁹ Жь мала хөламе хвә Дауьд

бона мә Хьлазкърәки^ф зор* р'акър,

⁷⁰ чава әви һе бәрета бь дәве п'ехәмбәрэд хвәйә
пироз^ф готийә,

⁷¹ кӧ әм жь дьжмьнед хвә
у дәсте һ'әму хернәхваза^ф хьлаз бьн,

⁷² р'ә'ме кал-бавед мә бькә,
пәймана^ф хвәйә пироз

⁷³ у we сонда кӧ баве мә Бьраһимр'а хвар бир бинә,

⁷⁴ вәки жь дәсте дьжмьна азабуийи,
әм бькарьбьн бе тьрс у хоф,

⁷⁵ һ'әму р'ождә ә'мьре хвәда,
р'аст у һ'әлал ви бьһ'әбиньн.

⁷⁶ Тӧ, ло кӧр'ько, те п'ехәмбәре Йе һәри Жорьн бейи
готьне,

те пешийа Хӧданва һәр'и, вәки р'ийа ви һазьр ки

⁷⁷ у занәбуна азайийе бьди щьмә'та ви,
бь бахшандьна гӧнед ван.

⁷⁸ Жь р'ә'м у һ'ӧба Хвәдейе мә
чава жорда р'о кӧ дәрте, ӧса we сәрики бьдә мә,

⁷⁹ вәки йед кӧ тә'ристанийе у бьн сийа мьрьнеда
дьминьн р'онайи кә

у ньгед мә дайнә сәр р'ийа ә'дьялайийе».

⁸⁰ Кӧр'ьк мәзын дьбу у бь р'ӧһ' қәват дьгьрт у һ'әта р'ожа
Исраелева хӧйа бу жи ль бәр'ийе^ф дьма.

* 1:69 Бь йунани хәбәр бь хәбәр аһа йә: «Стьруки хьлазкърьне». Стьру
гәләк щара чава нишана қәватә йә.

Буйина Иса

(Матта 1:18-25)

2¹ Ван р'ожада жь Аугустойе Қәйсәр^ф ә'мьр дәрк'әт, кө һ'әму мәрвьед Императорийа Р'омайе бенә навньвисаре. ² Әв навньвисара пешьн һена Куренйойе вәлийе^ф Сурйайеда һатә кьрьне. ³ һ'әму дьчунә бажаре хвә, кө һәр кәс наве хвә бьдә нвьвисаре. ⁴ Усвь жи жь бажаре Ньсрәта Щәлиле р'абу һәвраз чу Щьһустане, бажаре^ф буйина Дауьд, кө жер'а Бәйтләһ'м^ф дьготьн, чьмки әв жь мал у қәбила Дауьд бу. ⁵ Әв чу, кө т'әви Мәрийәма дәргистийа хвә бьк'әвә навньвисаре. Мәрийәм жи һ'әмлә бу. ⁶ Чахе әвана ль Бәйтләһ'ме бун, р'ожа вәльдандьна we пер'а гьһишт ⁷ у көр'е хвәйи ньхөри ани, әв п'еч'әкеда п'еч'а у афьр'да дани, чьмки меванханеда бона ван щи т'өнәбу.

Мьльйак'әт у шьван

⁸ Ль вьр чоле шьван һәбун, кө we шәве хвәйитийа кәрийе пәзед хвә дькьрьн. ⁹ Мьльйак'әте Хөдан ванва хөйа бу у р'умәта Хөдан дора ван шәwq да, әв гәләки тьрсийан. ¹⁰ Ле мьльйак'әт ванар'а гот: «Нәтьрсьн! Әз һатьм Мьзгинийа шабунәкә мәзьн бьдьмә wә, кө we бона т'әмабийа мьләт бә. ¹¹ Иро вәр'а бажаре^ф Дауьдда Хьлазкьрәк^ф бу, әв Мәсиһ^ф Хөдан ә. ¹² Әва вәр'а бьбә нишан: һуне зар'окәке п'еч'әкеда п'еч'айи афьр'да бьбиньн». ¹³ Ньшкева т'әви ви ордикә мьльйак'әтед ә'зманайә мәзьн к'ьфш бу, пәсьне Хвәде дьдан у дьготьн:

¹⁴ «Шькьр Хвәдеје һәри Жорьнр'а,
ә'дьлайи сәр дьне ван мәрвьар'а,

жь к'ижана Хвәде р'азии йә».

¹⁵ Гава мьлайак'әт жь ван дур к'әтын һьлатьнә ә'змен, шьвана һәвр'а гот: «Wәрьн әм һ'әта Бәйтләһ'ме һәр'ьн, әв тыште буйи, кө Хөдан әм пе һ'әсандьн, бьбиньн».

¹⁶ У бь ләз һатьн, Мәрийәм, Усьв у зар'а афьр'да р'азайи дитьн. ¹⁷ Гава әв дитьн, чь кө бона көр'ьк ванр'а һатьбу ә'ламкьрьне, готьн. ¹⁸ һәр кәсе кө жь шьвана әв тышт дьбьһистьн, зәндәгьрти^ф дьман. ¹⁹ Ле Мәрийәме әв һ'әму тышт дьле хвәда хвәй дькьрьн у ль сәр ван дьфькьри. ²⁰ Шьван вәгәр'ийан, чава ванар'а һатьбу готьне, бона тыштед бьһисти у дити пәсьн у шькьри дьданә Хвәде.

Навданина Иса

²¹ Р'ожа һ'әйшта гава көр'ьк сьнәт кьрьн, наве ви Иса^ф данин, чава кө һе бәри һ'әмләбуна де, мьлайак'әт бона ве йәке готьбу.

Иса дьбьнә п'арьстгәһе, кө п'ешк'еши^ф Хвәде кьн

²² Чахе анәгори Қануна^ф Муса^ф чьле ван т'әмам бу, көр'ьк бьрьнә Оршәлиме^ф, кө ви п'ешк'еши Хөдан кьн, ²³ чава кө Қануна Хөданда һьвисар ә: «Һәр һьхөрики нерин кө бәт'ьне вәдкә, нәдьре^ф Хөдан бә»* ²⁴ у ль гора готьна Қануна Хөдан: «Щотәк фатьмок^ф йан жи дө щуцукед кәвотка»* һ'әди^ф бе дайине.

* 2:14 Нав дәстһьвисаред һьнәкада аһа йә: «Ль сәр дьне ә'дьялайи, жь мәрьва р'азибун».

* 2:23 Дәрк'әтын 13:2, 12, 15.

* 2:24 Қануна К'әһинтийе 12:8.

²⁵ Уи чахи мәрвәк Оршәлимеда һәбу, наве уи Шьмһ'ун бу. Әв мәрвәки р'аст, хвәдехоф у ль һивийа бәрдьлийа^Ф Исраеле бу. Р'öh'e Пироз жи ль сәр уи бу ²⁶ у уир'а готьбу: «Һ'әта кө тө Мәсиһе Хөдан нәбини, намьри». ²⁷ һынге әв бь р'ебәрийа Р'öh' һатә п'арьстгәһе. Чахе де у бавева Исайе бьч'ук анин кө ль гора ә'дәте Қануне бона уи бькьн, ²⁸ Шьмһ'ун көр'ьк һьлда да һ'әмеза хвә, шькьри да Хвәде у гот:

²⁹ «Йа Хвәйи, нһа ль гора созе хвә
 бь хер у сыламәт бәрдәстийе хвә бәр'дә.

³⁰ Чьмки ч'ә'ве мьн азакьрна тә дит,

³¹ йа кө тә бәр ч'ә'ве һ'әму мьләта һазьр кьрийә,

³² кө бьбә р'онаийа бәр ч'ә'ве нәщһуйа^Ф

у қәдър-һөрмәт^Ф щьмә'та тә Исраелр'а».

³³ Де у баве уи сәр тыштед кө Шьмһ'ун бона уи дьготьн, зәндәгьрти мабун. ³⁴ Шьмһ'ун дөа ван кьр у дийа уи Мәрийәмер'а гот: «Әва әуи к'ьфшкьри йә, йе кө уе Исраеледа бьбә сәбәбе к'әтһн-р'абуна гәләка, өса жи бьбә нишанәк, кө гәләке мьқабьли уи р'абьн ³⁵ у бь ви авайи фькьред гәләк дьла уе ә'йан бьн. У дьле тәр'а жи мина тирәке уе дәрбаз бә».

³⁶ Ль уьр жь р'ьк'ьнйата Ашер, қизәкә Фановелә п'ехәмбәр һәбу, наве уе һана. Әуе гәләк ә'мьр дәрбаз кьрбу, пәй қизтийа хвәр'а һ'әфт сала щәм мере хвә мабу. ³⁷ Әв жьнәбикә һ'әйште чар сали бу* у жь п'арьстгәһе дур нәдьк'әт, шәв у р'ож бь дөа у р'ожийа^Ф

* 2:25 Бь готьнәкә дьн: «Барьстанийа Исраеле, бона хьлазкьрһн^Ф йан азабуна Исраеле».

* 2:37 Аһа те фә'мкьрһне, йан: «Ә'мьре уе һ'әйште чар сали бу» йан жи: «Һ'әйштечар сала жьнәби мабу».

Хwәде дьһ'әбанд. ³⁸ Әва жи we дәме һат, шыкьри да Хwәде у т'әви әвед кӧ ч'ә'вньһер'ийа азабуна Оршәлиме бун, дәрһәқа кӧр'ькда хәбәр да.

Мәрийәм, Усыв у Исайе бьч'ук вәдыгәр'ьнә Ньсрәте

³⁹ Гава Усыв у Мәрийәме һәр тышт ль гора Қануна Хӧдан кьрын, вәгәр'ийанә Щәлиле, бажаре хwә Ньсрәте ⁴⁰ Кӧр'ьк мәзын у қәват дьбу, бь сәрвахтийе^ф т'ьжи дьбу, к'әрәма Хwәде жи бь wir'a бу.

Исайе донздәһ сали п'арьстгәһеда

⁴¹ Де у баве wi һәр сал Щәжьна^ф Дәрбазбунеда дьчунә Оршәлиме. ⁴² Чахе әw бу донздәһ сали, ль гора ә'дәт әwana һәвраз чунә щәжьне. ⁴³ Гава р'ожед щәжьне хьлаз бун у пашда вәдыгәр'ийанә мала хwә, Исайе хьшим ль Оршәлиме ма. Ле де у баве wi һаш жь wi т'ӧнәбун, ⁴⁴ вана т'ьре^ф т'әви р'евийа йә. Р'ийа р'ожәке һатьн, нав һәвал-һогьред хwәда ль wi гәр'ийан. ⁴⁵ Гава әw нәдितьн, пашда вәгәр'ийанә Оршәлиме, ль wi гәр'ийан. ⁴⁶ Р'ожа сьсийа вана әw п'арьстгәһеда дит. Әw т'әви дәрсдара р'уньшьтбу, гӧһдарийа ван дькьр у пьрс дьданә ван. ⁴⁷ һ'әмуйед кӧ хәбәрдана wi дьбьһистьн, сәр занәбун у шабед wi зәндәгьрти дьман. ⁴⁸ Гава де у баве wi әw дитьн, һ'әйирин у дийа wi жер'a гот: «Лаво! Тә чьма ӧса сәре мә кьр? Әз у баве тә к'әл-бин ль тә дьгәр'ийан». ⁴⁹ Әwi ванр'a гот: «Һун чьма ль мьн дьгәр'ийан? Wә ньзаньбу гәрәке әз мала Баве^ф хwәда бьм?» ⁵⁰ Ле вана фә'м нәкьр әwi чь гот. ⁵¹ Әw т'әви ван вәгәр'ийа һатә Ньсрәте у гӧр'a^ф ванда бу. Ле дийа wi әв һ'әму тышт дьле хwәда хwәй дькьрын. ⁵² У Иса бь сәрвахти у бәжьне пешда

дъчу у бь мэр'рифэти ль бэр Хвэде у ль бэр мэр'ва мэзын дьбу.

Даннасинийа Йуһ'эннайе нхөмдар

(Матта 3:1-12; Марқос 1:1-8; Йуһ'энна 1:19-28)

З¹ Панздәһ салийа п'адшатийа Тибэрйойе Қәйсәрда, Пилатойе^Ф Понтийо вэлийе Щьһустане бу, һеродәс сәрwere Щәлиле бу, Филипойе бьре ви сәрwere қәза Итурйайе у Трахонидайе бу у Лусанийас сәрwere Авелинийайе бу, ² һәннан у Қәйафа жи сәрәкк'аһин бун. һынге хәбәра Хвэде бэр'ийеда Йуһ'эннайе көр'е Зәкәрийар'а һат ³ у Йуһ'энна һатә һ'әму дор-бәред ч'әме Урдөне даннасин дькьр, кө щьмә'т жь гөнәкьрыне вәгәр'ә^Ф у бь аве бе нхөмандьне^Ф, вәки Хвэде ван бьбахшинә.

⁴ Чава к'ьтеба Ишайа^Ф п'ехәмбәрда нывисар ә кө дьбежә:

«Дәнге бэр'ийеда дькә гази:

«Р'ийа Хөдан һазьр бькьн
у шьвәр'ийед^Ф ви р'аст бькьн.

⁵ һ'әму гәли бьра т'ьжи бьн,
ч'ийа-бани ньмьз бьн,
р'ийед харо-маро р'аст бьн
у ч'ә'л-ч'ул дуз бьн.

⁶ У һәр кәсе азайийа Хвэде бьбинә»*.

⁷ Гәләк дьһатьнә щәм Йуһ'энна, кө жь ви бенә нхөмандьне. Әви ванр'а дьгот: «Ч'ежькед^Ф мәр'а! К'е вәр'а гот, кө һун жь хәзәба те бьр'әвьн? ⁸ Дә бь кьред қәнщ бьдьнә к'ьфше, кө һун жь гөнәкьрыне вәгәр'ийанә. У р'анәбьн нәбежьн: «Бьраһим баве мә йә». Әз вәр'а дьбежьм, кө Хвэде жь ван кәвьра жи дькарә зар'а

* 3:6 Ишайа 40:3-5.

Бъраһимр'а дәрхә. ⁹ Ва йә балт'әф ль сәр р'ауеф дарә йә. Һәр дара кө бәре қәнщ нәйнә, we бе бър'ине у авитьне нава егър». ¹⁰ Ә'лаләте жь ви пьрси у гот: «Ле әм чь бькьн?» ¹¹ Әви ль ван вәгәр'анд у гот: «Дө дәст к'ьнще к'е һәнә, бьра йәки бьдә ви, йе к'е кө т'өнә у хөрәке к'е һәйә, бьра диса өса бькә». ¹² Хәрщгърф жи һатьн кө бенә ньхөмандьне у wir'а готьн: «Дәрсдарф, әм чь бькьн?» ¹³ Әви ванр'а гот: «Чьқас жь wә те хwәстьне жь ви зедәтър нәстиньн». ¹⁴ Әскәра жи жь ви пьрси: «Ле әм чь бькьн?» Әви ванр'а гот: «Кәсәки нәшелиньн, бебәхтийе ль хәлқе нәкьн у бь һәде хwә р'ази бьн».

¹⁵ һ'әму һивийе бун у бона Йуһ'әнна дьле хwәда дьготьн: «Гәло әв ә Мәсиһ?» ¹⁶ Йуһ'әнна ль һ'әмуя вәгәр'анд у гот: «Әз wә бь аве дьньхөминьм, ле йәки жь мын қәваттър we бе. Әз нә һежа мә бәне чарьхед ви жи вәкьм. Әwe wә пе Р'өһ'е Пироз у егър бьньхөминә. ¹⁷ Мәлһ'әба ви дәсте wiда йә. Әwe бедәра хwә пақьж кә, гәньм бькә ә'мбара хwә, ле кайе we бь агьре кө натәмьрә бьшәwьтинә».

¹⁸ Аwa Йуһ'әнна бь гәләк тыштед дьн жи хәлқ ширәт дькьр у Мьзгини дьда. ¹⁹ Ле гава Йуһ'әнна ль һеродәсе сәрвер жи һьлатф бона һеродийа жьна бьре ви у һ'әму хьрабийед кө ви дькьрьн, ²⁰ һьнге һеродәс сәр ван кьрнада әв нәһәқи жи кьр, кө Йуһ'әнна авитә кәле.

Иса те ньхөмандьне

(Мәтта 3:13-17; Марқос 1:9-11)

²¹ Гава һ'әму щьмә'т дьһатә ньхөмандьне, Иса жи һатә ньхөмандьне. We дәме кө дөа кьр, әзман вәбу ²² у Р'өһ'е Пироз бь бәдәни мина кәвоткәке сәр ви дани у дәнгәк жь

ә'змен һат кө дьгот: «Тө йи көр'е мьни дәләл, кө әз жь тә р'ази мә».

Р'ьк'ьнйата Иса

(*Мәтта 1:1-17*)

²³ Иса незики си сали бу, гава әви дәст бь к'аре хвә кьр у ван т'ьре әв көр'е Усьв бу, Усьве Әли, ²⁴ Әлийе Мәтат, Мәтате Леви, Левийе Мәлк'е, Мәлк'еие Йаннай, Йаннаие Усьв, ²⁵ Усьве Мәтитийа, Мәтитийаие Амос, Амосе Нәһум, Нәһуме һәсли, һәслие Нәщай, ²⁶ Нәщайе Мәһат, Мәһате Мәтитийа, Мәтитийаие Шемәйин, Шемәйине Йусех, Йусехе Йода, ²⁷ Йодаие Йүһәнан, Йүһәнәне Р'еша, Р'ешаие Зәрубабәл, Зәрубабәле Шалтийел, Шалтийеле Нәри, ²⁸ Нәрийе Мәлк'е, Мәлк'еие Еди, Едийе Қосам, Қосаме Елмәдам, Елмәдаме Әр, ²⁹ Әре Йешу, Йешуйе Елийазер, Елийазере Йорим, Йориме Мәтат, Мәтате Леви, ³⁰ Левийе Шьмһ'ун, Шьмһ'уне Щьһуда, Щьһудайе Усьв, Усьве Йонам, Йонаме Елйақим, ³¹ Елйақиме Мәлйо, Мәлйоие Мәна, Мәнаие Мәтитийа, Мәтитийаие Нат'ан, Нат'ане Дауьд, ³² Дауьде Йешаф, Йешаие Овед, Оведе Боваз, Бовазе Сәлмон, Сәлмоне Нәһшон, ³³ Нәһшоне Аминадав, Аминадаве Админ, Админе Арам, Араме һәсрун, һәсруне Перес, Пересе Щьһуда, ³⁴ Щьһудайе Ақуб, Ақубе Ишақф, Ишақе Бьраһим, Бьраһиме Тераһ, Тераһе Нәһор, ³⁵ Нәһоре Сәрух, Сәрухе Р'ево, Р'евоие Пелег, Пелеге Әбәр, Әбәре Шалаһ, ³⁶ Шалаһе Қенан, Қенане Арпәхшад, Арпәхшаде Сам, Саме Нөһф, Нөһе Ламәх, ³⁷ Ламәхе Мәтушәла, Мәтушәлаие һәнох, һәнохе Йаред, Йареде Мәһалел, Мәһалеле Қенан, ³⁸ Қенане Әнош, Әноше Сет', Сет'е Адәмф у Адәме Хвәде.

Щер'ѣбандьна^Ф Иса

(Матта 4:1-11; Маркос 1:12-13)

4¹ Иса бѣ Р'öh'e Пирозва т'ѣжи жѣ Урдöне вэгэр'ийа, Р'öh' бэр'ийеда р'ебэрийа ви дькър, ² чъл р'ожи жѣ Мирещьн^Ф һатэ щер'ѣбандьне^Ф. Эви ван р'ожада тыштэк нэхвар у гава эв р'ож дэрбаз бун, бър'чи бу.

³ Ђынге Мирещьн вир'а гот: «һэгэр тө Көр'e Хвэде йи, ви кэвърир'а бежэ кö бьбэ нан». ⁴ Иса ле вэгэр'анд у гот: «Нъвисар э: «Инсан т'эне бѣ нен нажи»* ***».

⁵ Ђынге Мирещьн эв р'акърэ сэр щики бьльнд, дэдеда һ'эму п'адшатийед дьнйайе нишани ви дан ⁶ у готэ ви: «Эзе р'эвш у сэрверийа ван һ'эмуйа бьдьмэ дэсте тэ, чьмки мьнр'а һатийэ дайине у к'ер'а кö бьхвазьм эзе бьдьме. ⁷ һэгэр ньһа тө сэре хвэ ль бэр мьн дайни, эв һ'эму we п'ара тэ бьн». ⁸ Иса ле вэгэр'анд у гот: «Нъвисар э: «Сэре хвэ ль бэр Хöдан Хвэдейе хвэ дайнэ у т'эне ви бьһ'эбинэ!»*»

⁹ Паше Мирещьн Иса бьрэ Оршэлиме, эв сэр бьльндщийа бане п'арьстгөһе да сэкьнандьне у готэ ви: «һэгэр тө Көр'e Хвэде йи, дэ хвэ жѣ вьр бавежэ хваре. ¹⁰ Чьмки нъвисар э: «Хвэде we т'эмийа тэ бьдэ мьльак'этед хвэ, кö тэ хвэй кьн» ¹¹ у: «Эве тэ сэр дэсте хвэ бьгьрьн, wэки ньге тэ кэвър нэк'эвэ»*. ¹² Иса ле вэгэр'анд у гот: «һатийэ готьне кö: «Хöдан Хвэдейе хвэ

* 4:4 Нав дэстньвисаред һьнэкада аһа йэ: «Нэ кö т'эне инсан бѣ нен дьжи, ле бѣ һэр хэбэрэкэ Хвэде».

** 4:4 Қануна Дöщари 8:3.

* 4:8 Қануна Дöщари 6:13.

* 4:11 Зэбур 91:11-12.

нәшер'ьбинә!»¹³ У гава Мирешьн һ'әму щер'ьбандьн хьлаз кьрн, дәмәке жь ви дур к'әт.

Иса қәза Щәлиледи дәст бь к'әре хвә дькә

(Мәтта 4:12-17; Марқос 1:14-15)

¹⁴ Иса бь қәвата Р'өһ' вәгәр'ийа Щәлиле у нав-дәнге ви һ'әму алийед ви вәлатида бәла бу. ¹⁵ Әви к'ьништед^ф ванда һин дькьр у һ'әмуя пәсьне ви дьдан.

Бажаре Ньсрәте, ль к'ө Иса мәзын бьбу, ви қәбул накә

(Мәтта 13:53-58; Марқос 6:1-6)

¹⁶ Әв һатә Ньсрәте, ви щийе кә әв ле мәзын бьбу, мина ә'дәте хвә р'ожа^ф шәмийе әв к'әтә к'ьниште у р'абу кә бьхунә. ¹⁷ К'ьтеба Ишайа п'ехәмбәр данә ви у гава к'ьтеба гөломатккьри вәкьр, әв щи дит кә аһа ньвисар бу:

¹⁸ «Р'өһ'е Хөдан ль сәр мьн ә,
чьмки әви әз бь р'ункьрьне^ф к'ьфш кьрм,
вәки Мьзгинийе бьдьмә фәқира,
у әз шандьмә һесирар'а бой сәрбәстийе^ф
у корар'а бой дитьне даннасин кьм,
азайийе бьдьмә бьндәста

¹⁹ у сала Хөданә р'ә'ме* жи бьдьмә наскьрьне».**

²⁰ У к'ьтеб гөломатк кьр да бәрдәсти р'уньшт у к'ьништеда һ'әму зур' бьбун ль ви дьньһер'ин. ²¹ Әви дәстпекьр ванар'а гот: «Әв ньвисара кә вә иро бьһист һатә сери».

²² һ'әмуя жи шә'дәтийа ви дьдан у сәр хәбәрдана вийә мә'рифәт зәндәгьрти мабун у дьготьн: «Әва нә кәр'е

* 4:12 Қануна Дөщари 6:16.

* 4:19 Аһа жи те фә'мкьрьне: «Сала қәбулкьрьна Хөдан».

** 4:19 Ишайа 61:1-2.

Иса гэлэк нэхwәша қәнщ дькә

(Мәтта 8:14-17; Марқос 1:29-34)

³⁸ Әw жь к'ъниште дәрк'әт чу мала Шьмһ'ун^ф. Хwәсийа Шьмһ'ун тәл т'айеда дьнә'лийа у бона we жь wi һиви кьрын. ³⁹ Иса сәр wep'a сәкьни, ль т'айе һьлат у т'айе же бәр'да. Дәстхwәда р'абу сәр хwә, бәрдәсти wanp'a кьр. ⁴⁰ Гава р'о дьчу ава, һ'әмуйед кә щур'ә-щур'ә нэхwәшийед ван һәбун анинә щәм wi. Әwi дәсте хwә дани сәр ван һәр йәки у әw қәнщ кьрын. ⁴¹ Жь гәләка жи щьн дәрдык'әтън, дькьрынә қир'ин у дьготьн: «Тә Көр'е Хwәде йи!» Ле Иса ль ван һьлат у нәдьһьшт әw хәбәр дьн, чьмки заньбун кә әw Мәсинә ә.

Даннасинийа т'әмамыйа Щьһустане

⁴² Сьбәһ кә зәлал бу, Иса р'абу чу щики хәвлә. Әлаләт ль wi дьгәр'ийан у һ'әта щәм wi һатьн, нәдьһьштьн кә әw дәст жь ван бьк'ьшинә. ⁴³ Ле әwi wanp'a гот: «Гәрәке әз бажаред дьнда жи Мьзгинийа П'адшатийа^ф Хwәде бьдьм, чьмки әз бона we йәке һатьмә шандьне». ⁴⁴ У к'ъништед Щьһустанеда* даннасин дькьр.

Иса гази шагьртед^ф хwәйә пешьн дькә

(Мәтта 4:18-22; Марқос 1:16-20)

5¹ Щарәке Иса ль бәр гола Щенисарте сәкьнибу у әлаләте дора wi гьрт, кә хәбәра Хwәде бьбьһе. ² У әwi дә қәйьк дәве голе дитьн, мә'сигьр жь ван дәрк'әтьбун у т'ор'ед хwә дьщуштьн. ³ Иса к'әтә қәйькәкә жь ван, кә йа Шьмһ'ун бу, һиви жь wi кьр, кә қәйьке

* 4:44 Нав дәстньвисаред һьнәкада аһа йә: «Щәлиледа».

һынәки жь бәже^ф дур хә. У әw р'уньшт, жь қәйьке ә'лаләт һин кър. ⁴ Чахе әwi хәбәр дана хwә хьлаз кър, Шьмһ'унр'а гот: «Қәйьке бьбә щийе к'ур у т'ор'ед хwә бавежьнә неч'ире». ⁵ Шьмһ'ун ле вәгәр'анд у гот: «Мамоста, мә т'әмамийа шәве кър-нәкър тьштәк нәгьрт, ле бона хатьре тә эзе т'ор'а бавежьме». ⁶ У гава өса кърьн, һақас мә'си к'әтьне, кө т'ор'ед ван дьқәтийан. ⁷ У бь нишана гази һәвалед хwәйә қәйька дьнда дькърьн, кө бен али ван бькьн. У әwana һатьн һәр дө қәйьк жи т'ьжи кърьн, һьндьк мабу нөқ буна. ⁸ Гава Шьмһ'ун-Пәтрус әв йәк дит, хwә авитә чоке Иса у гот: «Хөдан, дури мьн һәр'ә, әз йәки гөнәк'ар^ф ьм». ⁹ Чьмки бона ван мә'сийед гьрти хофе wi у һ'әмуйед пер'а гьртьбу. ¹⁰ Ақуб^ф у Йуһ'әннайе^ф көр'ед Зәбәди жи нав ванда бун, кө һәвалед Шьмһ'ун бун. У Иса Шьмһ'унр'а гот: «Нәтьрсә! Жь вьр шунда те мәрвьа мина мә'сийа бьгьри». ¹¹ У қәйьк дәрхьстьнә бәже, һәр тьшт һьштьн пәй wi чун.

Иса йәки жь к'отибуне пақьж дькә

(Мәтта 8:1-4; Марқос 1:40-45)

¹² Гава Иса бажарәкида бу ль wьр мәрвьәки сәрдапеда к'оти һәбу. Чахе әwi Иса дит, хwә дәвәр'уйа авит же лава кър у гот: «Хөдан! һәгәр бьхвази, тө дькари мьн пақьж ки». ¹³ У Иса дәсте хwә дьреж кьре, ле к'әт у гот: «Әз дьхвазьм. Пақьж бә!» У дәстхwәда к'отибун же чу. ¹⁴ Иса т'әми да wi, кө ве йәке кәсир'а нәбежә, ле гот: «Һәр'ә хwә нишани к'аһин кә у чава Муса т'әми дайә, һ'әдийа пақьжбуна хwә бьдә, wәки һ'әмуйар'а бьбә ш'әдәти, кө тө пақьж буйи». ¹⁵ Нав у дәнге Иса һе бәла дьбу у п'ьр' ә'лаләт дьщвьийа кө гөһдарийа wi бькьн у жь нәхwәшийед хwә

қәнщ бһн. ¹⁶ Ле әми хвә ль щийе хәвлә дьгьрт у дӱа дькьр.

Иса шьлушә'тәки қәнщ дькә у гӱнед ши дьбахшинә

(Матта 9:1-8; Марқос 2:1-12)

¹⁷ Р'ожәке чахе әми һин дькьр, ферьси^ф у дәрсдаред Қануне жи р'уньшьтбун, кӱ жь һ'әму гӱндед Щәлиле, Щьһустане у жь Оршәлиме һатьбун. Қәвата Хӱдан һазьр бу, вәки Иса нәхвәшед ван қәнщ бькә. ¹⁸ We дәме чәнд мәрийа йәки шьлушә'т ньвинева анин у дьхвәстьн әв бьбьрана һьндӱр' у ль бәр Иса данина. ¹⁹ У гава вана жь дәст ә'лаләта гьран т'ӱ р'е нәдितьн кӱ ши биньнә һьндӱр', р'абунә сәр хени, к'әрмид вәкьрьн, ньвинева дахьстьнә нава мале, ль бәр Иса. ²⁰ Гава әми бавәрийа ван дит, готә йе шьлушә'т: «Ә'вдо, гӱнед тә һатьнә бахшандьне». ²¹ Қанунзан у ферьсийа дәстпекьр фькьрин у һәвр'а готьн: «Әв к'и йә ван к'ьфьрийа дькә? Пештьри Хвәде к'и дькарә гӱна бьбахшинә?» ²² Фькьред ван Исава ә'йан бун у ль ван вәгәр'анд гот: «Һун чь дьле хвәда дьфькьрьн? ²³ К'ижан р'ьһ'әт те готьне: «Гӱнед тә һатьнә бахшандьне», йан: «Р'абә у бьгәр'ә?» ²⁴ Ле вәки һун бьзаньбьн кӱ һ'ӱкӱме Кӱр'е^ф Инсан һәйә ль сәр дьне гӱна бьбахшинә», готә йе шьлушә'т: «Әз тәр'а дьбежьм, р'абә ньвина хвә һьлдә һәр'ә мала хвә». ²⁵ Әв жи бәр ч'ә'ве ван пер'а-пер'а р'абу у ньвина кӱ ль сәр п'алдаи бу һьлда чу мала хвә у шькьри дьда Хвәде. ²⁶ һ'әму һ'әйр-һ'ӱжмәк'ар ман у шькьри дьданә Хвәде, бь хофа мәзьн дьготьн: «Иро мә тьштед нәбуйи дитьн».

Иса гази Леви^Ф дькә

(*Мәтта 9:9-13; Марқос 2:13-17*)

²⁷ Пәй we йәкер'а Иса дәрк'әт, ль щийе хәрщһьлдане хәрщгьрәки р'унышти дит кә наве ви Леви^Ф бу у готе: «Пәй мьн вәрә». ²⁸ Әви жи һәр тышт һьшт, р'абу пәй ви чу. ²⁹ Леви мала хвәда һөрмәтәкә мэзын жер'а кьр. Т'әви ван гәләк хәрщгьр у һьнәкед майин жи ль сәр сьфре р'унышьтбун. ³⁰ Ферьсийа у қанунзанед ван бина хвә тәнг кьрын у шагьртед^Ф вир'а готын: «Чьма һун т'әви хәрщгьр у гөнәк'ара дьхьын у вәдхьын?» ³¹ Иса ль ван вәгәр'анд у гот: «Сахләм нә һ'әwще һ'әким ьн, ле нәхwэш. ³² Әз нәһатьмә гази йед р'аст кьм, ле гази гөнәк'ара бона т'обәйийе^Ф».

Пьрса р'ожигьртьне

(*Мәтта 9:14-17; Марқос 2:18-22*)

³³ Вана жь Иса пьрси: «Чьма шагьртед Йуһ'әнна у өса жи йед ферьсийа т'ьме р'ожи дьгьрын у дәа дькьн, ле шагьртед тә дьхьын у вәдхьын?» ³⁴ Әви жи готә ван: «Һун дькарын бежьнә хвәндийед дә'wате: «Р'ожи быгьрын», һ'әта кә зә'ва т'әви ван ә? ³⁵ Ле р'оже бен, гава зә'ва жь ван бе һьлдане, һьнге ван р'ожада we р'ожи быгьрын».

³⁶ Әви мәсәләкә дьн жи ванр'а гот: «Кәсәк жь п'арч'е ну набьр'ә у к'ьнща кәвьн п'инә накә. һәгәр өса бькә, һьн п'арч'е ну дьқәлешә, һьн жи кәвьн у ну ль һәв накьн. ³⁷ У нә жи кәсәк шәрава ну дькә мәшкед кәвьн. һәгәр өса бькә, шәрава ну we мәшка быт'әқинә у бьр'ьжә, мәшке жи хьраб

бһн. ³⁸ Ле гэрәке шәрава ну бькьнә мәшкәд ну*. ³⁹ У кәсәк пәй шәрава кәвьһр'а нахвазә йа ну вәхвә, чьмки йа кәвьһ he ле хвәш те».

Пьрса р'ожа^ф шәмийе

(Мәтта 12:1-8; Марқос 2:23-28)

Б¹ Р'ожәкә шәмийе Иса нава зәвийар'а дәрбаз дьбу, шагьртед ви сьмбьлед гәһьм дьчьһнин, дәстед хвәда дьфьрькандьһн у дьхварьһн. ² Ле жь ферьсийа һнәка гот: «Чьма һун р'ожа^ф шәмийе тыште нәщайиз дькьһн?» ³ Иса ль ван вәгәр'анд у гот: «Вә нәхвәндийә кә Дауьд чь кьр, гава әу у йед пер'а бьр'чи бун? ⁴ Нә әу к'әтә Хана^ф Хвәде у нане^ф Хвәдер'а дайи һьлда, һн хвәха хвар, һн жи да йед т'әви хвә, вәки т'ө кәсир'а нә щайиз бу бьхвара, пештьри к'аһина?» ⁵ У вәгәр'ийа ванр'а гот: «Көр'е Инсан Хөдане шәмийе йә жи».

Иса р'ожа шәмийе мәрьве кә дәсте ви к'ьшийабу қәнц дькә

(Мәтта 12:9-14; Марқос 3:1-6)

⁶ У р'ожа шәмикә дьһн Иса чу к'ьһниште, кә һин бькә. Мәрвьәк ль вьр һәбу, кә дәсте вийи р'асте к'ьшийабу. ⁷ Ч'ә'ве қанунзан у ферьсийа ль сәр ви бун, гәло we р'ожа шәмийе нәхвәша қәнц кә йан на, вәки мә'һникә ван һәбә, кә хәйба ви бькьһн. ⁸ Ле фькьред ван Исава ә'йан бун у ви мәрвье дәстк'ьшийайир'а гот: «Р'абә ве говәке бьсәкьһнә». Әу жи р'абу сәкьһни. ⁹ һыңге Иса ванр'а гот: «Әзе пьрсәке жь вә бькьһм. Р'ожа шәмийе чь щайиз ә бькьһн: Қәнци

* 5:38 Нав дәстһвьисаред һнәкада аһа йә: «Кә һәр дә жи бенә хвәйкьрьһне».

йан хъраби, р'öh'эки хълаз кьн йан онда кьн?»¹⁰ У Иса ль һ'эмуйед дора хвэ ньһер'и, ви мэрвир'а гот: «Дэсте хвэ дьреж кэ». Эви жи өса кьр у дәсте ви қәнщ бу.¹¹ Һьнге вана жь һерса хвэ дьхвар, нав һэвда дьшевьрин, кө чь биньнэ сәре Иса.

Бьжартьна һәр донздәһ шандийа^Ф

(Мәтта 10:1-4; Марқос 3:13-19)

¹² Ван р'ожада Иса чу сәре ч'ийе, кө дөа бькэ у т'эмамыйа шәве бәр Хвәде бь дөа дәрбаз кьр.¹³ Чахе сьбәһ зәлал бу, эви газы шагьртед хвэ кьрын у донздәһ мэрв жь нав ван бьжартьн, кө навед ван жи «шанди^Ф» дани:¹⁴ Шьмһ'уне кө наве ви дани Пәтрус^Ф у бьре ви Эндравьс, Ақуб у Йуһ'әнна, Филипо у Бәртоломәйо,¹⁵ Мәтта у Т'ума, Ақубе^Ф һалфаво у Шьмһ'уне кө вәлатп'арьст^Ф дьһатә готьне.¹⁶ Щьһудайе Ақуб у Щьһудайе^Ф Исхәрийоти, кө нэмамыйа^Ф ви кьр.

Иса даннасин дькә, һин дькә у қәнщ дькә

(Мәтта 4:23-25)

¹⁷ Эв бь т'эви ван бәржер бу һат, р'астәке сәкьни. Ль ве дәре к'омәкә шагьртайә мэзын у щьмәтәкә гьран жь т'эмамыйа Щьһустане, Оршәлиме у жь дәве бә'ра Суре у Сайде щьвийайи бун.¹⁸ Эвана һатьбун, вәки гөһдарийа ви бькьн у жь нәхвәшийед хвэ қәнщ бьн. У йед жь р'öh'ед һ'эрам щәфа дьк'ьшандьн жи қәнщ дьбун.¹⁹ У т'эмамыйа ә'лаләте жи дьщә'данд, вәки дәсте хвэ бьдана ви, чьмки қәват жь ви дәрдьк'әт у һәр кәс жь ван қәнщ дьбу.

Йед хвэзьли у нэ хвэзьли

(Матта 5:1-12)

²⁰ Иса бәре хвә да шагъртед хвә у гот:

«Хвэзи ль вә фәқира,
чъмки П'адшатийа^ф Хвәде йа вә йә.

²¹ Хвэзи ль вә, кә хун ньһа бър'чи нә,
чъмки хуне т'ер бһн.

Хвэзи ль вә, кә хун ньһа дьгърин,
чъмки хуне бьк'әнһн.

²² Хвэзи ль вә, гава хун бона Көр'е Инсан бәр ч'әве
мәрийа р'әш бһн,
гава вә қәбул нәкһн, вә беһөрмәт кһн
у наве хьраб сәр вә дәрхһн.

²³ Ве р'оже әшқ бһн у жь шабуна бьра ньгед вә ә'рд
нәгьрә, чъмки һәде вә ль ә'змен гәләк ә, чъмки кал-бавед
ван жи сәре п'ехәмбәра өса дькьрһн.

²⁴ Ле вәй ль вә дәвләтийа,
чъмки хун гьһиштһнә мәрәме хвә.

²⁵ Вәй ль вә, кә хун ньһа т'ер ьн,
чъмки хуне бър'чи бһн.

Вәй ль вә, кә хун ньһа дьк'әнһн,
чъмки хуне бьгърин у шине бькһн.

²⁶ Вәй ль вә, кә һ'әму мәрвь бона вә қәнщ хәбәр
дьдһн,
чъмки кал-бавед ван жи п'ехәмбәрәд дәрәвр'а өса
дькьрһн.

Дьжмьнед хwэ һ'эз бькьн

(Матта 5:38-48; 7:12a)

²⁷ Ле эз wэ гөһдарар'а дьбежым, дьжмьнед хwэ һ'эз бькьн, хернэхwазед хwэр'а қәнщийе бькьн. ²⁸ Ньфьр'кьред хwэ бьмбарэк кьн у бона йед хьрабийе wэ дькьн, дөа бькьн. ²⁹ һэгэр йэк р'уйе тэ хэ, йе дьн жи бьдэ бэр у йе кө п'оте тэ жь тэ бьстинэ, кьрасе хwэ жи жер'а бьһелэ. ³⁰ Бьдэ wi, к'и жь тэ дьхwазэ у к'и жь тэ дьстинэ пашда нэхwазэ. ³¹ У чаwа һун дьхwазьн мэрьв бона wэ бькьн, һун жи өса wанр'а бькьн. ³² һэгэр һун һ'эзкьред хwэ һ'эз дькьн, чь фэйдэ? Нэ гөнэк'ар жи һ'эзкьред хwэ һ'эз дькьн? ³³ У һэгэр һун қәнщикьред хwэр'а қәнщийе бькьн, чь фэйдэ? Нэ гөнэк'ар жи өса дькьн? ³⁴ У һэгэр һун дэйн дьдьнэ йед өса, жь к'ижана гөмана wэ һэйэ пашда бьстиньн, чь фэйдэ? Нэ гөнэк'ар жи дэйн дьдьнэ гөнэк'ара, кө диса һақаси пашда бьстиньн? ³⁵ Ле һун дьжмьнед хwэ һ'эз бькьн, қәнщийе бькьн, дэйн бьдьн у һивийа вэгэр'андьне нэминьн. һэде wэ́йе гэлэк бэ у һуне бьбьнэ зар'ед Йе һэри Жорьн. Чьмки эw бона бешекьра жи, нэр'аста жи қәнщ э. ³⁶ Дьлр'э'м бьн, чаwа Баве^ф wэ дьлр'э'м э.

Һинкьрна дэрһэқа ломэкьрнеда^ф

(Матта 7:1-5)

³⁷ Лома нэкьн у ломэ́йе ль wэ нэбьн, нэһэқийе нэкьн, нэһэқи we ль wэ нэбэ, бьбахшиньн wэр'а we бе бахшандьне. ³⁸ Бьдьн, wэр'а we бе дайине, бь пиванэкэ т'ьжи һ'эжанди, дэwьсанди, сэри қуч' we бькьнэ п'еша wэ. Чьмки бь чь чапе һун бьпивьн, бь we жи wэр'а we бе пиване». ³⁹ Эwi мэсэлэк жи wанр'а гот: «Гэло кор

дькарэ р'ебэрийе кора бькэ? Нэ һэр дөйе жи бьк'эвьнэ ч'э'ле? ⁴⁰ Шагьрт жь дэрсдаре хвэ нэ мәстър э, ле эве кө хвэндьна хвэ р'ьнд пек тинэ, дькарэ мина дэрсдаре хвэ бэ. ⁴¹ Тө чьма қыршьке ч'э'ве бьре хвэда дьбини, ле к'еране ч'э'ве хвэда набини? ⁴² Йан жи чава тө дькари бежи бьре хвэ: «Бьра, бьһелэ кө эз қыршьк жь ч'э'ве тэ дэрхьм», ле тө к'еране ч'э'ве хвэда набини? Дөр'у! Пешийе к'еране ч'э'ве хвэ дэрхэ. Паше те қэнщ бьбини кө чава қыршьк жь ч'э'ве бьре хвэ дэрхи.

Дар у бөре we

(Мәтта 7:17-20; 12:34б, 35)

⁴³ Дара қэнщ бөре хьраб надэ, нэ жи дара хьраб бөре қэнщ. ⁴⁴ һэр дар жь бөре хвэ те наскьрьне, кэсэк жь стьрийа һежира начьнэ у нэ жи жь дьр'ийе тьрийа. ⁴⁵ Мэрьве қэнщ, жь хьзна дьле хвэийи қэнщ, қэнщийе дэртинэ, ле мэрьве хьраб, жь хьзна дьле хвэийи хьраб хьрабийе дэртинэ. Чь дьле инсенда һэйэ, зар жи we йэке дьбежэ.

Һ'имед дө мала

(Мәтта 7:24-27)

⁴⁶ һун чьма мьнр'а «Хөдан! Хөдан!» дьбежьн у ван тьштед кө эз вэр'а дьбежьм накьн? ⁴⁷ һэр кэсе кө те щэм мьн готьнед мьн дьбьһе у дьр'эдинэ, эз вэр'а бежьм мина к'е йэ. ⁴⁸ Эw мина мэрьвэки йэ, йе кө мале чедькэ, эрде дьк'олэ к'ур дькэ, һ'име we ль сэр кевьр датинэ. У гава лейи^ф р'адьбэ, ч'эм ль we мале дьхэ, эw наһ'эжэ, чьмки р'ьнд һатьбу чекьрьне. ⁴⁹ Ле эве хэбэред мьн дьбьһе у нар'эдинэ, мина мэрьвэки йэ, йе кө сэр хвэлийе бе

Һ'им мале хwэр'а чедькэ. Гава ч'эм ле дьхэ, дэстхwэда һьлдыше, веран дьбэ, ль бэр мират'е дьчэ».

Иса хөламе сәрсэдәки^Ф қәнщ дькэ

(Мәтта 8:5-13; Йһ'әнна 4:43-54)

7¹ Гава Иса әw готьнед кö we гөһдарар'а быгота хьлаз кьрын, чу Кәфәрнаһуме. ² У хөламе сәрсэдәки^Ф, кö бона ви йәки һежа бу, нәхwәш бәр мьрьне бу. ³ Гава әви бона Иса бьһист, р'успийед^Ф щьһуйа^Ф шандьнә щәм ви у же һиви кьр, кö бе хөламе ви хьлаз кә. ⁴ Әwана һатьнә щәм Иса, гәләки һиви же кьрын у готьн: «Әw һежа йә кö тө әве қәнщийе жер'а бьки, ⁵ чьмки әw мьләте мә һ'ыз дькә у к'ништ жи бона мә чекьрийә». ⁶ һынге Иса т'әви ван чу. Гава незики мале бу, сәрсэд чәнд достед хwә шандьнә пешийа ви, wir'а гот: «Хөдан, зәмәте нәбинә, чьмки әз нә һежа мә кö тө бейи мала мьн. ⁷ Бона ве йәке мьн хwә лайиқи тә нәгьрт, кö бьһатама пәй тә жи, т'әне хәбәрәке бежә у хөламе мьне қәнщ бә. ⁸ Чьмки әз хwәха жи мәрвьәки бьн һ'өкөмда мә у бьн дәсте мьнда жи әскәр һәнә. Әз йәкир'а дьбежьм: «Һәр'ә», дьчә, йәки дьнр'а дьбежьм: «Wәрә», те у жь хөламе хwэр'а дьбежьм: «Әви тышти бькә», дькә». ⁹ Гава Иса әв йәк бьһист, сәр ви зәндәгьрти ма у вәгәр'ийа сәр we щьм'әта кö пәй ви дьчу, гот: «Әз wәр'а дьбежьм, мьн Исраеледа жи бawәрикә аһа йәкида нәдитийә». ¹⁰ У әвед шанди вәгәр'ийанә мал, дитьн кö we әw хөлам қәнщ буйә.

Сахбуна көр'е жьнәбийе

¹¹ Р'ожәкә дьн Иса чу бажарәки, кö наве ви Найин бу у шагьртед ви жи т'әви ә'лаләтәкә гьран wir'а дьчун.

¹² Гава незики дәргәһе бажер бу, мьрик дәрдьхьстьн. Әw

көр'е жьнэбикэ тайе т'эне бу у гэлэк һәварии жи жь бажер пер'а дьчун. ¹³ Гава Хөдан де дит, гөне ви ле һат у вер'а гот: «Нэгъри». ¹⁴ Эв незики дарбәсте бу гьрт у әвед кө дьбрьн сәкънин, Иса гот: «Хорто! Эз тәр'а дьбежъм, р'абә!» ¹⁵ Мъри р'абу р'уньшт, дәстпекър хәбәр да у Иса әв да дийа ви. ¹⁶ У сав к'этә сәр һ'әмуйа, шыкъри дьданә Хвәде у дьготън: «П'ехәмбәрәки мэзын нава мәда дәрк'әтийә!» у: «Хвәде сәрик дайә мьләте хвә!» ¹⁷ Нав у дәнге ви т'эмамииа Щьһустане у дор-бәре we бәла бу.

Иса щаба пьрса Йуһ'әннайе ньхөмдар дьдә

(Матта 11:1-19)

¹⁸ Шагьртед Йуһ'әнна Йуһ'әннар'а бона ван һ'әму тышта готън. Йуһ'әнна жи гази дө шагьртед хвә кър ¹⁹ у әв шандьнә щәм Хөдан, вәки же быпьрсын: «Тө әв и, йе кө гәрәке бьһата, йан әм һивийа йәки дьн бьн?» ²⁰ Эв мәри һатьнә щәм Иса у готън: «Йуһ'әннайе ньхөмдар^Ф әм шандьнә щәм тә, кө жь тә быпьрсын, тө әв и, йе кө гәрәке бьһата, йан әм һивийа йәки дьн бьн?» ²¹ У we дәме Иса гэлэк жь нәхвәшийа, дәрба, жь р'өһ'ед хьраб қәнщкърън у ч'әвед гэлэк кора вәкърън. ²² Иса ль ван вәгәр'анд у гот: «Һәр'ьн, чь кө вә дит у бьһист Йуһ'әннар'а бежън: Кор дьбиньн, сәқәт дьгәр'ьн, к'оти пақъж дьбьн, кәр' дьбьһен, мьри р'адьбьн у фәқирар'а жи Мьзгини те дайине. ²³ У хвәзи ль ви, кө мьнда шык нак'әвә».

²⁴ Гава әвед кө Йуһ'әнна шандьбун чун, Иса бона Йуһ'әнна әлаләтер'а дәстпекър гот: «һун дәрк'әтьнә бәр'ийе чь бьбиньн? Қамишәки^Ф кө жь байе дьһ'әжә? ²⁵ Йан дәрк'әтьн чь бьбиньн? Мәрвьәки к'ьнще назьк^Ф ль хвә кьри? Нә әвед кө к'ьнще назьк хвә дькьн у ә'мьре р'ьнд дәрбаз дькьн, әв малед п'адшада нә? ²⁶ Йан

һун дәрк'әтһн чь бьбинһн? П'ехәмбәрәки? Бәле, әз wәр'a дьбежһм, жь п'ехәмбәрәки жи мәстър ә. ²⁷ Әвә әв ә, бона к'ижани ньвисар ә: «Ва йә әзе қасьде хwә пешийа тәва бьшинһм. Әвә р'ийа тә пешийа тәва һазър кә». ²⁸ Әз wәр'a дьбежһм, жь нава әвед кә жь к'өлфәта дһне к'әтһнә, т'ө кәс жь Йуһ'әнна мәстър нәбуйә, ле П'адшатиһа Хwәдеда йе һәри бьч'ук жь ви мәстър ә». ²⁹ Гава т'әмамиһа щьмә'те, өса жи хәрщгьра әв йәк бьһист, т'ьвдира Хwәде р'аст һ'әсаб кьрһн, чьмки бь ньхөмандьна Йуһ'әнна һатьбунә ньхөмандьне. ³⁰ Ле ферьси у қанунзана бона хwә т'ьвдира Хwәде т'әхсир^ф кьрһн, чьмки вана нәхwәст кә жь Йуһ'әнна бенә ньхөмандьне.

³¹ Иса сәрда зедә кьр гот: «Әз мәрьвед ви ньсьли мина чь бьшьбинһм? Йан әв мина чь нә? ³² Әв мина ван зар'a нә, йед кә базареда р'уньшти нә, гази һәвдө дькьн у дьбежһн: «Мә бона wә зөр'не хьст, һун нәр'әқьсин у бона wә бәйт'^ф гот, һун нәгьрийан». ³³ Йуһ'әннайе ньхөмдар һат, нә нан дьхвар, нә жи шәрәв вәдьхвар*, wә дьгот: «Щьн вида һәйә». ³⁴ Көр'е Инсан һат, дьхwә у вәдьхwә, һун бона ви дьбежһн: «Әв йәки пәй хварьн у вәхварьне к'әти йә, дөсте хәрщгьр у гөнәк'ара йә». ³⁵ Ле һ'әмуьед кә пәй сәрвахтиһе дьчһн әв к'ьфш дькьн кә сәрвахти р'аст ә*».

Иса мала Шьмһ'унда к'өлфәта гөнәк'ар дьбахшинә

³⁶ Йәки ферьси һиви жь Иса кьр, кә т'әви ви хварьне бьхwә. Әв жи чу мала ви ферьсийи, сәр сьфре р'уньшт. ³⁷ У ви бажарида к'өлфәтәкә ч'әвдәр^ф һәбу. Гава we

* 7:33 Йуһ'әннайе ньхөмдар йәки «нәзир^ф» дьһатә һ'әсабе.

* 7:35 Бь йунани хәбәр бь хәбәр аһа йә: «Сәрвахти жь һ'әму зар'ед хwә р'аст к'ьфш дьбә». һьнәк жи аһа ф'әм дькьн: «Сәрвахти жь һ'әму ә'мәлед хwә к'ьфш дьбә кә әв р'аст ә».

бһист кӧ эв мала ферьсида сэр сьфре р'уныштийӧ, дӧрданӧкӧ^ф алабастьрейи р'уне бинхвӧш ани, ³⁸ пыштева бӧр ньгед ви сӧкьни гьрийа, бь һесьред хвӧ ньгед ви шьл кьрӧн у бь п'ор'е сӧре хвӧ жи зьһа кьрӧн. Паше ньгед ви р'амусан, бь р'уне бинхвӧш жи р'ун^ф кьрӧн. ³⁹ Гава ви ферьсийе кӧ эв т'ӧглиф кьрбу эв йӧк дит, дьле хвӧда гот: «Һӧгӧр ӧва п'ехӧмбӧр буйа, we бьзаньбуйа кӧ к'и йӧ у йӧкӧ чава йӧ дӧсте хвӧ дайӧ ви», чьмки йӧкӧ ч'ӧвдӧр бу. ⁴⁰ Иса wir'a гот: «Шьмһ'ун, эз дьхвазьм тыштӧки тӧр'а бежьм». Ӑви жи гот: «К'ӧрӧм кӧ бежӧ, дӧрсдар». Иса гот: ⁴¹ «Дӧ дӧйндаред йӧки һӧбун, йӧк пенсьд зиви^ф дӧйндаре ви бу, йӧк жи пенци. ⁴² Ле чьмки тыштӧки ван т'ӧнӧбу кӧ дӧйне хвӧ бьдана, ӧви бахшандӧ һӧр дӧйа жи. Ньһа жь ван һӧр дӧйа к'ижане гӧлӧки ви һ'ӧз бькӧ?» ⁴³ Шьмһ'ун ле вӧгӧр'анд у готе: «Т'ӧхмина мьн ӧве кӧ гӧлӧк жер'а һатӧ бахшандьне». Иса wir'a гот: «Тӧ р'аст те дӧрхьст». ⁴⁴ У сӧр к'ӧлфӧтеда вӧгӧр'ийа, Шьмһ'унр'а гот: «Ве к'ӧлфӧте тӧ дьбини? Ӑз һатьмӧ мала тӧ, бона ньгед мьн тӧ ав нӧда, ле ӧве бь һесьред хвӧ ньгед мьн шьл кьрӧн у бь п'ор'е сӧре хвӧ жи зьһа кьрӧн. ⁴⁵ Тӧ р'амусанӧк нӧда мьн, ле жь һьнгева кӧ ӧз һатьмӧ вьр, ӧве дӧст жь р'амусана ньгед мьн нӧк'ьшандийӧ. ⁴⁶ Тӧ сӧре мьн р'ун^ф нӧкьр, ле ӧве бь р'уне бинхвӧш ньгед мьн р'ун кьрӧн. ⁴⁷ Бона ве йӧке ӧз тӧр'а дьбежьм, гӧнед ве кӧ гӧлӧк бун һатьнӧ бахшандьне, лӧма ӧве гӧлӧк һ'ӧз кьр. Чьмки к'ер'а гӧлӧк тенӧ бахшандьне, гӧлӧк жи һ'ӧз дькӧ. Ле к'ер'а һьндьк тенӧ бахшандьне, ӧв һьндьки һ'ӧз дькӧ». ⁴⁸ У wer'a гот: «Гӧнед тӧ һатьнӧ бахшандьне». ⁴⁹ һьнге ӧвед кӧ т'ӧви ви сӧр сьфре р'уныштьбун нав хвӧда дьготьн: «Ӑва к'и йӧ, һ'ӧта кӧ гӧна жи дьбахшинӧ?» ⁵⁰ У Иса we к'ӧлфӧтер'а гот: «Бавӧрийа тӧ тӧ хьлаз кьри. Бь хер у сьламӧт һӧр'ӧ».

К'өлфәтед кө пәй Иса дьчун

8 ¹Жь вьр шунда Иса гөнд у бажара дьгәр'ийа, даннасин дькьр, Мьзгинийа П'адшатийа Хвәде дьда у һәр донздәһ шагьрт жи пер'а бун, ²өса жи чәнд к'өлфәтед кө жь р'өһ'ед хьраб у нәхвәшийа қәнц бьбун: Мәрийәма кө жер'а Мәждәлани дьготьн, йа кө һ'әфт щьн же дәрк'әтьбун ³у Йохана, жьна Хузайе вәк'илхәрщә^Ф мала һеродәс, Сосьн у гәләкед майин, кө вана бь һәбука^Ф хвәва ванр'а* бәрдәсти дькьрн.

Мәсәла т'охьмр'әш^Ф

(Мәтта 13:1-9; Марқос 4:1-9)

⁴У гава ә'лаләтәкә гьран жь гәләк бажара щәм Иса щьвийа, әви мәсәләк гот: ⁵«Т'охьмр'әш^Ф р'абу чу кө т'охьм бьр'әшинә. Гава дьр'әшанд, һнәк к'әтьнә дәве р'е һатьнә п'епәскьрьне у тәйрәдед әзмен һатьн әв хварьн. ⁶У һнәк жи к'әтьнә щийе кәвьри, гава шин бун, жь дәст кемасийа шьлайе һ'ьшк бун. ⁷У һнәк жи к'әтьнә нава стьрийа, стьри жи пер'а шин бун у әв хәньқандьн. ⁸Һнәкед дьн жи к'әтьнә нава әрде қәнц у шин бун, сәд щар бәр дан». Гава әв йәк гот, кьрә гази: «Гөһе к'ейи бьһистьне һәйә бьра бьбьһе!»

Иса чьма бь мәсәла хәбәр дьдә

(Мәтта 13:10-17; Марқос 4:10-12)

⁹Шагьртед ви же пьрсин: «Мә'на әве мәсәле чь йә?» ¹⁰Әви гот: «Вәр'а һатийә дайине, кө һун сөр'ед П'адшатийа Хвәде бьзаньбьн, ле йед майинр'а бь мәсәла

* 8:3 Нав дәстньвисаред һнәкада дәвса «ванр'а» «вир'а» һәйә.

те хәбәрдане кӧ: «Бьньһер'ьн у нәбиньн, бьбьһен у фә'м нәкьн»*.

Шьровәкьрьна мәсәла т'охьмр'әш

(Мәтта 13:18-23; Марқос 4:13-20)

¹¹ Әв ә мә'на ве мәсәле: Т'охьм хәбәра Хвәде йә.
¹² Т'охьмед кӧ к'әтьнә дәве р'е әв ьн, йед кӧ хәбәре дьбьһен, ле Мирешьн те хәбәре жь дьле ван дәрдыхә, кӧ нәбә бавәр бькьн у хьлаз^ф бьн. ¹³ Т'охьмед кӧ к'әтьнә щийе кәвьри әв ьн, йед кӧ гава хәбәре дьбьһен, бь әшқ у ша қәбул дькьн. Ле чьмки р'авед ван т'өнәнә, дәмәкә кьн бавәр дькьн у wәхте щер'ьбандьне дьк'әвьн. ¹⁴ Т'охьмед кӧ к'әтьнә нава стьрийа әв ьн, йед кӧ хәбәре дьбьһен, хәмед дьнева, дәвләт у шабуна ви ә'мьрива мьжул дьбьн, дьхәньқьн у әв бе бәр дьминьн. ¹⁵ У т'охьмед к'әтьнә нав әрде қәнщ әв ьн, йед кӧ бь дьле сах у қәнщ хәбәре дьбьһен, дьле хвәда хвәй дькьн у бь сәбьр бәре хвә дьдьн.

Ч'ъра сәр п'еч'ьре^ф

(Марқос 4:21-25)

¹⁶ Т'ӧ кәс ч'ъра вехьсти накә бьн фьрақе, нә жи дькә бьн щи-ньвине, ле датинә сәр п'еч'ьре^ф, wәки әвед кӧ дьк'әвьнә һьндӧр', р'онайе бьбиньн. ¹⁷ Чьмки тыштәки вәшарти т'ӧнә кӧ дәрнәйе у нә жи тыштәки дьзива, кӧ хӧйа нәбә у нәйе бәр р'онайе. ¹⁸ Аwa сәр ван тыштед кӧ һун дьбьһен бьфькьрьн, чьмки к'ер'а кӧ һәйә, we he ле зедә бә у к'ер'а кӧ т'ӧнә, әве кӧ wi т'ьре һәйә жи, we же бе стандьне».

* 8:10 Ишайа 6:9.

Де у бьрайед Иса

(*Мәтта 12:46-50; Марқос 3:31-35*)

¹⁹ Ынге де у бьрайед ви һатьнэ щэм ви, ле жь дэст зэ'фбуна э'лалэте нькарьбун незики ви буна. ²⁰ Щаб данэ ви кӧ: «Дийа тэ у бьрайед тэ дэрва сэкьни нэ у дьхвазын тэ бьбиньн». ²¹ Эви жи ль ван вэгэр'анд у гот: «Де у бьрайед мын эв ын, йед кӧ хэбэра Хвэде дьбьһен у дьрэдиньн».

Иса фьртоне^ф дьсэқьр'инэ

(*Мәтта 8:23-27; Марқос 4:35-41*)

²² Р'ожэке Иса шагьртед хвэва к'этэ қэйьке у готэ ван: «Эм дэрбази ви бэри голе бьн». У р'ек'этын. ²³ Гава қэйькеда дьчун, эв хэвр'а чу. У фьртонэк^ф ль голе р'абу, қэйьк т'ьжи ав дьбу, эв қэзийеда бун. ²⁴ Ынге шагьрт незики ви бун, эв һ'шьар кьрын у готьне: «Мамоста, мамоста! Эм онда дьбьн!» Эв р'абу, ль байе у пелед аве һьлат, эв сэкьнин у сэқьр'ин. ²⁵ Ынге эви ванр'а гот: «Бавэрийа вэ к'ане йэ?» У вана бь хоф, э'щербмайи һэвр'а готын: «Гэло эв к'и йэ, кӧ э'мьри сэр бе у аве жи дькэ у ельми^ф ви дьбьн?»

Иса йэки щьнак'эти^ф қэнщ дькэ

(*Мәтта 8:28-34; Марқос 5:1-20*)

²⁶ Эвана бь қэйьке чунэ т'опрахед Гьрасине, пешбэри Щэлиле. ²⁷ Гава эв дэрк'этэ бэже, жь ви бажари мэрвьэк дэрк'этэ пешийа ви, кӧ щьн нав вида бун. Эви зува нэ к'ьнщ ль хвэ дькьрын у нэ жи малда дьсэкьни, нава гор'станада дьма. ²⁸ Гава эви Иса дит, кьрэ қир'ин к'этэ бэр ви у бь дэнгэки бьльнд гот: «Тӧ чь жь мын дьхвази

Исайе Көр'е Хвәдейе һәри Жорьн? Эз р'әща жь тә дькьм, мьн нәдә щәфе!»²⁹ Чьмки Иса ә'мьри сәр р'өһ'е һ'әрам кьрбу, кө жь ви мәрви дәрк'әвә. Әв гәләк щара щьна дьк'әт, гава бь қәйд у зьнщира жи гьредьдан, әви диса қәйд дьқәтандьн у щьна әв чола дьхьст.³⁰ һьнге Иса жь ви пьрси у готе: «Наве тә чь йә?» Әви гот: «К'омәшкәр*», чьмки гәләк щьн к'әтьбунә нава ви.³¹ У щьна лава ви дькьр, кө ә'мьр нәкә әв һәр'ьнә гәлийе^ф һәй-вайе.³² Ль ви щийи сурики бәразайи мәзьн һәбу, кө сәре ч'ийе дьч'ерийа. Щьна р'әща же дькьр, кө изьне бьдә ван, әв һәр'ьн бьк'әвьнә нава бәраза. Әви изьн да.³³ У щьн жь нав ви мәрви дәрк'әтгьн, чун к'әтгьнә нава бәраза у әв сури жорда р'әви, хвә жь кәнделда авитгьнә голе хәнъдин.³⁴ Гава бәразвана әв йәк дит, р'әвин чунә бажар у гөнда, әв йәк гьли кьрн.³⁵ Мәрвь р'абун чун, кө тыште буйи бьбиньн. Гава һатгьнә щәм Иса, дина хвә дане, we әв мәрве кө щьн же дәрк'әтьбун, к'ьнще ви ле, сәр һ'ьше хвәда һати, ль бәр ньгед Иса р'уньшти йә. һьнге әв тьрсийан.³⁶ Әвед кө әв йәк дитьбун, йед майинр'а готгьн, кө чава әви щьнак'әти^ф қәнщ бу.³⁷ һьнге һ'әму бьнәлийед^ф дор-бәред Гьрасине һиви жь Иса кьрн, кө жь ван дур к'әвә, чьмки савәкә мәзьн әв гьртьбун. Әв жи к'әтә қәйьке у пашда вәгәр'ийа.³⁸ Ле әв мәрве кө щьн же дәрк'әтьбун лава ви кьр, кө әв жи т'әви ви һәр'ә. Ле Иса әв вәр'екьр у гот:³⁹ «Вәгәр'ә мала хвә у чь кө Хвәде бона тә кьр гьли кә». У әв чу, чь кө Иса бона ви кьрбу т'әмамийа бажерда дьгот у дькьрә дәнги.

* 8:30 Бь йунани хәбәр бь хәбәр аһа йә: «Легейон», ава готи «к'омәкә щьнайә бех'әсаб».

Qизa мьри у к'олфэта нэхwэш

(*Матта 9:18-26; Марқос 5:21-43*)

⁴⁰ У чахе Иса вэгэр'ийа, э'лалэте эw қэбул кьр, чьмки һ'эму жи һивийа wi бун. ⁴¹ У мэрвьэки наве wi Йайиро, сэрwере к'ьниште, һат хwэ авитэ ньгед Иса у һиви же кьр, кӧ һэр'э мала wi. ⁴² Чьмки т'эне қизэкэ wийэ донздэһ сали һэбу у эw жи бэр мьрьне бу. Гава Иса дьчу, э'лалэте зэ'мэт дьда wi. ⁴³ Wьр к'олфэтэк жи һэбу, кӧ донздэһ сале we бун, сэр хуне вэбьбу. Эwe һ'эму һэбука хwэ дабу һ'экима, ле т'ӧ кэси ч'арэ ле нэкьрьбу. ⁴⁴ Эва пыштева һат ль р'ишийед к'ьнще wi к'эт у дэстхwэда хун же ч'ькийа. ⁴⁵ Иса гот: «Эw к'и бу кӧ ль мьн к'эт?» Гава һ'эмуйа инк'ар^ф кьр, Пэтрус гот*: «Мамоста, э'лалэт тэ дэ'ф дьдэ, тэнгасийе^ф дьдэ тэ**». ⁴⁶ Ле Иса гот: «Йэк ль мьн к'эт, чьмки эз пе һ'эсийам кӧ жь мьн қэwат дэрк'эт». ⁴⁷ У гава к'олфэте дит кӧ нэһатэ вэшартьне, лэрьзи, һат хwэ авитэ бэр wi у ль бэр т'эмамыйа щьмэ'те wир'а гот, кӧ бона чь ль wi к'эт у чава пер'а-пер'а қэнщ бу. ⁴⁸ Эwi wер'а гот: «Эвде!* Бawэрийа тэ тӧ қэнщ кьри. Бь хер у сыламэт һэр'э». ⁴⁹ Эwi һе хэбэр дьда, жь мала сэрwере к'ьниште йэки һат у гот: «Qиза тэ мьр, иди зэ'мэте нэдэ дэрсдар». ⁵⁰ Гава Иса эв йэк бьһист, wир'а гот: «Нэтьрсэ, т'эне бawэр бькэ у we қэнщ бэ». ⁵¹ Гава эw чу мал, нэһьшт кэсэк һэр'э һьндӧр', пештьри Пэтрус, Йуһ'энна, Ақуб у де у баве қизьке. ⁵² һ'эму дьгьрийан у ши́на we дькьрьн, ле

* 8:45 Нав дэстньвисаред һьнэкада аһа йэ: «У йед пер'а».

** 8:45 Нав дэстньвисаред һьнэкада аһа йэ: «У тӧ дьбежи, к'и бу, ль мьн к'эт?»

* 8:48 Нав дэстньвисаред һьнэкада аһа йэ: «Сэрхwэ бэ!»

Иса гот: «Нэгьрин. Әw нәмьрийә, ле һеньжийә». ⁵³ Wана қәрфе хwә пе дькър, чьмки заньбун кө әwa мьрийә. ⁵⁴ * У Иса дәсте we гьрт, дәнг да we у гот: «Qизьк, р'абә!» ⁵⁵ У р'öh'e we ле вэгәр'ийа, пер'а-пер'а р'абу сәр хwә. Иса ә'мьр кър, кө хөрәк бьднә we. ⁵⁶ Де у баве we зэндәгьрти ман. Ле әми т'әми ль wan кър, кө ве йәке кәсир'а нәбежьн.

Шандьна һәр донздәһа

(Мәтта 10:5-15; Марқос 6:7-13)

9 ¹ Иса гази һәр донздәһ шагьртед хwә кър, қәwат у һ'өкөм да wan, кө һ'әму щьна дәрхьн у жь нәхwәшийа қәнщ кьн. ² Әw шандьн, кө П'адшатийа Хwәде даннасин кьн у нәхwәша қәнщ кьн ³ у wанар'а гот: «Бона р'е тыштәки һьлнәдьн, нә шьвдар, нә турьк, нә нан, нә зив, нә жи дө дәст кьрас. ⁴ Чь мала кө һун һәр'не, wьр бьминьн у жь wьр р'ек'әвьн. ⁵ У әw дәра кө wә қәбул нәкьн, гава жь wi бажари дәртен, т'оза ньгед хwә даwшиньн, wәки wанар'а бьбә шәдәти». ⁶ У шагьрт р'абун, гөнд-гөнд гәр'ийан у һәр дәра Мьзгини дан, нәхwәш қәнщ кьрн.

Шашийа һеродәс

(Мәтта 14:1-12; Марқос 6:14-29)

⁷ Аwa һеродәсе сәрwер бона һ'әму кьрьнед Иса бьһист у т'әвиһәв бу, чьмки һьнәка дьгот: «Әва Йуһ'әнна йә, жь нав мьрийа р'абуйә» ⁸ у һьнәка жи дьгот: «Елийас ә к'ьфш буйә» у һьнәкед майин жи дьготьн: «Әва йәк жь п'ехәмбәрәд бәре йә сах буйә». ⁹ һеродәс гот: «Мьн сәре Йуһ'әнна да

* 8:54 Нав дәстньвисаред һьнәкада аһа йә: «Иса һ'әму дәрхьстьнә дәрва...»

лехъстыне, ле эва к'и йә кө эз дәрһәқа вида ван тышта дьбьһем?» У ви дьхвәст Иса бьдита.

Иса пенщ һ'эзара т'ер дькә

(Мәтта 14:13-21; Марқос 6:30-44; Йуһ'әнна 6:1-14)

¹⁰ Гава шанди вәгәр'ийан, чь кө ван кьрьбу Исар'а гьли кьрын. Әви т'әне шандийед хвә т'эви хвә һьлдан у чунә бәрбь бажаре Бәйтсайдае. ¹¹ Гава ә'лаләт пе һ'әсия, пәй ви чу. Иса әв қәбул кьрын у т'эви ван бона П'адшатийа Хвәде хәбәр дьда у әвед кө һ'әвщә қәнщбуне бун қәнщ кьрын. ¹² Бәре еваре һәр донздәһ һатьнә щәм ви у жер'а готьн: «Ә'лаләте бәр'дә, кө һәр'ьн гөнд у бәргед дор-бәра щивар бьн у хвәр'а хөрәк дәст хьн, чьмки әм ль щики хьки-хвәли нә». ¹³ Ле Иса ванр'а гот: «һун хөрәк бьдьнә ван». Вана жи ле вәгәр'анд у гот: «Пештьри пенщ нан у дө мә'сия вәки майин тыштәки мә т'өнә, һәгәр әм нәчьн т'әмамийа щьм'тер'а хөрәк нәк'ьр'ьн?» ¹⁴ Чьмки қаси пенщ һ'эзар мера бун. Әви шагьртед хвәр'а гот: «Щьм'те пенщи-пенщи бьдьнә р'уныштандьне». ¹⁵ У өса кьрын, һ'әму жи данә р'уныштандьне. ¹⁶ Әви әв пенщ нан у һәр дө мә'си һьлдан, бәре хвә ә'зменда кьр шькьри да, кәркьр у да шагьрта, кө бәлайи ә'лаләте кьн. ¹⁷ һ'әмуяа жи хвар т'ер бун у донздәһ сәлә жи һурькед бәрмайи бәрәв кьрын.

Пәтрус шә'дәтийе ль сәр Иса дьдә

(Мәтта 16:13-19; Марқос 8:27-29)

¹⁸ Щарәке Иса бь т'әне т'эви шагьртед хвә дөа дькьр, жь ван пьрси: «Бь т'әхмина щьм'те эз к'и мә?» ¹⁹ Вана ле вәгәр'анд у гот: «һьнәк дьбежьн Йуһ'әннайе ньхөмдар ә, һьнәкед дьн дьбежьн Елийас ә, һьнәкед майин жи дьбежьн,

йәк жь п'ехәмбәред бәре йә сах буйә». ²⁰ Әви жь ван пьрси: «Ле һун чь дьбежьн? Бь т'эхмина вә эз к'и мә?» Пәтрус ле вәгәр'анд у гот: «Тө Мәсиһе Хвәде йи».

Иса дәрһәқа щәфа у мьрьна хвәда дьбежә

(Мәтта 16:20-28; Марқос 8:30-9:1)

²¹ һынге Иса һ'ышк т'әми да ван, кө we йәке кәсир'а нәбежьн. ²² У әви гот: «Көр'е Инсан гәрәке гәләки щәфа бьк'ышинә, жь алийе р'успийа, сәрәкед к'аһина у қанунзанада бе т'эхсиркьрьн у көштъне, ле р'ожа сьсийа we жь мьрьне р'абә».

Хаче^ф хвә һьлдә у ль пәй мьн вәрә

²³ У Иса һ'әмуяр'а гот: «Һәгәр йәк дьхвазә ль пәй мьн бе, бьра хвә инк'ар кә у һәр р'ож хаче^ф хвә һьлдә у ль пәй мьн бе. ²⁴ Чьмки к'и кө дьхвазә ә'мьре хвә хьлаз кә, әве өнда кә у к'и кө ә'мьре хвә бона мьн өнда кә, әве хьлаз кә. ²⁵ Чь фәйдә, һәгәр мәрвь т'әмаийа дьнйәйе қазьнщ кә, ле ә'мьре хвә өнда кә йан зьраре хә? ²⁶ У к'и мьн у хәбәред мьн шәрм һ'әсаб кә, Көр'е Инсан жи we ви шәрм һ'әсаб кә, гава әв бь р'умәта хвә, р'умәта Баве у мьльак'әтед пирозва бе. ²⁷ Әз р'аст вәр'а дьбежьм, һьнәкед ль вьр сәкьни we мьрьне нәбиньн, һ'әта кө П'адшатийа Хвәде бьбиньн».

Шагьрт Иса нава нур у р'умәтеда дьбиньн

(Мәтта 17:1-8; Марқос 9:2-8)

²⁸ Пәй ве хәбәрданер'а вәкә һ'әфтеке шунда, Иса Пәтрус, Йуһ'әнна у Ақуб һьлдан чунә сәре ч'ийе кө дөа бькьн. ²⁹ Гава Иса дөа кьр, р'әнге ви һатә гөһастъне, к'ьнщед ви чил-қәрқаш бун, бьрьқин. ³⁰ У дө мәрвьа т'әви

ви хэбэр дьда, йэк Муса бу, йэк жи Елйас. ³¹ Эвана
 бь р'умэт к'эфш бун у бона мьрна ви хэбэр дьдан, кő
 Оршэлимеда we бьбуя. ³² Ч'эвед Пэтрус у эвед т'эви ви
 жь хэве гьран бьбун, ле гава һ'ышйар бун, р'умэта ви у
 һэр дő мэрьвед щэм ви сэкьни дитьн. ³³ Чахе эвана жь
 ви дур к'этьн, Пэтрус Исар'а гот: «Мамоста, чава р'ьнд
 э кő эм вьр ьн! Дэ эме се һ'олька чекьн, йэке тэр'а, йэке
 Мусар'а у йэке жи Елйаср'а». Чьмки эви ньзаньбу эв чь
 дьбежэ. ³⁴ Гава эви һе хэбэр дьда, э'врэк һат у сэр ван
 кьрэ си. У чахе к'этьнэ бьн ви э'ври, эвана тьрсийан.
³⁵ У жь ви э'ври дэнгэк һат кő дьгот: «Эв э Көр'е мьн,
 Бьжартийе мьн^ф! Гөһдарийа ви бькьн!» ³⁶ Гава эв дэнг
 һат, Иса т'эне ма. У вана дэнге хвэ бьр'и, ван р'ожада чь
 кő дитьбун кэсир'а нэготьн.

Иса көр'ькэки щьнак'эти қэнщ дькэ

(Матта 17:14-18; Марқос 9:14-27)

³⁷ Р'ожа дьне, гава эвана жь ч'ийе һатьнэ хваре,
 э'лалэтэкэ гьран пешийа вида һат. ³⁸ У жь нав э'лалэте
 мэрьвэки гази кьр у гот: «Дэрсдар, эз һиви жь тэ дькьм,
 бь ч'э'ве р'э'ме ль көр'е мьн бьньһер'э. Эв тайе мьни
 т'эне йэ, ³⁹ р'өһ'эки хьраб ви дьгьрэ у ньшкева дькэ
 қир'ин вэдьч'ьр'ькэ, к'эф сэр дьк'эвэ һурдэхвэши дьбэ у
 бь зорэке жь ви дур дьк'эвэ. ⁴⁰ Мьн лава жь шагьртед
 тэ кьр, кő щьн же дэрхьн, ле вана нькарьбу». ⁴¹ Иса гот:
 «Ньсьле нэбауэр у хальфи^ф! һ'эта к'энге эзе т'эви вэ бьм
 у ль вэ сэбьр кьм? Көр'е хвэ бинэ вьр». ⁴² Гава һе дьһат,
 щьн эв э'рде хьст у п'ьрпьти. Иса ль р'өһ'е һ'эрам һьлат,

* 9:35 Нав дэстньвисаред һьнэкада «дэлаһ» һэйэ. Ль гора Ишайа 42:1
 Мэсир бьжартийе Хвэде йэ.

көр'бк қәнщ кър у да баве ви. ⁴³ Т'эмамия щьм'те сэр мэзьянийя Хвэде зэндэгьрти мабу.

Иса диса дэрһәқа мьрьна хвэда дьбежә

(Мәтта 17:22-23; Марқос 9:30-32)

У чахе һ'эму сэр һәр тыштед кө Иса дькьрын ә'щербмаи мабун, әви шагьртед хвәр'а гот: ⁴⁴ «Һун ван хэбэра бира хвэда хвэй кьн: Көр'е Инсан we бык'эвэ дэсте мэрьва». ⁴⁵ Ле вана эв йәк фә'м нәкьр, чьмки эв жь ван вэшарти бу кө фә'м нәкьн у төрөш нәдькьрын жи бона we йәке жь ви бьпьрсийана.

К'и йә йе һәри мэзнь?

(Мәтта 18:1-5; Марқос 9:33-37)

⁴⁶ Нав шагьртада пьрс пешда һат, кө нава ванда к'и йә йе һәри мэзнь. ⁴⁷ Ле нетед дьле ван Исава ә'йан бун, зар'окәк ани щәм хвэ да сәкьнандьне ⁴⁸ у ванр'а гот: «К'и кө әве зар'оке бь наве мьн қәбул кә, әв мьн қәбул дькә. У к'и кө мьн қәбул дькә, йе кө әз шандьм қәбул дькә. Чьмки к'и нава вә һ'эмуйада һәри бьч'ук ә, әв ә йе һәри мэзнь».

Йе нә мьқабьли вә йә, әв алийе вә йә

(Марқос 9:38-40)

⁴⁹ Йуһ'әнна р'абу у гот: «Мамоста, мә мэрвьәк дит кө бь наве тә щьн дәрдьхьстьн, ле мә нәһьшт, чьмки әв ль пәй мә найе». ⁵⁰ Ле Иса wir'а гот: «Пешийе ль ви нәгьрын, чьмки әве кө нә мьқабьли вә йә, әв пышта вә йә».

Гөндәки самәрийа^ф Иса қәбул накә

⁵¹ У чахе әв р'ожед кө Исайте бьһата һьлдане незик бун, әви бәре хвэ да Оршәлиме, кө һәр'ә вьр. ⁵² У пешийа хвэ

мәри шандьн, әwana чунә гөндәки Самәрийае^Ф кө бона ви һазьрийе бьбиньн. ⁵³ Ле самәрийа^Ф әw ль wьp қәбул нәкьp, чьмки бәре ви к'әтьбу Оршәлиме. ⁵⁴ Гава шагьртед ви Ақуб у Йуһ'әнна әв йәк дит, готьн: «Хөдан, тө дьхwaзи әм жь ә'змен агьp бьхwазьн кө бьбарә у қьp'a ван бинә?»[»] ⁵⁵ Ле әw вәгәр'ийа, ль ван һьлат.* ⁵⁶ У чунә гөндәки дьн.

Щабдарийа йед кө пәй Иса дьчьн

(Мәтта 8:19-22)

⁵⁷ У чахе әwana p'e дьчун, йәки wир'a гот: «Тө к'өда жи һәр'и әзе пәй тә бем». ⁵⁸ Иса готә ви: «P'увийар'a қөл һәнә, тәйрәдед ә'зменp'a жи һелин, ле бона Көр'e Инсан щик т'өнә кө сәре хwә ле дайнә». ⁵⁹ Иса йәки дьнp'a гот: «Пәй мьн wәрә». Әви жи гот: «Хөдан! Изьне бьдә мьн, кө әз пешийе һәр'ьм баве хwә дәфьн кьм». ⁶⁰ Ле Иса wир'a гот: «Бьра мьри мьрийе хwә дәфьн кьн. Тө һәр'ә П'адшатийа Хwәде даннасин кә». ⁶¹ Йәки дьн жи гот: «Әзе пәй тә бем Хөдан, ле т'әне изьне бьдә мьн, кө әз пешийе хатьре хwә жь нәфәрәд мала хwә бьхwазьм». ⁶² Иса гот: «К'и кө дәсте хwә датинә сәр к'отане у ль пышт хwәва дьньһер'ә, әw нә һежайи П'адшатийа Хwәде йә».

Шандьна һ'әфте дө шагьрта

10 ¹ Пәй ве йәкер'a Хөдан һ'әфте дө* шагьртед дьн жи к'ьфш кьрьн у әwana дөдө-дөдө пешийа хwәва шандьнә ван щи у бажара, к'идәре хwәха гәрәке бьчуйа

* 9:54 Нав дәстньвисаред һьнәкада аһа йә: «Чава Елийас кьp».

* 9:55 Нав дәстньвисаред һьнәкада аһа йә: «У гот: «һун ньзаньн хwәйе чь p'öh'и нә. Чьмки Көр'e Инсан нәһат, кө p'öh'e мәрьва онда кә, ле хьлаз кә»».

* 10:1 Нав дәстньвисаред һьнәкада аһа йә: «һ'әфте».

² у ванар'а гот: «Нандьрун^ф гэлэк э, ле п'алэ һындьк ын. Ава һиви жь хвэйе нандьруне бькын, вэки п'ала нандьруна хвэр'а бышинэ. ³ Һэр'ын, эз вэ мина бэрха дышиньмэ нава гөра. ⁴ Хвэр'а нэ к'иськ һылдын, нэ турьк, нэ жи чарьха. У р'ева сылаве* нэдьнэ т'ө кэси, ⁵ чь мала кө һун һэр'не, пешийе бежын: «Ә'дылайи ве малер'а». ⁶ У һэгэр ль вьр мэрвьэки һежайи ә'дылайийе һэбэ, ә'дылайийа вэйе ль сэр ви бьминэ. Ле һэгэр т'өнэбэ, ве ль вэ вэгэр'ә. ⁷ У ве маледа бьминьн, чь хварьне жи бьдынэ вэ, әве жи бьхвьн у вэхвьн, чьмки п'алэ һежайи һәге хвэ йә. У мал бь мал нэгэр'ын. ⁸ К'ижан бажаре кө һун һэр'не у вэ қәбул кьн, чь дайньнэ бэр вэ, бьхвьн. ⁹ Нэхвәшед навда қәнц кьн у ванр'а бежын: «П'адшатийа Хвәде незики вэ буйә». ¹⁰ Ле әв бажаре кө һун һэр'не у вэ қәбул нәкьн, дәрәнэ мәйдана у бежын: ¹¹ «Әм ве т'оза кө жь бажаре вэ ньгед мәва гьртийә жи ль сэр вәда даудьшиньн. Ле ве йәке бьзаньбьн кө П'адшатийа Хвәде незики вэ буйә». ¹² Әз жь вэр'а дыбежьм, Р'ожа^ф Ахрәте һ'але Содоме^ф ве жь йа ви бажари четьр бә.

Бажаред нэбавәр

(Мәтта 11:20-24)

¹³ Вэй ль тә Хоразин! Вэй ль тә Бәйтсайда! Һэгэр әв к'эрәмәтед кө нава вәда бун, Сур у Сайдайеда бьбуна, әванайе зува бь к'өрх^ф нав к'озийеда^ф р'уньшти т'обә бькьрана. ¹⁴ Ле Р'ожа Ахрәте һ'але Сур у Сайдайе ве жь һ'але вэ четьр бә. ¹⁵ У тө Кәфәрнаһум, тә т'ьре те

* 10:4 Аһа те фә'мкьрне: «Р'ева нәсәкьньн, вэки бь сылавдайине вәхте хвэ өнда нәкьн».

h'эта э'змен бьльнд би? Ле те h'эта дийаре^ф мьрийа h'эр'и хваре!

¹⁶ Эве гөһдарийа wэ дькэ, гөһдарийа мьн дькэ у эве wэ т'эхсир дькэ, мьн т'эхсир дькэ, ле эве мьн т'эхсир дькэ, йе кө эз шандьмэ т'эхсир дькэ».

Вэгэр'андьна h'эфте дөда

¹⁷ Эw h'эфте дө шагьрт бь эшq у ша вэгэр'ийан у готьн: «Хөдан, щьн жи сайа наве тэ ельми мэ дьбун». ¹⁸ Эви ванар'а гот: «Мьн Мирещьн дит, чава бьруска жь э'змен жорда к'эти. ¹⁹ Аwa мьн h'өкөм дайэ wэ, кө хун мэр' у дуп'ышка у т'эмамия qэwата дьжмьн п'епэскьн у т'ө тыште зьраре нэдэ wэ. ²⁰ Ле бь we йэке ша нэбьн кө щьн ельми wэ дьбьн, ле ша бьн, кө навед wэ ль э'змана ньвисар э».

Шабуна Иса

(Матта 11:25-27; 13:16-17)

²¹ Wi чахи эw бь P'öh'e Пироз ша бу у гот: «Шькьр наве тэ бэ Баво, Хөдане э'рд у э'зман, кө тэ эв тышт жь зану у билана^ф вэшартьн у ль бэр зар'а вэкьр. Бэле Баво, чьмки аha ль тэ хwэш hat. ²² h'эр тышт жь Баве мьн мьнр'а натийэ дайине. Кэсэк ньзанэ Көр'^ф к'и йэ, пештьри Баве у кэсэк ньзанэ Бав к'и йэ, пештьри Көр' у йед кө Көр' бьхwазэ ванва Баве бьдэ наскьрьне». ²³ У we гаве сэр шагьртед хwэда вэгэр'ийа у ванар'а башqэ гот: «Хwэзи ль ван ч'э'ва, чь кө хун дьбиньн эw жи дьбиньн. ²⁴ Чьмки эз wэр'а дьбежьм, кө гэлэк п'ехэмбэр у п'адша хwэстьн эw тыштед кө хун дьбиньн бьдитана, ле нэдитьн у эw тыштед кө хун дьбьнен бьбьнистана, ле нэбьнистьн».

Мәсәлә самәрийе қәнш

²⁵ Аwa қанунзанәк р'абу әw щер'банд у гот: «Дәрсдар, әз чь бькьм, wәки жийина^ф һ'әта-һ'әтайе бьстиньм?»
²⁶ Әwi жи wir'a гот: «Қанунеда чь ньвисар ә? Тө чава дьхуни?»
²⁷ Әwi ле вәгәр'анд у гот: «Хөдан Хwәдейе хwә һ'ыз бькә, бь т'әмамийа дьле^ф хwә, бь т'әмамийа щанийа хwә, бь т'әмамийа қәwата хwә у бь т'әмамийа һ'ьше хwә*»,
 «һәвалә хwә жи wәкә хwә һ'ыз бькә**». ²⁸ У Иса wir'a гот: «Тә р'аст гот. Өса бькә у те бьжийи». ²⁹ Ле әwi хwәст хwә р'успи кә, Исар'a гот: «һәвалә мьн к'и йә?»
³⁰ Иса ле вәгәр'анд у гот: «Мәрвәк һәбу, әw жь Оршәлиме бәржери Әриһайе дьбу. Әw к'әтә дәсте қачаха у wана әw тә'зи кьр, к'өтан у нивкөшти һьштьн чун. ³¹ Өса қәwьми кә к'аһинәк we р'еда дьһат. Гава әw дит, бәrr'a дәрбаз бу чу. ³² Өса жи йәки леви^ф һат, гьһиштә wi щийи, ль wi ньһер'и, бәrr'a дәрбаз бу чу. ³³ Паше р'евики самәри һат. Гава әw дит, гөне wi ле һат. ³⁴ Әw незики wi бу, бьзьр у шәрав ль бьринед wi хьстьн, п'еч'а у әw дани сәр к'әрк'әдане хwә бьрә меванхане у бона wi хәм кьр. ³⁵ Р'ожа дьне дө зив дәрхьстьн данә хwәйе меванхане у гот: «Хwәйитийе ль ви бькә, тө чь жи сәр wi зедә хәрщ ки, гава әз вәгәр'ийам, әзе ль тә вәгәр'иньм».
³⁶ Ньһа т'әхмина тә, жь wан һәрсека к'ижан бу һәвалә wi мәрвәе кә к'әтә дәсте қачаха?»
³⁷ Әwi жи гот: «Әwe кә гөнә ле ани». Иса wir'a гот: «һәр'ә тө жи өса бькә».

* 10:27 Қануна Дөщари 6:5.

** 10:27 Қануна К'аһинтийе 19:18.

Иса мала Мэрт'а у Мэрийэмеда

³⁸ Чахе р'ек'этгын чун, Иса к'этэ гөндэки. К'өлфэтэк кө наве we Мэрт'а бу эw бьрэ мала хwэ. ³⁹ Хушкэкэ we жи һэбу, наве we Мэрийэм. Эwa бэр ньгед Хөдан р'уньшт'бу у гөһдарийа хэбэред wi дькьр. ⁴⁰ Мэрт'а жи кө гэлэк т'ьвдарэкдитьнева гиро бу, һат сэкьни у Исар'а гот: «Хөдан, қэт хэма тэ нинэ кө хушка мын нава we т'ьвдарэкдитьнеда эз т'эне һышт'мэ? Бежэ we кө али мын бькэ». ⁴¹ Хөдан ле вэгэр'анд у готе: «Мэрт'а, Мэрт'а, тө бона гэлэк тышта хэма дьки у т'эвиһэв дьби. ⁴² Ле т'эне тыштэк лазьм э, эw п'ара қэнц жи Мэрийэме хwэр'а бьжарт у жь we найе стандьне».

Һинкьрьна бона дөакьрьне

(Матта 6:9-13; 7:7-11)

11 ¹ Щарэке Иса щики дөа дькьр, гава хьлаз кьр, жь шагьртед wi йэки жер'а гот: «Хөдан, мэ һини дөакьрьне кэ, чава Йуһ'энна шагьртед хwэ һин кьрьн». ² Эwi ванар'а гот: «Гава һун дөа дькьн, аһа бежьн:

Баво*,

Наве тэ пироз бэ.

П'адшатийа тэ бе**.

³ Нане мэйи р'оже р'ож бь р'ож бьдэ мэ.

⁴ У гөнед мэ бьбахшинэ,

чьмки эм жи дьбахшиньнэ һ'эму дэйндаред хwэ

* 11:2 Нав дэстньвисаред һьнэкада аһа йэ: «Баве мэйи э'змана».

** 11:2 Нав дэстньвисаред һьнэкада аһа йэ: «Э'мьре тэ бэ, чава ль э'змен өса жи ль сэр э'рде».

у мә нәбә щер'ьбандьне*».

⁵ У ванар'а гот: «Жь вә к'ижан э кө достәки ви хәбә у ниве шәве хәр'ә мала ви жер'а бежә: «Досто, се нана дәйни бьдә мьн. ⁶ Чьмки пьсмамәки мьн жь р'е дагәр'ийайә һатийә мала мьн, тыштәки мьни хварьне т'өнә, кө дайнъмә бәр ви. ⁷ У әв жи һьндөр'да ле вәгәр'инә у бежә: «Дәри иди дада йә, әз у зар'ед хвәва жи нава щи-ньвинада нә, зә'мәте нәдә мьн, әз нькарьм р'абьм бьдьмә тә». ⁸ Әз вәр'а дьбежьм, һәгәр әв бона достийе жи р'анәбә нен нәдә ви, ле бона беарзийа ви we р'абә чьқас жер'а лазьм бә бьдә ви. ⁹ Әз вәр'а дьбежьм, бьхвазьн һуне бьстиньн, бьгәр'ьн һуне бьбиньн, дәри хьн we бәр вә вәбә. ¹⁰ Чьмки к'и кө дьхвазә дьстинә, к'и кө дьгәр'ә дьбинә у к'и кө дәри дьхә бәр ви вәдьбә.

¹¹ Жь вә к'ижан э әв бав, кө көр'е ви мә'си бьхвазә, дәвса мә'си мә'р бьде*, ¹² йан жи һеке бьхвазә, дуп'ышке бьде? ¹³ һун кө хьраб ьн, заньн тыштед қәнщ бьдьнә зар'ед хвә, ле Баве ә'змана we чьқас зедә Р'öh'e Пироз бьдә әвед кө жь ви дьхвазьн».

Иса у Бәлзәбул^Ф

(Мәтта 12:22-30; Марқос 3:20-27)

¹⁴ Щарәке Иса щьне лал жь йәки дәрдьхьст, чахе кө щьн дәрк'әт, әви лал хәбәр да у ә'лаләт зәндәгьрти ма. ¹⁵ Ле жь ван һьнәка гот: «Әв бь һ'өкөме Бәлзәбуле^Ф сәрпере щьна щьна дәрдьхә». ¹⁶ һьнәка жи әв дьщер'ьбанд,

* 11:4 Нав дәстньвисаред һьнәкада аһа йә: «Ле мә жь йе хьраб хьлаз кә».

* 11:11 Нав дәстньвисаред һьнәкада аһа йә: «Көр'е ви нан же бьхвазә, кәвьр бьде?»

нишанед э'змен жь ви дьхвэстын. ¹⁷ Ле нетед дьле ван Исава э'йан бун у ванар'а гот: «Һәр п'адшатийа кө нава веда т'ьфақ^ф т'өнэбэ we веран бэ у мала кө бет'ьфақи бьк'эве, эw мал наминэ. ¹⁸ һэгэр Мирещьн нава хwэда бет'ьфақ бэ, п'адшатийа ви we чава бьминэ? Чьмки хун дьбежьн, кө эз бь һ'өкөме Бэлзэбул щьна дэрдьхьм. ¹⁹ У һэгэр эз бь Бэлзэбул щьна дэрдьхьм, ле йед кө пэй wэ тен* бь чь дэрдьхьн? һэгэр өса бэ, эwe wэ ломэк'ар кьн. ²⁰ Ле һэгэр эз бь дәсте Хwэде щьна дэрдьхьм, wэки өса йэ П'адшатийа Хwэде гьһиштийэ wэ. ²¹ Чахе йэки қэват бь ч'эк хwэйитийе мала хwэ дькэ, т'ө тыште ви зьрар ле набэ. ²² Ле гава йэки жь ви қэваттьр бе у ви бьгьрэ, we эw ч'эке кө ви гөмана хwэ дабу сэр же бьстинэ, һэбука ви жи бэла кэ. ²³ К'и кө нэ т'эви мьн э, мьрабьли мьн э у к'и кө т'эви мьн т'оп накэ, бэла дькэ.

Вэгэр'андьна р'өһ'е һ'эрам

(Матта 12:43-45)

²⁴ Чахе р'өһ'е һ'эрам жь мерьв дэрте, щийе бе ав дьгэр'э, кө р'ьһ'этийе бьбинэ у гава набинэ, дьбежэ: «Эз вэгэр'ьмэ we мала хwэйэ кө же дэрк'этьмэ». ²⁵ У гава те, пақьжкьри у һэвдайи дьбинэ. ²⁶ һьнге дьчэ һ'эфт щьнед дьнэ жь хwэ хьрабтьр жи тинэ, дьк'эвьнэ wьр дьжин. У ахьрийа ви мэрьви жь пешийе хьрабтьр дьбэ».

Хwэзьлийа р'аст

²⁷ Чахе Иса һе хэбэр дьда, жь нава э'лалэте к'өлфэтэке дэнге хwэ бьльнд кьр у wir'а гот: «Хwэзи ль ви бэт'ьни, кө тө хwэда хwэйкьри у ван бьстана, кө шир данэ тэ».

* 11:19 Аһа жи те фэ'мкьрьне: «Зар'ед wэ».

28 Ле әми гот: «Һе хвәзи ль ван, йед кӧ хәбәра Хвәде дьбьһен у пек тиньһ».

К'әрәмәтәке чава нишан дьхвазьн

(Мәтта 12:38-42; Марқос 8:12)

29 Чахе ә'лаләт сәр ви дыщвийа, Иса дәстпекьр у гот: «Әва ньсыла хьраб ә, нишанәке дьхвазә, ле жер'а нишанәкә дьн найе дайине пештьри нишана Уньс^ф п'ехәмбәр. 30 Чава Уньс бона Нинәвайа бу нишан, өса жи Кӧр'е Инсан we ви ньсьлир'а бьбә нишан. 31 П'адша Башурә^ф we Р'ожа Ахрәте т'әви мәрьвед ви ньсьли р'абә у ван нәһәқ кә, чьмки әва жь сәре дьне һат, кӧ сәрвахтийа Сьлеман^ф бьбьһе у ва йә йәки жь Сьлеман мәстър ль вьр һәйә. 32 Мәрьвед Нинәвайе Р'ожа Ахрәте we т'әви ви ньсьли р'абьн у ван нәһәқ кьн, чьмки әвана бь даннасинийа Уньс жь гӧнәкьрьне вәгәр'ийан. Ва йә йәки жь Уньс мәстър ль вьр һәйә.

Ч'ьра бәдәне

(Мәтта 5:15; 6:22-23)

33 Кәсәк ч'ьре венахә у данайнә щийе хәвлә, нә жи дькә бьне фьраде, ле датинә сәр п'еч'ьре, wәки әwe кӧ дьк'әвьнә һьндӧр', р'онайе бьбиньн. 34 Ч'ьра бәдәна тә ч'ә'ве тә йә. һәгәр ч'ә'ве тә п'ак ә, т'әмамийа бәдәна тәйе р'онайи бә. Ле һәгәр ч'ә'ве тә хьраб ә, бәдәна тәйе жи тә'ри бә. 35 һаш жь хвә һәбә, дьбә кӧ әw р'онайа нава тәда тә'ри йә. 36 һәгәр т'әмамийа бәдәна тә р'онайи йә у п'арәкә тә'ри т'ӧнә, һ'әмуйе жи р'онайи бә, чава ч'ьра бь шәwqа хвә тә р'онайи дькә».

Иса ферьси у қанунзана нәһәқ дькә*(Мәтта 23:1-36; Марқос 12:38-40; Луҕа 20:45-47)*

³⁷ Гава хәбәр дана хвә хьлаз кьр, йәки ферьси ниви же кьр кә һәр'ә т'әви ви нан бьхвә. Әв жи чу, ль сәр сьфре р'ушьшт. ³⁸ Гава ферьси дит кә әви пешийа нанхварьне ль гора ә'дәте дин дәстед хвә нәшуштьн, зәндәгьрти ма. ³⁹ Ле Хөдан бир'а гот: «Ава һун ферьсийа т'ас у финщана р'уйе дәрвава пақьж дькьн, ле дьле вә һьндөр'ва бь тьмайе у хьрабийава т'ьжи йә. ⁴⁰ Бефә'мно! Әве кә дәрва чекьр, һьндөр' ченәкьр? ⁴¹ Ава бь чьва т'ас у финщанед вә т'ьжи нә, бь ван хвәр'а хера бькьн у һәр тьште вәр'а һ'әлал^ф бә. ⁴² Ле вәй ль вә ферьсийа! һун дәһәке^ф пунге^ф, щә'т'рийе^ф у һ'әму п'ьнщар'а дьдьн, ле һәқийе у һ'ьзкьрьна Хвәде давежьнә пышт гөһе хвә. Вә гәрәке әв йәк бькьрана у дәст жь йед майин нәк'ьшанда. ⁴³ Вәй ль вә ферьсийа, кә һун к'ьништада к'өрсийед пешьн һ'ьз дькьн, базарада жи сылава. ⁴⁴ Вәй ль вә! һун мина т'ьрбед бе нав-нишан ьн, кә мәрвь сәр ван дьгәр'ьн у ньзаньн». ⁴⁵ Жь қанунзана йәки ле вәгәр'анд у гот: «Дәрсдар, тә бь ван хәбәра мә жи беһөрмәт дьки». ⁴⁶ Әви гот: «Вәй ль вә қанунзана жи, чьмки һун баред гьран дьдьнә сәр мьле мәрва, ле т'ьликә хвә жи надьнә ван бара. ⁴⁷ Вәй ль вә, кә һун т'ьрбед ван п'ехәмбәра чедькьн, йед кә кал-бавед вә әв кәштьнә. ⁴⁸ Бь ве йәке һун шә'дәтийа хвә дьдьн, кә һун һавьжийа хвә кьрьнед кал-бавед хвә тиньн. Әвана п'ехәмбәр дькөштьн у һун т'ьрбед ван чедькьн. ⁴⁹ Ләма жи сәрвахтийа Хвәде гот: «Әзе п'ехәмбәр у шандийа бьшиньмә щәм ван, жь ван һьнәка ве бькөжьн, һьнәка жи бьзериньн». ⁵⁰ Бона ве йәке хуна һ'әму п'ехәмбәра, кә жь вәхте ә'фьрандьна дьнийәеда һатийә р'етьне, жь

ви ньсьли we бе хwэстьне, ⁵¹ жь хуна һабил^ф h'эта хуна Зэкэрийа, йа кө нав горигэhe^ф у п'арьстгэheда һатэ р'етьне. Эз р'аст wэр'а дьбежъм, жь ви ньсьли we бе хwэстьне. ⁵² Wэй ль wэ қанунзана, кө wэ к'элига занэбуне һылдайэ. Нэ һун к'этьне у нэ жи wэ һыштийэ йед кө дьхwазьн бык'эвьне». ⁵³ У гава эw р'абу кө һэр'э, қанунзан у ферьси қьлқьлин, бона гэлэк тышта wir'а к'этьнэ дэ'we. ⁵⁴ У бэр дэве wi сэкьни бун, wэки бь хэбэрэке быкарьбьн wi быгьрьн у гөнэк'ар кьн.

Һинкьрьна дэрһэқа дөр'утийеда

12 ¹ Wi чахи, гава бь h'эзара мэри цьвийан, өса кө сэр һэвр'а дэрбаз дьбун, эwi пешийе дэстпекьр шагьртед хwэр'а гот: «h'эвза хwэ жь һэвиртьр'шке^ф ферьсийа быкьн, эз тиньм сэр дөр'утийа ван. ² Тыштэки дьзива т'өнэ кө дэрнэйе у нэ жи вэшарти кө к'ьфш нэбэ. ³ Wэ чь тэ'рийеда готийэ, эwe р'онайеда бе быһистьне у wэ чь ль мале гөһада хэбэр дайэ, эwe сэр бана быбэ дэнги.

Бьзаньбьн кө тьрса wэ жь к'е һэбэ

(Матта 10:28-31)

⁴ Эз wэ пьсмамед хwэр'а дьбежъм, жь wана нэтьрсьн, йед кө бэдэне дькөжьн, жь we пештьр тыштэки дьн нькарьн быкьн. ⁵ Ле эзе wэр'а бежъм, кө һун жь к'е бытьрсьн. Жь wi бытьрсьн, йе кө пэй көштьнер'а жи һ'өкөме wi һэйэ бавежэ щэ'ньме^ф. Бэле, эз wэр'а дьбежъм жь wi бытьрсьн! ⁶ Нэ пенщ ч'ьвик бь дө дьравед чарқөр'уше тенэ фьротане? Ле Хwэде жь ван йэки жи бир накэ. ⁷ Öса жи һэр т'елэки п'ор'ед сэре wэ жьмарти йэ. Нэтьрсьн, һун жь гэлэк ч'ьвика қимэттьр ьн.

Идрар^ф у инк'аркърьна Иса

(*Мәтта 10:32-33; 12:32; 10:19-20*)

⁸ Эз вәр'а дьбежъм, к'и кө бәр мәрва мьн идрар^ф кә, Көр'е Инсан жи we wi бәр мьльак'әтед Хвәде идрар кә. ⁹ У к'и кө мьн бәр мәрва инк'ар кә, әве жи бәр мьльак'әтед Хвәде бе инк'аркърьне. ¹⁰ У к'и кө тыштәки мьқабыли Көр'е Инсан бежә, we бе бахшандьне. Ле к'и кө к'ьфьрийа Р'өһ'е Пироз бькә, ль wi найе бахшандьне. ¹¹ У гава wә бьбьнә к'ьништа йан бәр h'акъм йан сәрwerед h'өкөмәте, һун хәм нәкьн кө һуне чава щаба хвә бьдьн йан чь бежьн. ¹² Чьмки Р'өһ'е Пироз әве дәме we wә һин кә, чь лазьм ә кө һун бежьн».

Дәвләтийе бефә'м

¹³ У жь нав ә'лаләте йәки wir'а гот: «Дәрсдар, бежә бьре мьн, бьра мират'а^ф баве мьн мьнр'а п'арәвәкә». ¹⁴ Әви wir'а гот: «Һәвал, к'е әз сәр wә h'акъм йан жи п'аркър к'ьфш кьрьмә?» ¹⁵ У готә ван: «Һаш жь хвә һәбьн у һ'әвза хвә жь тьмайе бькьн, чьмки ә'мьре инсен һәбука wива гьредаи нинә». ¹⁶ Әви мәсәләк жи wanр'а гот: «Зәвийа мәрвәки дәвләти гәләк бәр да. ¹⁷ У әви дьле хвәда гот: «Эз чава бькьм? Щи жи т'өнә кө дәрәмәта хвә текьме». ¹⁸ У гот: «Әзе аһа бькьм, ә'мбаред хвә һьлшиньм у йед мәзьн чекьм, һ'әму дәрәмәт у һәбука хвә жи бькьмә wьр. ¹⁹ У хвәха хвәр'а бежъм: Ә'вдо! Тә бона хвә т'ера гәләк сала, гәләк һәбук дайә сәр һәв, р'уне бьхвә, вәхвә у ша бә». ²⁰ Ле Хвәде готә wi: «Бефә'мо! Ишәв р'өһ'е тәйе жь тә бе стандьне. Әв һәбука тә бәрәв кьрийә we к'ер'а бьминә?» ²¹ Öса жи we бе сәре һәр кәси, йе кө бона хвә хьзне т'оп дькә у пе Хвәде дәвләти набә».

Һинкърьна дәрһәқа хәмкърьнеда

(Мәтта 6:25-34)

²² У әви шагъртед хвәр'а гот: «Ләма әз вәр'а дьбежъм, бона ә'мьре хвә хәма нәкьн, кө һуне чь бьхвьн, нә жи бона бәдәна хвә, кө һуне чь ль хвә кьн. ²³ Чьмки ә'мьр жь хварьне қимәттър ә у бәдән жи жь к'ьнща. ²⁴ Дина хвә бьдьнә қар'қар'а^ф, нә дьр'әшиньн, нә дьдърун у нә жи ә'мбар йан к'иләрәд ван һәнә, ле Хвәде р'ьсқе ван дьгьһинә. һун чьқаси жь тәйрәда қимәттър ьн. ²⁵ Иди жь вә к'и дькарә бь хәмед хвә дәрәке сәр ә'мьре хвәда зедә кә*? ²⁶ һәгәр һун ви тыште һәри бьч'ук нькарьн бькьн, иди чьма бона тыштед майин хәм дькьн? ²⁷ Дина хвә бьдьнә сосьна, чава шин дьбьн, нә дьхәбьтьн у нә дьр'есьн. Әз вәр'а дьбежъм, кө Сьлеман жи нава т'әмамия we херхьзна хвәда мина жь ван йәке хвә нәкьр. ²⁸ һәгәр гиһайе чоле, кө иро һәйә у сьбе давежьнә нава егьр, Хвәде өса дьхәмьлине, ле чьқас зедә we ль вә кә, кембауәрно? ²⁹ Ль ван тышта нәгәр'ьн, кө һуне чь бьхвьн йан чь вәхвьн. Бәр хвә нәк'әвьн. ³⁰ Чьмки п'утп'арьстед^ф дьнйайе ль пәй ван һ'әму тышта дьк'әвьн, ле Баве вә занә кө һун һ'әвще ван тышта нә. ³¹ Ле бәр вева һун ль П'адшатийа ви бьгәр'ьн у әве вәр'а бенә дайине.

Хьзна ә'змана

(Мәтта 6:19-21)

³² Нәтърсә, кәрийе пези бьч'ук! Чьмки ль Баве вә хвәш һат, кө п'адшатийе бьдә вә. ³³ һәбука хвә бьфьрошьн у хвәр'а хера бькьн. һуне хвәр'а к'иське кө нар'ьзә у хьзна

* 12:25 Аһа жи те фә'мкърьне: «Бьһөстәке ль сәр бәжьна хвә дьреж кә».

әзманайә кө кем набә қазынщ кын. Ль we дәре нә дъзе незик бе у нә жи we бьзузе бьхwә. ³⁴ Чьмки хьзна wә к'идәре бә, дьле wәйе жи ль we дәре бә.

Хөламе һ'ьшйар

(Мәтта 24:45-51)

³⁵ Бьра пышта wә гьредаи у ч'ьред wә вехьсти бьн. ³⁶ һун мина ван мәрьва бьн, йед кө һивийа ахайе хwә нә, кө әwe к'әнге жь дә'wате вәгәр'ә, кө чахе бе дери хә, пер'а-пер'а р'абьн дери вәкьн. ³⁷ Хwәзи ль ван хөлама, кө чахе ахайе ван бе, ван һ'ьшйар бьбинә. Әз р'аст wәр'а дьбежьм, әwe пышта хwә гьредә, ван сәр сьфре бьдә р'уньштандьне у бәрдәстийе ванр'а бькә. ³⁸ У һәгәр ахайе ван ниве шәве йан жи бәрбанга сьбәһе бе у ван өса бьбинә, әw хөламана хwәзьли нә. ³⁹ Ле һун we йәке бьзаньбьн, һәгәр хwәйе мале бьзаньбуйа кө дъзе к'ижан сьһ'әте бьһата, we нәһьшта кө мала wi дәрәвәкьра. ⁴⁰ Аwa һун жи һазьр бьн, чьмки әw сьһ'әта кө дьле wәр'а дәрбаз набә, Көр'е Инсане бе».

Хөламе амьн у хөламе беамьн

⁴¹ Пәтрус гот: «Хөдан, әва мәсәла тә т'әне бона мә гот йан бона һ'әмуйа?» ⁴² Хөдан гот: «К'и йә әw wәк'илхәрщә^ф амьн у сәрwахт, кө ахайе wi, we wi сәр хөламед хwә сәрwер к'ьфш кә, кө wәхтда хwарьна ван бьдә ван. ⁴³ Хwәзи ль wi хөлами, кө чахе ахайе wi бе, әwi өса бьбинә. ⁴⁴ Әз р'аст wәр'а дьбежьм, әwe wi бькә сәрwере т'әмамийа һәбука хwә. ⁴⁵ Ле һәгәр әw хөлам дьле хwәда бежә: «Ахайе мьн һатьна хwә дәрәнги дехә» у дәстпекә ль хөлам у щарийа хә, бьхwә, вәхwә у сәрхwәш бә, ⁴⁶ ахайе wi хөлами we р'ожәкә өса бе, кө әw нә һивийе йә у

сһ'этэкә өса, кө әw нъзанә. We wi қәт-қәти кә у п'ара wi т'әви п'ара беамьна кә. ⁴⁷ У әw хөламе кө хwәстьна ахайе хwә занә у к'аре хwә накә, нә жи ль гора хwәстьна wi дькә, we гәләки бе к'отане. ⁴⁸ Ле әwe кө жь нәзанийа хwә тыштәки нежайи к'отане дькә, we һьндьки бе к'отане. К'ер'а гәләк һатийә дайине, гәләк жи we же бе хwәстьне у к'ер'а гәләк һатийә спартьне^ф, щабдарийа wi жи we гәләк бә.

Иса дьбә сәбәбе щөдәбуне

(Мәтта 10:34-36)

⁴⁹ Эз һатьм, wәки егър бавежьмә сәр дьне у мьн чава дьхwәст wәки иди алав бьда. ⁵⁰ Ле ньхөмандьнәкә мьн һәйә, кө эз гәрәке пе бемә ньхөмандьне у дьле мьн қәт нә р'һ'әт ә һ'әта кө әw бе сери. ⁵¹ Wә т'ьре эз һатьм ә'дьялайийе бьдьмә дьне? Эз wәр'а дьбежьм на, ле бона щөдәбуне. ⁵² Жь вьр шунда маләкеда пенщ мәрьве жь һәв щөдә бьн, сьсе we мьрабьли дөда бьн, дөдө мьрабьли сьсийа. ⁵³ Баве р'абә мьрабьли көр', көр' жи баве, де қизе, қиз жи де, хwәси буке у бук жи хwәсийе».

Нишанед зәмен

(Мәтта 16:2-3; 5:25-26)

⁵⁴ У әwi ә'лаләтер'а жи гот: «Чахе жь р'оавайе ә'wр дәрте, һун дәстхwәда дьбежьн: «Баране бьбарә» у өса жи дьбә. ⁵⁵ У гава байе башуре те, һун дьбежьн: «Һәвайе гәрм бә» у өса дьбә. ⁵⁶ Дөр'уно! һун р'уйе ә'змен ә'нәнә дькьн һәвайе чава бә, ле чава ви зәмани ә'нәнә накьн?

⁵⁷ һун чьма хwәха надьнә ль бәр һ'әсаба, кө к'ижан ә р'аст? ⁵⁸ Чахе нәйаре тә тә к'аши щәм һ'акьм дькә, өса бькә, кө р'ева т'әви wi ль һәв бейи. Нәбә әw тә бьдә

дәсте һ'акъм, һ'акъм жи тә бьдә дәсте сәрәскәр у әw жи тә бавежә кәле. ⁵⁹ Эз тәр'а дьбежъм, тө жь wьр дәрнак'әви һ'әта поле^ф пашьн нәди».

Жь гөнәкьрьне вәгәр'ьн^ф, кө онда нәбын

13 ¹ Wi чахи һьнәк һатьн бона ван щәлилийа Исар'а готьн, хуна к'ижана Пилато т'әви хуна қөрбанед^ф ван кьрбу. ² Иса ль ван вәгәр'анд у гот: «Wә т'ьре әw щәлилийед кө әв йәк һатә сәре ван, жь һ'әму щәлилийед майин гөнәк'артьр бун? ³ Эз wәр'а дьбежъм, на! Ле бәле һәгәр һун жь гөнәкьрьне вәнәгәр'ьн, һун һ'әмује жи р'ожа ванда һәр'ьн. ⁴ Йан жи әw һ'иждәһ мәрвьед кө кәла^ф Силwаме сәр ванда к'әт мьрьн, wә т'ьре әwана жь һ'әму мәрвьед кө Оршәлимеда дьман, гөнәк'артьр бун? ⁵ На! Эз wәр'а дьбежъм, һәгәр һун жь гөнәкьрьне вәнәгәр'ьн, һун һ'әмује жи р'ожа ванда һәр'ьн».

Мәсәла дара һежирейә бе бәр

⁶ Әви әва мәсәла жи гот: «Нава р'әзе^ф тьрийе мәрвәкида дарәкә һежире һәбу. Р'ожәке әw һат, кө сәр we бәр бьгәр'ә, ле нәдит. ⁷ Wi чахи р'әзванр'а гот: «Әва се сал ә әз тем, бәре ве дара һежире дьгәр'ьм, ле набиньм. Әве бьбьр'ә, бадиһәwа^ф чьма щи гьртийә?» ⁸ Р'әзван ле вәгәр'анд у гот: «Аха, исал жи we сәбьр кә. Эзе дора we вәдьм у п'әйн^ф бькьме. ⁹ һәгәр саләкә дьн бәр бьдә, қәнщ ә, ле һәгәр нәдә, паше бьбьр'ә».

Р'ожа шәмийе қәнщкьрьна к'өлфәта қонщьки

¹⁰ Р'ожәкә шәмийе Иса к'ьништәкеда һин дькьр. ¹¹ Ль wьр к'өлфәтәкә қонщьки һәбу, кө һ'иждәһ салед we бу, р'öh'e нәхwәшийе пер'а бу. Әwe қәт нькарьбу хwә р'аст

кыра. ¹² Гава Иса эw дит, гази we кър у готе: «Э'вде! Тö жь нэхwэшийа хwэ аза йи!» ¹³ У эwi дэстед хwэ данин сэр we, эw пер'а-пер'а р'аст бу у шыкьри дыда Хwэде. ¹⁴ Ле сэрwере к'ьниште һерс к'эт, кө Иса р'ожа шәмийе нэхwэш қәнщ кър у э'лаләтер'а гот: «Шэш р'ож бона шыхөлкьрьне һәнә, һун нава ван р'ожада дыкарьн бен қәнщ бьн, нә кө р'ожа шәмийе». ¹⁵ Хөдан ле вэгәр'анд у готе: «Дөр'уно! Жь wә к'ижан р'ожа шәмийе гайе хwэ йан к'эра хwэ жь афьр' вәнакә у набә сэр аве? ¹⁶ Нә эва жи қиза Бьраһим ә, кө һ'иждәһ салед we бу, Мирещьн эw гьредабу. Нә лазьм бу кө эw р'ожа шәмийе жь we қәйде вәбуйа?» ¹⁷ У гава әв йәк гот, һ'әмуйед кө мьрабьли wi бун шәрми ман. У т'эмамыйа э'лаләте бона ван к'эрәмәтед wийә р'умәти кө wi дыкьрьн ша дыбу.

Дө мәсәлед ль сэр П'адшатийа Хwэде

(*Мәтта 13:31-33; Марқос 4:30-32*)

¹⁸ Пәйр'а Иса гот: «П'адшатийа Хwэде мина чь йә? У эз we һьмбәри чь кьм? ¹⁹ Эw мина һ'эбәкә т'охьме хәрдале йә, кө мәрвәки һьлда бахче хwәда чанд. У гава эw мэзьн бу, бу дар, тәйрәдед ә'змен һелинед хwә сэр ч'ьрьлед we чекьрьн».

²⁰ Эwi диса гот: «Эз П'адшатийа Хwэде һьмбәри чь кьм? ²¹ Эw мина һәвиртьр'шк ә, кө к'өлфәтәке һьлда нава се код* арда стьра, һ'эта кө һ'әму һьлат».

* 13:21 Се кодед шьһуйа^Ф дыкьр қаси 25 килограма.

Дәре тәнг

(Мәтта 7:13-14, 21-23)

²² Иса гөнд у бажарар'а дәрбаз дьбу, һин дькър у бәрбь Оршәлиме дьчу. ²³ Йәки wir'a гот: «Хөдан, гәло һндьк ьн, әвед кө we хьлаз бьн?» Әви ванр'а гот: ²⁴ «Бьцә'диньн, кө һун дәре тәнгр'а бьк'әвьнә һндөр', чьмки эз wәр'a дьбежьм, гәләке бьхвазьн бьк'әвьне у we нькарьбьн. ²⁵ У пәйр'а, кө хвәйе мале р'абә дәри бьгрә, һнге һуне дәрва бьминьн у дәри хьн бежьн: «Әм хөлам, дәри ль мә вәкә». Әве ль wә вәгәр'инә у бежә: «Эз ньзаньм һун жь к'ө нә». ²⁶ һнге һуне бежьн: «Мә т'әви тә хвар, вәхвар у тә к'учед мәда һин дькър». ²⁷ Ле әве бежә: «Эз wәр'a дьбежьм, эз ньзаньм кө һун жь к'ө нә. Жь мьн дур к'әвьн, һун һ'әмуйед кө нәһәқийе дькьн!» ²⁸ Ль wьр we бьбә гьри у ч'ьркә-ч'ьрка дьрана, гава һун Бьраһим, Ишақ, Ақуб у һ'әму п'ехәмбәра П'адшатийа Хвәдеда бьбиньн, хвә жи дәрва авити. ²⁹ У we жь р'оһьлат-р'оавайе у бакөр^ф-башуре бен, П'адшатийа Хвәдеда сәр сьфре р'унен. ³⁰ Аwa һнәкед паш we бьбьнә пеш у һнәкед пеш we бьбьнә паш».

Иса ль сәр Оршәлиме дьловинә

(Мәтта 23:37-39)

³¹ We дәме чәнд ферьси һатьн у wir'a готьн: «Р'абә жь wьр һәр'ә, чьмки һеродәс дьхвазә тә бькөжә». ³² У әви ванр'а гот: «Һәр'ьн wi р'увийир'а бежьн, кө эз иро, сьбе щьна дәрдьхьм, нәхwәша қәнц дькьм у р'ожа сьсийа эзе бьгьһижьмә мәрәме хвә. ³³ Ле гәрәке эз иро, сьбе, дөсьбә р'ийа хвәда һәр'ьм, чьмки набә кө п'ехәмбәрәк жь Оршәлиме дәр өнда бә. ³⁴ Оршәлим! Оршәлим! Тә

кө п'ехәмбәр дькөштүн у шандийед щәм хвә дьданә бәр кәвҫра. Чәнд щара мьн хвәст кө зар'ед тә օса быщыванда, чава мьришк щущукед хвә бьн баскед хвәда дьщывинә, ле тә нәхвәст! ³⁵ Ава мала тә we хьрабә бьминә. Эз вәр'а дьбежым, иди һун мьн набиньн, һ'эта кө һун бежын: «Бьмбарәк ә әwe кө бь наве Хөдан те*».

Иса ль мала ферьсида нәхвәшәки қәнщ дькә

14 ¹ Р'ожәкә шәмийе Иса бона нанхварьне чу мала сәрверәки ферьсийа. Вана ч'ә'ве хвә жь сәр ви нәдьбьр'и. ² У пешбәри ви мәрвьәки бь нәхвәшийа авзе^Ф һәбу. ³ Иса жь қанунзан у ферьсийа пьрси у гот: «Р'ожа шәмийе қәнщкьрын щайиз ә йан на?» ⁴ Вана дәнге хвә нәкьр. һынге әви нәхвәш гьрт, қәнщ кьр у вәр'екьр. ⁵ Паше әви ванр'а гот: «Жь вә к'ижан ә, һәгәр көр'е* ви йан гәйе ви бьк'әвә бире, р'ожа шәмийе пер'а-пер'а дәст нәвеже дәрнәхә?» ⁶ Нькарьбун щаба ве пьрса ви бьдана.

Һинкьрна дәрһәқа йед кө ль наве хвә дьгәр'ьн

⁷ У гава әви дит, вәки мәрвьед т'әглифкьри чава хвә щийе жорьн дьгьртүн, мәсәләк ванр'а гот: ⁸ «Гава йәк тә гази дә'wате дькә, щийе жорьн р'унәни, нәбә кө йәки жь тә қәдьртьр жи алийе вида т'әглифкьри бә, ⁹ у хвәйе дә'wате бе тәр'а бежә: «К'әрәма хвә щи бьдә фьлан кәсе». һынге те жь шәрма хвә р'аби щийе жерьн р'унейи. ¹⁰ Ле чахе тә т'әглиф дькьн, һәр'ә щийе жерьн р'уне, кө чахе хвәйе дә'wате бе тәр'а бежә: «К'әрәм кә, дәрбази жоре бә!» һынге қәдье тәйе бәр ч'ә'ве һ'әму р'уныштийа бьльнд бә.

* 13:35 Зәбур 118:26.

* 14:5 Нав дәстньвисаред һьнәкада аһа йә: «К'әр».

¹¹ Чъмки к'и кө хвә бьльнд бьгьрә, we ньмьз бә у к'и кө хвә ньмьз бьгьрә, we бьльнд бә».

¹² У Иса т'эглифкьрийе хвәр'а гот: «Чахе тө фьравине йан шиве датини, гази һәвал-һогьр, бьра-пьсмам йан жи щинаред хвәйә дәвләти нәкә, нәбә әв жи тә т'эглиф кьн у қәнщия тә ль тә вәгәр'иньн. ¹³ Ле гава тө хварьнәке датини, гази фәқир, сәқәт, йед дькөльн у кора кә. ¹⁴ һьнге те хвәзьи би, чъмки әвана нькарьн қәнщия тә ль тә вәгәр'иньн, ле бәле Р'ожа^ф Р'абуна р'астайә жь мьрьне we ль тә бе вәгәр'андьне».

Мәсәла шайийа гьран

(Мәтта 22:1-10)

¹⁵ Гава жь һазьра йәки әв йәк бьһист, вир'а гот: «Хвәзи ль ви, кө П'адшатийа Хвәдеда нен бьхвә». ¹⁶ Ле Иса вир'а гот: «Мәрвьәки шайикә гьран һазьр кьр у гәләк мәри т'эглиф кьрьн. ¹⁷ Гава вәхте шайийе пер'а гьһишт, әви хөламе хвә шанд, кө һ'әму т'эглифкьрийар'а бежә: «Һәр тьшт иди һазьр ә, к'әрәм кьн вәрьн». ¹⁸ Ле һәр йәки мә'ник гьрт. Йе пешьн вир'а гот: «Мьн хвәр'а ә'рд к'ьр'ийә, әз ә'сәйи гәрәке һәр'ьм бьбиньм. Әз һиви жь тә дькьм, мьн бьбахшинә». ¹⁹ У йе дьн гот: «Мьн пенщ щот га к'ьр'инә, әз дьчьм кө ван быщер'ьбиньм. Әз һиви жь тә дькьм, мьн бьбахшинә». ²⁰ Йе сьсийа жи гот: «Әз зәвьщимә, ләма нькарьм бем». ²¹ У әв хөлам вәгәр'ийа һат, әв һ'әму ахайе хвәр'а гьли кьрьн. һьнге аха һерс к'әт, хөламе хвәр'а гот: «Зу һәр'ә мәйдан у к'учед бажер, фәқира, қопа, сәқәта у кора т'оп кә бинә вьр». ²² Пәйр'а хөлем готе: «Ахайе мьн, тә чава ә'мьр кьр, мьн өса жи кьр, ле диса щи һәйә». ²³ У ахе хөлемп'а гот: «Дәрк'әвә сәре р'е у дьрба, зоре ль һәр кәси бькә бинә вьр, кө мала мьн т'ьжи бә. ²⁴ Ава әз

wәр'a дьбежъм, кӧ жь ван мәрвевд т'эглифкьри т'ӧ кэс жь шайийа мьн we тыштэки тэ'м нэкэ».

Чава бьбьнэ шагьрте Иса

(Матта 10:37-38)

²⁵ Пэй ве йәкер'a ә'лаләтәкә гьран т'әви Иса дьчу у әв сәр ванда вәгәр'ийа у гот: ²⁶ «Һәгәр йәк пэй мьн бе у мьн жь де у баве хwә, жь жьн у зар'ед хwә, жь хушк у бьрайед хwә у өса жи жь хwә зә'фтьр һ'ыз нәкә, нькарә бьбә шагьрте мьн. ²⁷ У к'и кӧ хаче хwә һьлнәдә пэй мьн нәйе, әв нькарә бьбә шагьрте мьн. ²⁸ Жь wә к'ижан ә, кӧ бьхwазә бьльндщикә нобәдара чекә, пешийе р'унәни нәдә бәр һ'әсеб, гәло қәwата вийе бьгьһиже бинә сери^ф йан на? ²⁹ Нәбә кӧ һ'име we дайнә у нькарьбә бинә сери, йед кӧ бьбиньн ле бьк'әнньн ³⁰ у бежьн: «Әви мәрви дәстпекьр чекә у нькарьбу банийа сери». ³¹ Йан жи к'ижан п'адша п'адшакир'a дәре шер', пешийе нәшеwьрә, гәло we бькарьбә бь дәһә һ'әзара бәр бист һ'әзаре кӧ тенә сәр wi, бькә шәр'? ³² Һәгәр әв пе нькарә, гава һе дур ә we қасьде хwә бышинә, бона льһәвһатьне һиви же бькә. ³³ Аwа жь wә һәр кәс, к'и кӧ дәсте хwә жь т'әмамийа һәбуна хwә нәк'ьшинә, әв нькарә бьбә шагьрте мьн.

Хвейа бе тә'м

(Матта 5:13; Марқос 9:50)

³⁴ Хwe тыштэки қәнщ ә. Ле һәгәр әв тә'ма хwә онда кә, паше әве бь чь тә'ме бьстинә? ³⁵ Нә we дәwса хwәлийе бьгьрә у нә жи дәwса п'әйн. We бавежьнә weда. Гӧһе к'ейи бьһистьне һәйә бьра бьбьһе».

Пәза өндабуи

(Мәтта 18:12-14)

15 ¹ Аwa һ'әму хәрщгър у гөнәк'ар незики ви дьбун, кө гөһе хwә бьдана сәр готьнед ви. ² Ле ферьси у қанунзана бина хwә тәнг дькър у дьготьн: «Әва гөнәк'ара қәбул дькә у т'әви ван нан дьхwә». ³ У Иса әва мәсәла ванр'а гот: ⁴ «Жь wә к'и йә әw мәри, кө сәд пәзед ви һәбьн у гава йәки жь ван өнда кә, нод нәһа чол у бәста нәһелә у пәй йа өндабуи нәк'әвә, һ'әта кө we бьбинә? ⁵ У гава бьбинә, we жь шабуна дайнә сәр мьле хwә, ⁶ вәгәр'ә мале, гази дәр у щинара кә у ванр'а бежә: «Т'әви мьн ша бьн! Мьн пәза хwәйә өндабуи дит». ⁷ Әз wәр'а дьбежьм, өса жи ль ә'змен бона гөнәк'арәки кө т'обә дькә, һе we бьбә шабунәкә мәзьн, нә кө бона нод нәһед р'аст, к'ижанар'а т'обәкърьн нә һ'әwщә йә.

Зиве өндабуи

⁸ Йан к'ижан ә әw к'өлфәта кө дәһә зивед we һәбьн у гава йәки жь ван өнда кә, we ч'ьре венәхә, мале гези нәкә у қәнщ ле нагәр'ә, һ'әта кө зиве хwә бьбинә? ⁹ У чахе әw бьбинә, we гази дәр у щинара кә у ванр'а бежә: «Т'әви мьн ша бьн! Мьн зиве хwәйи өндакьри дит». ¹⁰ Әз wәр'а дьбежьм, өса жи мьльйак'әтед Хwәде бона гөнәк'арәки кө т'обә дькә, ша дьбьн».

Көр'е өндабуи у бьре ви

¹¹ У Иса гот: «Дө көр'е мәрвьәки һәбун. ¹² Йе бьч'ук готә баве хwә: «Баво, жь һәбука хwә чь кө п'ара мьн дьк'әвә, бьдә мьн». У әви ванар'а һәбук п'арәвәкър. ¹³ Пәй чәнд р'ожар'а көр'е бьч'ук һәр тыште хwә т'оп кър чу wәлатәки

дур. Ль вьр эви э'мьре толтийе дэрбаз кьр, h'эму һэбука хвэ п'уч' кьр. ¹⁴ У гава тыштэк дестда нэма, ви вэлатида жи бу хэлайикэ мэзын у эв к'этэ h'алэки гьран. ¹⁵ Чу хвэ ль бажарванэки ви вэлати гьрт у эви эв шандэ к'эвшен бэр бэраза. ¹⁶ Эв h'эвщэ бу кө зьке хвэ бь ван хьрнуфед^ф кө бэраза дьхвар т'ер бькьра, ле кэсэки эв жи нэдьда ви. ¹⁷ Ле гава эв сэр h'ьше хвэда хат, гот: «Чьқас п'алэ мала баве мында һэнэ, кө нан дьхвьн у бэр ван дьминэ, ле эз вьра бьр'чина дьмьрм. ¹⁸ Эз р'абьм һэр'ьмэ щэм баве хвэ у вьр'а бежым: Баво, мын бэр тэ у э'змен гөнэ кьр. ¹⁹ Эз иди нэ һежайи көр'тийа тэ мэ. Т'эне мина п'алэки хвэ мын қэбул кэ». ²⁰ У р'абу хатэ щэм баве хвэ. Ле гава һе дурва баве эв дит, дьле ви сэр шэвьти, бэрбь ви бэзи, эв h'эмез кьр у р'амуса. ²¹ Көр' жер'а гот: «Баво, мын бэр тэ у э'змен гөнэ кьр. Эз иди нэ һежайи көр'тийа тэ мэ». ²² Ле баве хөламед хвэр'а гот: «Зу бькьн, чөхе лапи р'ьнд биньн ле кьн, гөстиле текьнэ т'ьлийе у сола жи бькьнэ ньга. ²³ Щанэгайе дэрмаликьри биньн, сэржекьн, эм бьхвьн у ша бьн. ²⁴ Чьмки эв көр'е мын мьри бу, сах бу, ондабуийи бу, хатэ дитьне». У дэст бь шайийе кьрын.

²⁵ Ви чахи көр'е вийи мэзын ль к'эвшен бу. Гава хат незики мале бу, дэнге стьран у р'эқасе бьхист. ²⁶ Эви гази жь хөлама йэки кьр у же пьрси: «Эв чь h'эвал э?» ²⁷ Хөлем вьр'а гот: «Бьре тэ хатийэ, баве тэ щанэгайе дэрмаликьри сэржекьрийэ, чьмки эв сах у сыламэт вэгэр'ийайэ». ²⁸ Бьра һерс к'эт у нэхвэст кө һэр'э һьндөр'. Бав дэрк'этэ дэрва, лава ви кьр. ²⁹ Эви ль баве хвэ вэгэр'анд у гот: «Эва чэндьк-чэнд салед мын э кө эз тэр'а хөламтийе дькьм у жь гөр'а тэ дэрнэк'этымэ, тэ карэк жи нэдайэ мын кө мын т'эви һэвал-һогьред хвэ к'еф бькьра. ³⁰ Ле гава эв көр'е тэийи кө һэбука тэ бьр, т'эви қава^ф п'уч' кьр хат, тэ бона

«и шанәгайе дәрмаликьри сәржекьр». ³¹ Баве жер'а гот: «Лаво, тө һәр гав т'эви мьн и у һ'әму һәбука мьн йа тә йә. ³² Гәрәке әм әшқ у ша бьн, чьмки әв бьре тә мьри бу, сах бу у ондабуйи бу, һатә дитьне»».

Вәк'илхәрщә^ф беамьн, ле сәрвахт

16 ¹ Иса шагьртед хвәр'а гот: «Мәрвьәки дәвләти һәбу, вәк'илхәрщәки ви һәбу. Р'ожәке гьли гьһиштә ви, йанчийә^ф вәк'илхәрщә ви һәбука ви п'уч' дькә. ² Әви жи гази ви кьр у готе: «Әв чь йәк ә кә әз бона тә дьбьһем? һәқ-һ'әсабе вәк'илхәрщтийа хвә бьдә, чьмки иди тө һькари вәк'илхәрщтийе бьки». ³ Вәк'илхәрщ дьле хвәда гот: «Әз чь бькьм? Ахайе мьн жь вәк'илхәрщтийе мьн дәрдьхә, ә'рдк'олан ль мьн набә, жь п'арскьрьне жи шәрм дькьм. ⁴ Әз заньм әзе ньһа чь бькьм, кә малед хвәда мьн қәбул кьн, гава әз жь вәк'илхәрщтийе дәрк'әвьм». ⁵ Әви йәк-йәк гази дәйндаред ахайе хвә кьр у йе пешьнр'а гот: «Тө чьқаси дәйндаре ахайе мьн и?» ⁶ Әви гот: «Сәд к'уп* бьзьре зәйт'уне» у вир'а гот: «Һан һьвисара хвә һьлдә у зу р'уне бьньвисә пенщи». ⁷ Паше йе дьнр'а гот: «Тө чьқаси дәйндар и?» Әви жи гот: «Сәд ч'әл* гәньм» у вир'а гот: «Һан һьвисара хвә һьлдә у бьньвисә һ'әйште». ⁸ У аха пәсьне вәк'илхәрщә беамьн да, вәки әви бь ақьли кьр, чьмки мәрвьед ве дьне һьндава хвәда жь мәрвьед р'онайе сәрвахттьр ьн. ⁹ Әз вәр'а дьбежьм, һун бь һәбука нәр'аст һәвала хвәр'а дәст хьн у гава һәбук кем бә, вә бьн коне һ'әта-һ'әтайеда қәбул кьн. ¹⁰ Әве кә нава тьштед һьндькида амьн ә, нава тьштед гәләкида

* 16:6 К'упәки щьһуйа қаси 35 литьр ав һьлдьда.

* 16:7 Ч'әләкә щьһуйа қаси һ'әвзәки 390 литьри бу.

жи амьн э, ле эве кӧ нава тыштед һындькида беамьн э, нава тыштед гэлэкида жи беамьн э. ¹¹ һэгэр һун нава ве һэбука нэр'астда беамьн бун, к'е we һэбука р'аст бьдэ wэ? ¹² һэгэр һун нав тыште йе хэрибда амьн нибын, йа wэ к'е we бьдэ wэ? ¹³ Хӧламэк нькарэ дӧ ахар'а хӧламтийе бькэ, чьмки йан we һ'иле wi жь йэки һэр'э у йе дыне һ'ыз бькэ, йан жи we қэдьре йэки бьгьрэ у йе дыне беһӧрмэт кэ. һун нькарьн һын Хwэдер'а, һын жи һэбукер'а хӧламтийе бькьн».

Қанун у П'адшатийа Хwэде

(*Матта 11:12-13; 5:31-32; Марқос 10:11-12*)

¹⁴ Гава ферьсийа эв һ'эму тышт бьһистьн, қәрфе хwэ ль Иса дькьрын, чьмки п'эрэһ'ыз бун. ¹⁵ Иса ванр'а гот: «Һун хwэ бэр мэрьва р'успи дькьн, ле Хwэде дьле wэ занэ, чьмки эw тыште нав мэрьвада хwэйиқэдьр э, эw ль бэр Хwэде һ'эрам^ф э. ¹⁶ Зэмане Қанун у п'ехэмбэра һ'эта Йуһ'энна к'ьшанд, жь wьр шунда П'адшатийа Хwэде те даннасинкьрыне у һэр кэс дьщэ'динэ бь қэwате бьк'эwэ wьр. ¹⁷ Ле эрд у эзмане he р'ьһ'эт дэрбаз бьн, нэ кӧ жь Қануне ноктэк онда бэ. ¹⁸ К'и кӧ жьна хwэ бэр'дэ у йэкэ дьн бьстинэ, зьнек'арийе дькэ. У к'и кӧ йа мербэр'даийи дьстинэ, зьнек'арийе дькэ.

Мэрьве дэwлэти у Лазаре фэқир

¹⁹ Мэрьвэки дэwлэти һэбу, кӧ к'ьнще р'эwш у назьк* ль хwэ дькьр у һэр р'ож бь эшқ-ша к'еф дькьр. ²⁰ Мэрьвэки фэқир жи һэбу, наве wi Лазар. Эw нава п'ьзькед п'исда

* 16:19 Бь йунани хэбэр бь хэбэр аһа йэ: «К'ьнще ширк у к'ьтане хас», кӧ һынге гэлэки бьһа бун.

бәр дәрә йе дәвләти к'әти бу. ²¹ У ч'әве ви бәрмайийе сьфра дәвләтида дьма, кә дьхвәст кәрме хвә пе бышкенанда. Сә жи дьһатьн, бьринед ви даластьн. ²² Р'ож һат фәқир мьр, мьляак'әта әв бьрьнә щәм Бьраһим. Йе дәвләти жи мьр, дәфьн кьрьн. ²³ Гава йе дәвләти дийаре мьрийада щәфа дьк'ьшанд, сәре хвә бьльнд кьр, жь дурва Бьраһим дит у Лазар һ'әмезеда. ²⁴ Әви дәнг даје у готе: «Баве Бьраһим, ль мьн вәрә р'әме. Лазар бьшинә, кә сәре т'ьлийа хвә аведа кә бинә заре мьн шьл кә, чьмки әз к'ура ви агьрида дьшәвьтм». ²⁵ Ле Бьраһим готе: «Лаво! Бинә бира хвә, кә тә қәнщийед п'ара хвә нав зәмане ә'мьре хвәда стандьнә, ле Лазар зәлули к'ьшандийә. Ньһа жи дьле ви ль вьр р'ьһ'әт ә, ле тә нава щәфада йи. ²⁶ У пештьри ве йәке жи, гәлики бебьни нава мә у вәда һәйә. Нә йе вьр дькарьн дәрбази щәм вә бьн, нә жи йе вьр дькарьн дәрбази щәм мә бьн». ²⁷ һьнге әви готе: «Баво, вәки өса йә, әз һиви жь тә дькьм, тә әви бьшинә мала баве мьн, ²⁸ чьмки пенщ бьрайед мьн жи һәнә, бьра һәр'ә т'әмийе бьдә ван, вәки әв жи нәйенә ви щийе щәфа». ²⁹ Ле Бьраһим готе: «Муса у п'ехәмбәрәд ван һәнә. Бьра гөһдарийа ван бькьн». ³⁰ Әви жи гот: «На, баве Бьраһим, һәгәр жь мьрийа йәк һәр'ә щәм ван, we жь гөнәкьрьне вәгәр'ьн». ³¹ һьнге Бьраһим вьр'а гот: «Һәгәр гөһдарийа Муса у п'ехәмбәра накьн, йәк жь мьрийа р'абә жи, дьса әвана бавәр накьн»».

**Чәнд готьнед Иса дәрһәқа гөнәкьрьне, бахшандьне,
бавәркьрьне у борщдаинедә**

(Мәтта 18:6-7, 21-22; Марқос 9:42)

17 ¹ Иса шагьртед хвәр'а гот: «Набә кә сәбәбийа жьр'ек'әтьне т'өнәбә, ле вәй ль ви, кә бьбә сәбәбе

ве йәке. ²Wir'a he қәнщ ә, кө бәрәшәк стуйе шива бе гьредан у авитьне нава бә'ре, нә кө жь ванед бьч'ук йәки жь р'е дәрхә. ³Һаш жь хвә һәбьн! һәгәр бьре тә гөна бькә, ле һьле, һәгәр сәр кьрьна хвә п'ошман бә, ши бьбахшинә. ⁴У һәгәр нава р'ожеда һ'әфт щара нәһәқийе ль тә бькә у вәгәр'ә, тәр'а бежә: «Эз т'обә дькьм», ши бьбахшинә».

⁵Шандийа Хөданр'а гот: «Бавәрийа мә зедә кә». ⁶Хөдан гот: «Һәгәр бавәрийа вә вәкә һ'әбәкә т'охьме хәрдале һәбә у ве дара т'утер'а бежьн: «Жь вьр р'абә у бә'реда дач'ькә», әве йа вә бькә.

⁷Жь вә к'ижан ә, әве кө хөламәки шийи щотк'ар йан шьван һәбә, гава әв жь к'әвшен бе, шир'а бежә: «Бьлэзинә к'әрәм кә сәр сьфре»? ⁸We пешийе жер'а нәбежә: «Пьшта хвә гьредә, шива мьн һазьр кә у бәрдәстийе мьнр'а бькә. Эз бьхвьм у вәхвьм, паше жи тә бьхвә у вәхвә»? ⁹Гәло бона әв тыштед кө хөлепр'а һатьнә ә'мьркьрьне у ши кьрьнә, ахайе ши ве жер'а бежә: «Зә'ф р'ази мә»? ¹⁰Оса жи һун, гава әв һ'әму тыштед кө вәр'а һатьнә ә'мьркьрьне бькьн, бежьн: «Әм хөламед бекер ьн. Чь кө ль мә дьк'әт, мә әв кьр»».

Қәнщкьрьна дәһә к'отийа

¹¹Гава Иса бәрбь Оршәлиме дьчу, нава Самәрийае у Щәлилер'а дәрбаз дьбу. ¹²Чахе әв дьк'әтә гөндәки, дәһә мәрвьед к'оти р'асти ши һатьн дур сәкьнин ¹³у бь дәнгәки бьльнд готьне: «Исайе мамоста, ль мә вәрә р'ә'ме». ¹⁴У гава Иса әв дитьн, ванр'а гот: «Һәр'ьн хвә нишани к'аһина кьн». У чахе әв һе дьчун, пақьж бун. ¹⁵Ле гава жь ван йәки дит кө әв пақьж буйә, пашда вәгәр'ийа, бь дәнгәки бьльнд шькьри дьда Хвәде. ¹⁶Әши хвә дәвәр'у авитә бәр ньгед Иса у р'азибун дьда ши. Әв самәри бу.

¹⁷ Ынгe Иса гот: «Нә һәр дәһә жи пақьж бун, ле к'ане нә һәр нәһед дьн? ¹⁸ Чьма пештьри эви мәрьве хәриб кәсәк жь ван вәнәгәр'ийа, кө бьһата шькьри бьда Хвәде?» ¹⁹ У бир'а гот: «Р'абә һәр'ә. Бавәрийа тә тө қәнщ кьри».

Һатьна П'адшатийа Хвәде

(Матта 24:23-28, 37-41)

²⁰ Гава ферьсийа жь Иса пьрси, П'адшатийа Хвәде we к'әнге бе, эви ль ван вәгәр'анд у гот: «П'адшатийа Хвәде ашкәрә найе. ²¹ Нә жи we бежьн: «Ва йә вьр ә!» йан жи: «We дәра һан ә!» Чьмки П'адшатийа Хвәде нава wәда йә». ²² У шагьртед хвәр'а гот: «We р'оже бен, кө һуне һ'ьзрәта р'ожәкә Көр'е Инсан бьн, ле набиньн. ²³ У һәгәр вәр'а бежьн: «Ва йә вьр ә!» йан: «Дәра һан ә!» пәй нәк'әвьн нәчьн. ²⁴ Чьмки чава бьруск жь алики ә'змен бьрқ дьдә у т'әмаийа ә'змен р'онайи дькә, р'ожа Көр'е Инсан жи we өса бә. ²⁵ Ле пешийе гәрәке әw гәләки щәфа бьк'ьшинә у жь ви мьләти бе т'әхсиркьрьне. ²⁶ Чава р'ожед Нөһда дьқәwьмин, өса жи we р'ожед Көр'е Инсанда бьқәwьмын. ²⁷ Ынгe дьхварьн, вәдьхварьн, дьзәwьщин у мер дькьрьн, һ'әта we р'ожа кө Нөһ к'әтә гәмийе, лейи р'абу қьр'а һ'әмуйа ани. ²⁸ У өса жи чава р'ожед Лутда^Ф бун, дьхварьн, вәдьхварьн, дьк'ьр'ин, дьфьротьн, дьр'әшандьн у чедькьрьн. ²⁹ Ле әw р'ожа кө Лут жь Содоме дәрк'әт, агьр у к'ьрк'ут^Ф жь ә'змен бари, қьр'а һ'әмуйа ани. ³⁰ Әw р'оже жи we өса бә, гава Көр'е Инсан к'ьфш бә.

³¹ We р'оже к'и сәр хени йә у һәбука wi жи малда йә, бьра жорда нәйе, кө тыштәки һьлдә у әwe ль к'әwшен ә, бьра пашда вәнәгәр'ә. ³² Жьна Лут биньнә бира хвә. ³³ К'и кө дьхвәзә ә'мьре хвә хьлаз кә, we өнда кә, ле к'и

кө ә'мьре хwә онда кә, we хьлаз кә. ³⁴ Әз wәр'a дьбежъм, we шәве һәгәр дө мәри ньвинәкеда бьн, йәке бе һьлдане, йәке бе һьштъне. ³⁵ У һәгәр дө к'өлфәт сәр дәстар'әки бьн, йәке бе һьлдане у йа дьн бе һьштъне».* ³⁷ Wана ле вәгәр'анд у гот: «Хөдан, әве ль к'идәре бьбә?» Әви жь ванр'a гот: «Бәрәт'ә^ф ль к'ө һәбә, тәйре жи ль wьр бьщвьн».

Мәсәлә жьнәбийе у һ'акъм

18 ¹ Иса мәсәләк жи бона we йәке шагьртар'a гот, wәки һәр гав дөа бькьн у ащьз нәбьн ² у гот: «Бажарәкида һ'акъмәк һәбу, әw нә жь Хwәде дьтьрсийа у нә жи жь мәрьва шәрм дькьр. ³ Wi бажарида жьнәбик жи һәбу, һәр гав дьһатә щәм wi у дьгот: «Һәқийе бькә, мьн жь дәсте нәйаре мьн хьлаз кә». ⁴ H'акъм гәләк wәхт гөһ нәдыда we, ле паше хwәха хwәр'a гот: «Әз жь Хwәде натьрсъм у жь мәрьва жи шәрм накъм, ⁵ ле бона хатьре we йәке, кө әва жьнәбийа те зә'мәте дьдә мьн, әзе һәқийе жер'a бькъм, кө һәр гав нәйе мьн ащьз нәкә»». ⁶ У Хөдан гот: «Бьбьһен кө һ'акъме нәр'аст чь гот. ⁷ Гәло Хwәде жи бьжартийед хwәр'a we һәқийе нәкә, йед кө шәв у р'ож һәwара хwә wi датиньн? Йан әwe щаба ван дәрәнги бехә? ⁸ Әз wәр'a дьбежъм, we дәстхwәда һәқийе бькә. Ле гава Көр'e^ф Инсан бе, гәло сәр дьне we бawәрийе бьбинә?»

Мәсәлә ферьси у хәрщгьр

⁹ Әв мәсәлә жи ванр'a гот, йед кө хwәха хwәда гөман бун, йанчийә әwә р'аст ьн у һ'әмуйед майин бәр тыштәки

* 17:35 Нав дәстньвисаред һьнәкада р'еза 36-а жи һәйә: «У һәгәр дө мәрвь ль к'әwшен бьн, йәке бе һьлдане у йе дьне бе һьштъне».

h'эсаб нэдъкърн. ¹⁰ «Дө мәри һылк'ышийанэ п'арыстгәһе, кө дөа бькн. Йэк ферьси бу, йэк жи хәрщгър. ¹¹ Әһе ферьси т'әне сәкьнибу хвәха хвәр'а бь ви щур'әйи дөа дькър: «Хвәдеһе мьн, шыкърдар ьм, кө эз нә мина ван мәрва мә, йед кө т'аланийе, нәһәқийе, зьнек'арийе дькн у нә жи мина ви хәрщгъри мә. ¹² Ле эз һ'әфтийе дө щара р'ожи дьгърм у дәһәке жь һ'әму к'ара хвә жи дьдъм». ¹³ Ле әһи хәрщгър дур сәкьнибу, р'уйе һи нэдъгърт ль әзмен жи бьньһер'ийа, синге хвә дьхьст у дьгот: «Хвәде, ль мьн гөнәк'ари вәрә р'ә'ме». ¹⁴ Әз вәр'а дьбежъм, кө әва р'астһ'эсаббуйи^ф чу мала хвә, нә кө йе дьн, чьмки к'и хвә бьльнд бьгърә, һе һе һьмьзкърһе, ле к'и хвә һьмьз бьгърә, һе һе бьльндкърһе».

Иса дөа зар'ока дькә

(*Мәтта 19:13-15; Марқос 10:13-16*)

¹⁵ Т'ьфал жи аһинә щәм Иса, кө дәсте хвә даһнә сәр ван. Гава шагърта әв йэк дит, ль йед данин һьлатьн. ¹⁶ Ле Иса гази зар'ока кър у гот: «Бьра әһ зар'ок бенә щәм мьн, пешийа ван нәгърн, чьмки П'адшатийа Хвәде п'ара йед аһа йә. ¹⁷ Әз вәр'а р'аст дьбежъм, к'и П'адшатийа Хвәде мина зар'окәке қәбул нәкә, әһ т'ө щар һак'әвә һава һе».

Сәрһерәки щьһуйайи дәһләти ль жийина һ'әта-һ'әтайе дьгәр'ә

(*Мәтта 19:16-30; Марқос 10:17-31*)

¹⁸ Сәрһерәки жь һи пьрси у гот: «Дәрсдәре қәнщ, әз чь бькьм, вәки жийина һ'әта-һ'әтайе һар бьм?» ¹⁹ Иса һир'а гот: «Тө чьма мьһр'а дьбежи қәнщ? Қәнщ т'әне Хвәде йә, пештьри һи кәсәки дьн т'өнә. ²⁰ Тө т'әһийа зани: «Зьнек'арийе нәкә, нәкөжә, нәдьзә, шә'дәтийа дәрәһ

нэдэ, қәдьре де у баве хвә быгьрә*». ²¹ Әви жи гот: «Әв һ'әму жи мьн жь щаһьлтйя хвәда хвәй кьрьнә». ²² Гава Иса әв йәк бһист, вир'а гот: «Тьштәки тә һе кем ә, һәр тыште хвә бьфьрошә, бәлайи фәқира кә, һынге хьзна тә we ль ә'змана һәбә. У пәй мьн вәрә». ²³ Гава әви әв йәк бһист, әшқа ви шкәст, чьмки гәләки дәвләти бу. ²⁴ Иса дит кә бәшәра ви нәхвәш ә, гот: «Чьқаси зә'мәт ә бона йед хвәйһәбук кә бьк'әвьнә П'адшатйя Хвәде. ²⁵ Дәвә we қәла дәрзийер'а һе р'һ'әт дәрбаз бә, нә кә дәвләти бьк'әвә П'адшатйя Хвәде». ²⁶ Әвед кә дьбьһистьн, готьн: «Иди к'и дькарә хьлаз бә?» ²⁷ У Иса гот: «Әв тыште кә жь дәсте мерьв найе, Хвәде дькарә бькә». ²⁸ Пәтрус гот: «Ава мә һәр тыштед хвә һыштьнә у пәй тә һатьнә». ²⁹ Әви ванр'а гот: «Әз р'аст вәр'а дьбежьм, һәр кәсе кә бона П'адшатйя Хвәде мал, йан жьн у зар', йан хушк у бьра, йан де у бав һыштьбә, ³⁰ we ве дьне һе зедә бьстинә у дьнйа дьнда жи жийина һ'әта-һ'әтайе».

Иса щара сьсийа дәрһәқа мьрьна хвәда дьбежә

(Матта 20:17-19; Марқос 10:32-34)

³¹ Әви һәр донздәһ данә алики у ванр'а гот: «Әм ва һәвраз дьчьнә Оршәлиме у һ'әму тыштед кә бь дәсте п'ехәмбәра бона Көр'е Инсан һатьнә һьвисаре, we бенә сери. ³² Әве бьк'әвә дәсте нәщьһуйа, we қәрфе хвә ле бькьн, бөһөрмәт кьн, т'укьне, ³³ бьдьнә бәр қамчийа у бькөжьн. Ле р'ожа сьсийа we жь мьрьне р'абә». ³⁴ Шагьрта т'ө тышт жь ван хәбәра фә'м нәкьрьн. Әв йәк жь ван вәшарти бу у әв готьн сәре ванда р'унәдьһышт.

* 18:20 Дәрк'әтьн 20:12-16; Қануна Дөщари 5:16-20.

Иса п'арсәкәки кор бажаре Әриһайеда қәнш дькә

(Мәтта 20:29-34; Марқос 10:46-52)

³⁵ Гава әв незики Әриһайе бу, йәки кор ль сәр р'е р'уньшти п'арс дькәр. ³⁶ У гава бьһист кө ә'лаләт бәр wir'a дәрбаз дьбә, пьрси: «Әв чь һ'әвал ә?» ³⁷ Wir'a готьн: «Исайе Ньсрәте дәрбаз дьбә». ³⁸ һынге әви кьрә қир'ин у гот: «Иса, Көр'е Дауьд^ф, ль мын вәрә р'ә'ме!» ³⁹ У йе кө пешийе дьчун, ль ви һьлатьн, кө дәнге хвә бьбьр'ә, ле әви һе дькәрә қир'ин: «Көр'е Дауьд, ль мын вәрә р'ә'ме!» ⁴⁰ Иса щидә сәкьни у ә'мьр кьр, кө әви биньнә щәм ви. У гава кор незики ви бу, жь ви пьрси у гот: ⁴¹ «Тө чь жь мын дьхвази кө әз бона тә бькьм?» Әви гот: «Хөдан, дьхвазым ч'ә'вед мын бьбиньн». ⁴² У Иса wir'a гот: «Бьра бьбиньн, бауәрийа тә тө қәнш кьри!» ⁴³ У дәстхвәдә ч'ә'вед ви дитьн, да пәй Иса чу у шькьри дьда Хвәде. Т'әмамияа we щьмә'те кө әв йәк дит, пәсьне Хвәде дьдан.

Иса у хәрщгьр

19 ¹ Иса Әриһайер'а дәрбаз дьбу. ² Мәрвьәки дәвләти һәбу, сәрвәре хәрщгьра, навә ви Зәхайо. ³ Әви дьхвәст кө Иса бьдита к'а әв к'и йә, ле дәст ә'лаләте нькарьбу бьдита, чьмки бәжьнеда кьн бу. ⁴ Әв пешдә бәзи р'абу сәр дарәкә һежирейә стьрин, вәки Иса бьбинә, чьмки әвә һәма ль вьрр'а дәрбаз бьбуя. ⁵ У чахе Иса һатә ви щийи, ль жор ньһер'и у готә ви: «Зәхайо! Зу бькә жь вьр вәрә хваре, чьмки әз гәрәке иро меване тә бьм». ⁶ Зәхайо ләзанд жорда һатә хваре у бь әшқ-ша әв қәбул кьр. ⁷ һ'әмуьед кө әв йәк дитьн, бина хвә тәнг дькьрын у дьготьн: «Әв бу меване мәрвьәки гөнәк'ар». ⁸ Ле Зәхайо пеш һ'әмуьава сәкьни у готә Хөдан: «Хөдан, әз ва ниве

Һәбука хвә дьдъмә фәқира у мьн нәһәқи к'е жи кърьбә, эзе чар щар ле вәгәр'иньм». ⁹ Иса шир'а гот: «Иро эв мал хьлаз бу, чьмки эва жи зар'а Бьраһим э. ¹⁰ Бона ве йәке Көр'е Инсан һат, вәки ль йед ондабууйи бьгәр'э у хьлаз кә».

Мәсәла дәһә зер'а

(Мәтта 25:14-30)

¹¹ У вана һе эв тышт дьбьһистьн, Иса мәсәләкә дьн жи ани сәр ве йәке, кә эв незики Оршәлиме дьбу у вана т'ьре П'адшатийа Хвәде ве зутьрәке к'ьфш бә. ¹² Әви гот: «Мәрвьәки э'сьлзадә чу вәлатәки дур, кә п'адшатийа хвә бьстинә у вәгәр'э. ¹³ Гази дәһә хөламед хвә кър, дәһә зер' данә ван у гот: «Һанен ван бьдьянә хәбате, һ'әта кә эз вәгәр'ьм». ¹⁴ Ле бажарвана к'ина ви гьртьбу, қасьд ль пәй ви шандьн у готьн: «Әм нахвазьн эв п'адшатийе ль сәр мә бькә». ¹⁵ У гава әви п'адшатийа хвә станд вәгәр'ийа, гази ван хөлама кър, к'ижанед кә әви п'әрә дабунә ван, вәки бьзаньбә к'а һәр йәки чьқас кьрийә к'ар. ¹⁶ Йе пешьн һат у готе: «Эз хөлам, зер'әки тә дәһә зер' кьрә к'ар». ¹⁷ Ахайе ви жер'а гот: «Ә'фәрьм, хөламе қәнщ! Тө нава ви тыште һьндькида амын майи, сәрверийе дәһә бажара бькә». ¹⁸ Йе дөда жи һат у гот: «Эз хөлам, зер'әки тә пенщ зер' кьрә к'ар». ¹⁹ Ахайе ви жер'а гот: «Тө жи сәр пенщ бажара бә». ²⁰ Паше йәки дьн һат у гот: «Эз хөлам, ва йә зер'е тә, мьн дәстмаледа п'еч'айи һьлдабу. ²¹ Чьмки эз жь тә дьтьрсийам, мьн заньбу тө мәрвьәки һ'ьшк и, чь кә тә данәнийә, һьлдьди у чь кә тә нәчандийә, дьдьруйи». ²² У ви жер'а гот: «Эзе һәма бь дәве тә диwana тә бькьм, хөламе хьраб! һәгәр тә заньбу кә эз мәрвьәки һ'ьшк ьм, чь кә мьн данәнийә, һьлдьдьм у чь кә нәчандийә, дьдьрум,

²³ тә чьма п'ере мын нәда сәрафа, кө эз бьһатама мын бь сәләф бьстанда?» ²⁴ У һазьрар'а гот: «Ви зер'и жь ви бьстиньн у бьднә әве кө дәһә зер'ед ви һәнә». ²⁵ Уир'а готьн: «Хөдан, дәһә зер'ед ви һәнә». ²⁶ Әви гот: «Әз вәр'а дьбежьм, йе к'е кө һәйә, уир'а ве бе дайине, ле йе к'е кө т'өнә, чь һәйә жи ве же бе стандьне. ²⁷ Ле бәле ван нәйаред мын жи, к'ижана нәдхвәст эз п'адшатийе ль сәр ван бькьм, биньнә вьр, бәр ч'ә'ве мын ван бькөжьн».

Иса бь р'умәт дьк'әвә Оршәлиме

(*Матта 21:1-11; Марқос 11:1-11; Йух'әнна 12:12-19*)

²⁸ Иса пәй ве хәбәрданер'а пешда чу, вәки һәвраз һәр'ә Оршәлиме. ²⁹ У гава незики гөндәд Бәйтфаще у Бәйтанийә бу, ви щийе кө жер'а дьготьн ч'ийәйе^Ф Зәйт'уне, һынге дө шагьртед хвә шандьн ³⁰ у гот: «Һәр'нә ви гөнде пешбәри хвә, гава һун бьк'әвьне, һуне щә'шькәкә гьредаи бьбиньн кө һе кәсәк ле сийар нәбуйә. Әве вәкьн у биньн. ³¹ һәгәр йәк жь вә бьпьрсә: «Һун чьма ве вәдькьн?» бежьн, кө Хөданр'а лазьм ә». ³² Әвед шанди чун, чава кө ванр'а һатьбу готьне, өса жи дитьн. ³³ У вана һе щә'шьк вәдькьр, хвәйед ве ванр'а готьн: «Һун чьма ве щә'шьке вәдькьн?» ³⁴ Шагьрта гот: «Хөданр'а лазьм ә». ³⁵ У әв анинә щәм Иса, к'ьнщед хвә авитьнә сәр ве у Иса ле сийар кьрьн. ³⁶ Гава дьчу, щьмә'те к'ьнщед хвә сәр р'е р'адьхьстьн. ³⁷ У гава әв незики п'ебәржере ч'ийәйе Зәйт'уне бу, т'әмамийа к'ома шагьрта дәстпекьрьн ша дьбун у бь дәнге бьльнд бона һ'әму к'әрәмәтед кө дитьбун шькьри дьданә Хвәде ³⁸ у дьготьн: «Бьмбарәк ә әв П'адшайе кө бь наве Хөдан те!»

* 19:38 Зәбур 118:26.

Ә'дълайи ль ә'змен у шыкьри ль Йе һәри Жорьн**!»³⁹ Ле жь нав ә'лаләте чәнд ферьсийа Исар'а гот: «Дәрсдар, ль шагъртед хвә һыле». ⁴⁰ Әви ль ван вәгәр'анд у гот: «Әз вәр'а дьбежъм, һәгәр әвана дәнге хвә бьбьр'ын, кәвьре бькьнә қир'ин».

Иса бона Оршәлиме дьгьри

⁴¹ У гава незики Оршәлиме бу, ль бажер ньһер'и, сәрда гьрийа ⁴² у гот: «Хвәзи тә һәма иро бьзаньбуяа ә'дълайийа тә чьва гьредаи йә! Ле ньһа жь бәр ч'әве тә һатә вәшартьне. ⁴³ Чьмки р'ож we сәр тәда бен, кә дьжмьнед тәйе дора тә чәпәр'е гьредьн у жь һәр алийава һ'ыщуми сәр тә кьн. ⁴⁴ We тә у зар'ед тә нава тәда бькьн ах-хвәли у кәвьр ль сәр кәвьр һәһельн. Чьмки вәхте кә Хвәде сәрик да тә, тө хвә нәһ'әсийайи».

Иса п'арьстгәһеда

(*Мәтта 21:12-17; Марқос 11:15-19; Йһ'әнна 2:13-22*)

⁴⁵ У к'әтә п'арьстгәһе, дәстпекьр йед кә дьфьротьн дәрхьстьн ⁴⁶ у ванр'а гот: «Ньвисар ә: «Мала мьн we мала дәа бә». Ле вә әв кьрийә «шкәфта қачаха**». ⁴⁷ У һәр р'ож п'арьстгәһеда һин дькьр, ле сәрәкед к'аһина, қанунзан у гьрәгьред щьмә'те пәй к'әтьбун, кә чава ви бькөжьн. ⁴⁸ Ле нькарьбун тыштәк бькьрана, чьмки т'әмамияа щьмә'те вива гьредаи бу у гөһдарийа ви дькьр.

** 19:38 Бь йунани хәбәр бь хәбәр аһа йә: «Шькьри бьльндаийеда». «Бьльндаи» бә'са щийе Хвәде дькә.

* 19:46 Ишайа 56:7.

** 19:46 Йерәмийа 7:11.

Пърса дәрһәқа һ'өкөме Исада

(Мәтта 21:23-27; Марқос 11:27-33)

20 ¹ У р'ожәкә жь ван р'ожада, гава әви п'арьстгәһеда хәлқ һин дькьр у Мьзгини дьда, сәрәкед к'аһина у қанунзан т'әви р'успийа һатьнә щәм ви ² у готьн: «Бежә мә, тө бь чь һ'өкөми ван кьра дьки? К'е әв һ'өкөм дайә тә?» ³ Әви ль ван вәгәр'анд у гот: «Әз жи тыштәки жь вә бьпърсьм у һун мьнр'а бежьн: ⁴ һ'өкөме ньхөмандьна Йуһ'әнна жь ә'змен бу йан жь мәрьва?» ⁵ Әвана нав һәвда шешьрин у готьн: «Һәгәр әм бежьн: «Жь ә'змен бу», әвә бежә: «Ле вә чьма бавәрийа^ф хвә ви нәани?» ⁶ Ле һәгәр әм бежьн: «Жь мәрьва бу», т'әмамийа щьмә'те we мә бьдә бәр кәвьра, чьмки вана р'ьнд заньбу кө Йуһ'әнна п'ехәмбәр бу». ⁷ Вана шаба ви да у готьн: «Әм ньзаньн жь к'ө бу». ⁸ Иса ванр'а гот: «Әз жи вәр'а набежьм, кө бь чь һ'өкөми ван кьра дькьм».

Мәсәлә р'әзе тьрийа у р'әзвана

(Мәтта 21:33-46; Марқос 12:1-12)

⁹ У Иса дәстпекьр әв мәсәлә щьмә'тер'а гот: «Мәрвьәки р'әзе тьрийа дани у әв бь к'ьре да р'әзвана, вәхтәки дьреж чу вәлатәки дьн. ¹⁰ У вәхтда хөламәк шандә щәм р'әзвана, вәки жь ви р'әзи бәре п'ара ви вир'а бышиньн, ле р'әзвана хөламе ви к'өта у дәствала вәр'екьрьн. ¹¹ Ахе хөламәки дьн жи шанд, вана әв жи к'өта, әв р'обәт кьрьн у дәствала вәр'екьрьн. ¹² Йе сьсийа жи шанд, вана әва жи бьриндар кьр у жь р'әз дәрхьстьн. ¹³ Хвәйе р'әз гот: «Әз чь бькьм? Көр'е хвәйи дәлал бышиньм, һьлбәт we жь ви шәрм бькьн». ¹⁴ Гава р'әзван ч'ә'в ви к'әтьн, ль һәв шешьрин у готьн: «Әв ә вәре ви. Вәрьн әм ви бькөжьн,

кө мират'а^Ф ви мәр'а бьминә». ¹⁵ У әw жь р'әз дәрхьстьнә дәр у көштьн. Аwa хwәйе р'әз we чь бинә сәре ван? ¹⁶ Нә әwe бе қыр'а ван р'әзвана бинә у р'әз бьдә һнәкед дьн». Гава әв йәк бьһистьн, готьн: «Хwәде нәкә». ¹⁷ У Иса ль ван ньер'и у гот: «Ле әw чь йә, кө һвисар ә?

Әw кәвьре кө һоста т'әхсир кьр,
әw бу сәре ә'нишке^Ф».

¹⁸ һәр кәсе кө бьк'әвә сәр ви кәвьри, we һурдәхwәши бә у әw кәвьр бьк'әвә сәр к'е, we ви бьһ'нщьр'инә». ¹⁹ Сәрәкед к'аһина у қанунзана we дәме кьрьн кө ви бьгьрьн, чьмки фә'м кьрьн, кө әви әв мәсәлә ани сәр ван, ле жь цьмә'те тьрсийан.

Пьрса хәрщдайн у нәдаине

(*Мәтта 22:15-22; Марқос 12:13-17*)

²⁰ У ч'ә'вед ван ль Иса бун, чәнд мәрьвед щә'сус шандьн, кө бь дөр'ути хwә дәwса р'аста данибун, wәки ви бь хәбәра бьгьрьн у бьдьнә дәсте һ'өкөмәте у диwана wәли. ²¹ Wана жь ви пьрси у готьне: «Дәрсдар, әм заньн кө тө р'аст хәбәр дьди у һин дьки, нав мәрьвада фьрқийе жи данайни, ле р'ийа Хwәде р'аст һин дьки. ²² Гәло р'аст ә кө әм хәрщ бьдьнә Қәйсәр йан на?» ²³ Әви кө фелбазийа ван заньбу ванар'а гот»: ²⁴ «Зивәки нишани мьн кьн. Әв һвисар у сьфәте^Ф к'е нә сәр?» ²⁵ Wана гот: «Йед Қәйсәр ьн». Әви ванр'а гот: «Wәки өса йә, чь кө йед Қәйсәр ьн, бьдьнә Қәйсәр у чь йед Хwәде нә бьдьнә Хwәде». ²⁶ У

* 20:17 Зәбур 118:22.

* 20:23 Нав дәстньвисаред һнәкада аһа йә: «һун чьма мьн дьщер'ьбиньн?»

нькарьбун бәр щьмә'те нава хәбәра вида әв быгьртана, сәр щабдайина ви зәндәгьрти дәнге хwә бьр'ин.

Пьрса р'абуна мьрийа

(*Мәтта 22:23-33; Марқос 12:18-27*)

²⁷ Ынәк жь садудийед^ф кӧ дьготьн мьри р'анабьн, һатьнә щәм ви жь ви пьрсин у готьн: ²⁸ «Дәрсдар, Муса мәр'а ньвисийә: ‹Һәгәр бьре йәки бьзәwьщә у безӧр'әт бьмьрә, бьра бьре ви жьна ви бьстинә у wәре бьре хwә шин кә»*. ²⁹ Аwа һ'әфт бьра һәбун. Бьре мәзьн жьнәк станд, безӧр'әт мьр. ³⁰ Пәйр'а йе дӧда ³¹ у паше йе сьсийа әw жьн станд, һәйнәсәр wан һәр һ'әфта жи әw жьн станд у зар' пәй wан нәк'әтьн, мьрьн. ³² Пәй гьшкар'а әw к'ӧлфәта жи мьр. ³³ Дә ижар we Р'ожа Р'абуна мьрийа әw к'ӧлфәте бьбә жьна к'ижани? Чьмки һәр һ'әфта жи әw стандьбу». ³⁴ Иса ль wан вәгәр'анд у гот: «Мәрьве we дьне дьзәwьщьн у мер дькьн. ³⁵ Ле әwед кӧ быгьһижьнә we дьне у һежайи р'абуна мьрийа бьн, нә we бьзәwьщьн у нә жи мер кьн. ³⁶ Чьмки әwe иди нькарьбьн бьмьрьн, әw wәкә мьлйак'әта нә. Әw зар'ед Хwәде нә, чьмки п'ара р'абуна мьрийа нә. ³⁷ Ле бона р'абуна мьрийа, Муса жи дайә к'ьфше. Әw сәрһатийа дара дьр'ийеда бона Хӧдан дьбежә: ‹Хwәдейе Бьраһим, Хwәдейе Ишаq, Хwәдейе Аqуб»*. ³⁸ Аwа Хwәде нә Хwәдейе мьрийа йә, ле йе зендийа йә, чьмки бона ви һ'әму жи сах ьн». ³⁹ Жь қанунзана һьнәка ле вәгәр'анд у готьне: ‹Дәрсдар, тә қәнщ гот». ⁴⁰ У иди кәсәки нәwерьбу кӧ тыштәки жи жь ви бьпьрсә.

* 20:28 Қануна Дӧщари 25:5.

* 20:37 Дәрк'әтьн 3:6.

Мәсiһ көр'е к'е йә?

(Мәтта 22:41-46; Марқос 12:35-37)

⁴¹ У Иса ванар'а гот: «Чава дьбежын кө Мәсiһ көр'е Дауьд ә? ⁴² Дауьд хвәха к'ьтеба Зәбурада^ф дьбежә:

«Хөдан готә Хөдане мьн:

Ль мьле мьни р'асте р'уне, ⁴³ һ'әта кө дьжмьнед тә бькьмә бьне п'ийед тә».

⁴⁴ Ава һәгәр Дауьд ви Хөдан һ'әсаб дькә, иди әв чава дьбә көр'е Дауьд?»

Һ'әвза хвә жь қанунзана бькьн

(Мәтта 23:1-36; Марқос 12:38-40; Луқа 11:37-54)

⁴⁵ һе т'әмамыйа щьмә'те гөһдари дькьр, әви шагьртед хвәр'а гот: ⁴⁶ «Һ'әвза хвә жь ван қанунзана бькьн, йед кө һ'ыз дькьн бь чөхед дьреж бьгәр'ьн, базарада сылаве бьдьнә ван, к'ьништада к'өрсийед пешьн бьгьр'ьн у шайийада жи һәрәма^ф жорьн р'унен. ⁴⁷ Аликива малед жьнәбийа һ'уфи хвә дькьн, алиие дьнва жи бь дөр'ути дөайе хвә дьреж дькьн. Диwana ване һе гьран бә».

Дийарийа жьнәбийа бәләнгаз

(Марқос 12:41-44)

21 ¹ Иса дина хвә даие у дит кө дәвләтийа һ'әдийед хвә давитьнә п'әрәданга^ф п'арьстгәһе. ² Әви бәләнгазәкә жьнәби жи дит кө дө пол авитә вьр ³ у Иса гот: «Әз р'аст вәр'а дьбежьм, кө әве жьнәбийа бәләнгаз жь ван һ'әмуяа зә'фтьр авите. ⁴ Чьмки ван һ'әмуяа жь бәрмайийед хвә авитьнә нава һ'әдийед

* 20:43 Зәбур 110:1.

Хвәде, ле әве ве бәләнгазыйа хвәда һ'әму тыште кө пе ә'буре хвә бькьра авите».

Иса пешда дәрһәқа веранбуна п'арьстгәһеда дьбежә

(Мәтта 24:1-2; Марқос 13:1-2)

⁵ У чахе һьнәка бона п'арьстгәһе дьготьн, кө бь кәвьре бәдәw у п'ешк'еша һатийә хәмьландьне, әви гот: ⁶ «Ван һ'әму тыштед кө һун дьбиньн, р'оже бен кө әв һ'әмуые жи веран бьн, ль вьр кәвьре ль сәр кәвьр нәминә!»

Тәнгаси у зерандьн

(Мәтта 24:3-14; Марқос 13:3-13)

⁷ У жь ви пьрсин готьне: «Дәрсдар, әв тышт we к'әнге бьрәwьмьн? У чь нишане бьбә, гава әв йәк бьрәwьмьн?»
⁸ Әви гот: «Һаш жь хвә һәбьн, кө һун нәйенә хапандьне, чьмки гәләк we пе наве мьн бен у бежьн: «Әз ьм Мәсиһ» у: «Әw wәхт незик ә», пәй ван нәчьн. ⁹ Гава һун бона шәр' у дә'wa бьбьһен, нәтърсьн, чьмки гәрәке пешийе әв тышт бьрәwьмьн, ле ахьрийа дьне нә һьнге йә». ¹⁰ һьнге ванр'а гот: «Мьләте р'абә ль сәр мьләт, п'адшати ль сәр п'адшатийа, ¹¹ щи-щийа ә'рдһ'әжед мәзьн, хәлайи-щәлайе у мина нәхwәшийа һ'ал we бьбьн, ль ә'змен жи тыштед хоф у тьрс у нишанед мәзьн we бьрәwьмьн. ¹² Ле бәри ван һ'әму тышта, we дәст бавежьнә wә, wә бьзериьн, бьбьнә бәр диwana к'ьништа у бькьнә кәла. Бона наве мьн we wә бьбьнә бәр п'адша у wәлийа. ¹³ Әве wәр'а бьбә мә'ни, кө һун бона мьн шә'дәтийе бьдьн. ¹⁴ У awa ве йәке бькьнә бира хвә, кө пешда хәм нәкьн һуне чь щаба хвә бьдьн. ¹⁵ Чьмки әзе зар-зьман у сәрwахтийе бьдьмә wә, кө дьжмьнед wәйе нькарьбьн ль бәр wә хәбәр дьн йан бьсәкьньн. ¹⁶ Де у бавед wә, бьра-пьсмам у достед wә we

вә бьднә гьртне у жь вә һнәка жи we бькөжн. ¹⁷ Бона наве мын һуне бәр ч'э'ве һ'әмуйа р'эш бн. ¹⁸ Ле муке жь сәре вә кем нәбә. ¹⁹ Бь сәбьра хвә һуне р'öh'e хвә хьлаз кн.

Иса дәрһәқа weранбуна Оршәлимеда хәбәр дьдә

(Мәтта 24:15-21; Марқос 13:14-19)

²⁰ Ле гава һун бьбиньн кө ордия дора Оршәлиме гьртия, һнге бьзаньбн кө weранбуна we незик э. ²¹ һнге әвед кө Щьһустанеда нә бьра бьр'эвнә ч'ийа у әвед кө Оршәлимеда нә бьра дәрен, әвед к'әwшенда нә, бьра вәнәгәр'ьнә бажер. ²² Чьмки әw р'ож, р'ожед һ'әйфһьлдане нә, wәки һәр чь кө һатийә ньвисаре бе сери. ²³ Ле wәй ль һ'эмла у дәстдәргуша ван р'ожада, чьмки тәнгасикә мәзын we бе сәре дьне у хәзәб әве щьм'тер'а. ²⁴ Әwe бь дәве шур бьк'эвн у нав һ'әму мьлэтада һесир бенә бьрьне. Оршәлиме жи бәр п'ийед мьләтед п'утп'арьст һәр'ә, һ'әта кө wәхте ван мьләта хьлаз бә.

һатна Көр'е Инсан

(Мәтта 24:29-31; Марқос 13:24-27)

²⁵ У сәр р'ойе, һиве у стәйрка нишане бьбн. Ль сәр дьне жи мьләте жь дәст дәнге хөшинийа пелед бәрә бьбьздн у хвә онда кн. ²⁶ Дьле мәрва жи жь тьрса we бьсәкнә, бона әw тыштед кө we бенә сәре т'әмамия дьне, чьмки т'опед әзмана we жь р'ийед хвә дәрен*. ²⁷ У һнге we бьбиньн кө Көр'е Инсан ә'wрава бь қәwат у

* 21:26 Аһа жи те фә'мкьрьне: «Қәwатед әзмана we бьһ'әжн».

р'умэта мэзын те. ²⁸ Гава эв тышт дэстпебьбьн, һун р'абьн сәре хвә бьльнд кьн, чьмки азабуна вә иди незик э».

Дәрса дара һежире

(Мәтта 24:32-35; Марқос 13:28-31)

²⁹ У мәсәлэк ванр'а гот: «һун дина хвә бьдьнә дара һежире у һ'әму дара. ³⁰ Гава дьбьшкьвьн, һун бь we йәке заньн кә һавин незик э. ³¹ Өса жи гава һун бьбиньн кә эв йәк дьрәвьмьн, бьзаньбьн кә П'адшатийа Хвәде незик э. ³² Эз р'аст вәр'а дьбежьм, кә эва ньсьла дәрбаз набә, һ'әта кә эв һ'әму тышт нәрәвьмьн. ³³ Ә'рд у әзмане дәрбаз бьн, ле готьнед мьн т'ө щар дәрбаз набьн.

Р'анәзен

³⁴ Мьрати хвә бьн, нәбә кә дьле вә хварьн, вәхварьне у хәмед ве дьнйайева гьредаи бә, ньшкева әв Р'ож сәр вәда бе. ³⁵ Чьмки әв р'оже мина т'әле бе сәре һ'әму мәрвевд ль сәр дьне. ³⁶ һ'ьшйар бьминьн у һәр гав дәа бькьн, вәки һун бькарьбьн жь ван һ'әму тыштед кә we бьрәвьмьн бьр'әвьн-хьлаз бьн у ль бәр Көр'е Инсан р'успи бьсәкьньн». ³⁷ Иса р'оже п'арьстгәһеда һин дькьр, ле шәве дьчу сәре ч'ийайе Зәйт'уне дьма. ³⁸ У т'әмамийа щьмә'те сьбәһе зу дьчу п'арьстгәһе щәм ви, кә хәбәрәд ви бьбьһен.

Гьртън, хачкърън^Ф у р'абуна Иса

Шевъра кôштъна Иса

(*Матта 26:1-5, 14, 16; Марқос 14:1-2, 10-11; Йуһ'анна 11:45-53*)

22¹ Щэжьна^Ф Нане Шкэва незик бу, йа кô жер'а Щэжьна^Ф Дэрбазбуне дьготън. ² Сэрэкед к'ахина у қанунзана мэщалэке дьгэр'ийан кô ви бькôжьн, чьмки жь щьмэ'те дьтьрсийан. ³ Ынге Мирещън к'этэ қалпе дьле Щьһудайе^Ф кô Исхэрйоти дьһатэ готъне, эв йэк жь ван һэр донздэһа бу. ⁴ Эва р'абу чу т'эви сэрэкед к'ахина у сэрверед нобэдаред п'арьстгэһе, ванр'а хэбэр да, вэки Иса бьдэ дэсте ван. ⁵ Эвана ша бун у wir'а қайл бун, кô п'эра бьдънэ ви. ⁶ Щьһуда р'ази бу у һьлда сэр хвэ, кô мэщале бьбинэ эви бь дьзи щьмэ'тева бьдэ дэсте ван.

Т'ввдарэкдитъна шива Щэжьна Дэрбазбуне

(*Матта 26:17-25; Марқос 14:12-21; Йуһ'анна 13:21-30*)

⁷ Р'ожа Щэжьна Нане Шкэва һат, кô э'дэт бу бэрха қôрбана Щэжьна Дэрбазбуне бьһата сэржекъръне. ⁸ Иса Пэтрус у Йуһ'анна шандън у гот: «Һэр'ьн Шива Щэжьна Дэрбазбуне мэр'а һазьр кьн, вэки эм бьхвьн». ⁹ Вана же пьрси: «Тô ль к'ô дьхвази кô эм һазьр кьн?» ¹⁰ Эви жи ванар'а гот: «Гава кô һун бьк'эвьнэ бажер, мэрвьэке р'асти вэ бе, щер'е аве ль сэр мьла. Пэй ви һэр'ьнэ we мала кô эв дьче, ¹¹ у хвэйе малер'а бежьн: «Дэрсдар тэр'а дьбежэ: К'ане эв ода мевана, йа кô эзе теда т'эви шагъртед хвэ шива Щэжьна Дэрбазбуне бьхвьм?» ¹² Ынге эве ль қате жорьн одэкэ мэзьнэ һэвдайи нишани вэ кэ у вьр жи һун һазьр кьн». ¹³ Эвана чун, чава кô

ванар'а готьбу өса жи дитьн у шива Щэжьна Дэрбазбуне
һазьр кьрын.

Шива Хөдан

(Матта 26:26-30; Марқос 14:22-26; 1 Корьнт'и 11:23-25)

¹⁴ У гава вэхт пер'а гьһишт, әв бь т'әви шандийа ль сәр сьфре р'уньшт ¹⁵ у ванр'а гот: «Әз гәләки һ'ьзрәта ве Шива Щэжьна Дэрбазбуне бум, кө мьн т'әви вә бәри щәфе хвә бьхвара. ¹⁶ Чьмки әз вәр'а дьбежьм, әз иди жь ве т'ө щар нахвьм, һ'әта кө П'адшатийа Хвәдеда бьбә». ¹⁷ У к'ас һьлда, шькьрийа хвә жь Хвәде ани у гот: «һьлдьн әве у нав хвәда бәла кьн. ¹⁸ Әз вәр'а дьбежьм, вәки әз иди жь мәйа тьрийе вәнахвьм, һ'әта кө П'адшатийа Хвәде бе». ¹⁹ У нан һьлда шькьри да, кәркьр да ван у гот: «Әва бәдәна мьн ә, кө бона вә те дайине. Ве йәке бона биранина мьн бькьн».

²⁰ Өса жи к'ас пәй шивер'а һьлда у гот: «Әва к'аса пәймана ну йә, пе хуна мьн гьредайи, кө бона вә те р'етьне. ²¹ У ва йә дәсте йе кө нәмамийа мьн бькә, ль сәр ве сьфре т'әви мьн ә. ²² Р'аст Көр'е Инсан ве өса һәр'ә, чава кө бона ви ньвисар ә, ле вәй ль ви мәрьви, кө ве нәмамийа Көр'е Инсан бькә». ²³ У вана дәстпекьр нав һәвда жь һәв пьрсин: «Гәло к'и йә әви нав мәда, кө ве йәке ве бькә?»

Дә'ва бона мәзһнайийе

²⁴ У нав ванда дә'w пешда һат, кө жь нав ванда к'ижан ве йе һәри мәзһн бе һ'әсабе. ²⁵ Иса ванр'а гот: «П'адшайед мьләта щьмә'та хвә бьндәст дькьн у әвед сәр ван һ'өкөм дькьн херхвәзед ван тенә готьне. ²⁶ Ле һун өса нәбьн, йе нав вәдайи һәри мәзһн, бьра бьбә мина йе һәри бьч'ук

у бьра йе сэрвертийе дькэ жи бьбэ мина йе хөламтийе дькэ. ²⁷ Ньһа к'и йэ мэзын, йе ль сьфре р'унышти йан бэрдэсти? Нэ йе ль сьфре р'унышти? У эз нава вэда мина бэрдэстики мэ.

²⁸ хун ын, йед кө нава щер'ьбандьнед мында һ'эта ньһа т'эви мын манэ. ²⁹ У эзе П'адшатийе бьдьмэ вэ, чава Баве мын эв да мын, ³⁰ вэки хун П'адшатийа мында жь сьфра мын бьхвын у вэхвын у сэр к'өрсийа р'унен, диwana донздэһ қэбилед^ф Исраеле бькын.

Иса дэрһэқа инк'арийа Шьмһ'ун-Пэтрусда дьбежэ

(Матта 26:31-35; Марқос 14:27-31; Йух'анна 13:36-38)

³¹ Шьмһ'ун! Шьмһ'ун! Ва йэ Мирещын хвэст вэки вэ мина гэным бежынге хэ. ³² Ле мын бона тэ дөа кьр, вэки бауэрийа тэ кем нэбэ у гава тө вэгэр'и, дьл бьди бэр бьрайед хвэ». ³³ У Пэтрус wir'а гот: «Хөдан, эз һазьр ым т'эви тэ бемэ гьртые у көштые жи». ³⁴ Иса wir'а гот: «Пэтрус! Эз тэр'а дьбежым, иро һе бэри бангдана дик, те се щара бежи, вэки тө мын нас наки».

Дэрһэқа тэнгасийа мэзында

³⁵ У Иса ванр'а гот: «Гава мын хун бе к'иськ, турьк у чарьх шандын, хун һ'эвще тыштэки бун?» Вана гот: «На». ³⁶ һынге гот: «Ле ньһа к'иське к'е һэйэ бьра һьлдэ у өса жи турьк. У йе кө бе шур э, бьра к'ынще хвэ бьфьрошэ у хвэр'а шурэки бьк'ьр'э. ³⁷ Ле эз вэр'а дьбежым, кө гэрэке эва ньвисара сэр мын бе сери, кө: «Эв т'эви нэр'аста һатэ һ'эсабе». У чь кө бона мын ньвисар э, сэр қэвьмандыне

* 22:37 Ишайа 53:12.

йә». ³⁸ Шагърта wir'a гот: «Хөдан, ванә вьра дө шур һәнә». Әви ванр'a гот: «Бәс ә».

Иса сәре ч'ийайе Зәйт'уне дөа дькә

(*Мәтта 26:36-46; Марқос 14:32-42*)

³⁹ У Иса ль гора әдәте хвә р'абу чу ч'ийайе Зәйт'уне, шагъртед ви жи ль пәй чун. ⁴⁰ У гава гьһиштә щи, ванр'a гот: «Дөа бькьн, кө һун нәк'әвьнә нава щер'ьбандьне». ⁴¹ У хвәха қаси кәвьравитьнәке жь ван дур к'әт, чок да дөа кьр ⁴² у гот: «Баво, һәгәр ә'мьре тә йә, әве к'асе жь мьн дур хә. Ле бьра хвәстьна тә бә, нә кө йа мьн». ⁴³ У жь ә'змен мьльак'әтәк вива хөйа бу у әв қәват кьр. ⁴⁴ Әви нава щәфе гьранда, һе бь дьле к'әл дөа дькьр. Худана ви мина дьлопед хунейә гьр дьр'ьжийанә әрде. ⁴⁵ У жь дөа р'абу, һатә щәм шагъртед хвә, әвана к'әрба к'әдәре р'азайи дитьн. ⁴⁶ У ванр'a гот: «Һун чьма р'адьзен? Р'абьн дөа бькьн, кө нәк'әвьнә нава щер'ьбандьне».

Гьртьна Иса

(*Мәтта 26:47-56; Марқос 14:43-50; Йһ'әнна 18:3-11*)

⁴⁷ Әви һе хәбәр дьда, әлаләтәке сәр вида гьрт у йәки жь һәр донздәһа, наве ви Щьһуда, пешийа ван к'әтьбу у незики ви бу кө ви р'амусә*. ⁴⁸ Иса wir'a гот: «Щьһуда! Тө бь р'амусане Көр'е Инсан дьди дәсте ван?» ⁴⁹ Гава әвед т'әви ви дитьн кө we чь бьқәвьмә, wir'a готьн: «Хөдан, әм бь шур ль ван хьн?» ⁵⁰ У жь ван йәки бь шур ль хөламе сәрәкк'әһин хьст у гөһе вийи р'әсте пәканд. ⁵¹ һьнге Иса гот: «Бәс ә, бьһельн». У дәст да гөһе ви,

* 22:47 Нав дәстньвисаред һьнәкада аһа йә: «Чьмки өса ванр'a готьбу: «К'ижани кө әз р'амусьм, әв хвәха йә»».

қәнщ кър. ⁵² Паше Иса готә сәрәкед к'аһина, сәрверед нобәдаред п'арьстгәһе у р'успийед кө һатьбунә сәр ви: «Те бежи һун бь шур у дара һатьнә пешийа қачахәки? ⁵³ Нә эз һәр гав т'әви вә п'арьстгәһеда бум, вә дәсте хвә нә дьда мьн. Ле ньһа вәхте вә йә у һ'өкөме тә'ристанийе йә».

Пәтрус Иса инк'ар дькә

(*Матта 26:57-58, 67-75; Марқос 14:53-54, 66-72; Йух'анна 18:12-18, 25-27*)

⁵⁴ У әв гьртьн, бьрын кьрынә мала сәрәкк'аһин. Пәтрус жи дурва п'е-п'е ль пәй ви дьчу. ⁵⁵ Гава вана говәка һ'әвшеда агьр вехьст у доре р'уньштьн, Пәтрус жи ль вьр т'әви ван р'уньшт. ⁵⁶ У щарике әв ль бәр агьр р'уньшти дит, ль ви ньһер'и у гот: «Әва жи т'әви ви бу». ⁵⁷ Ле Пәтрус инк'ар кър у готе: «Әз ви нас накьм, ә'вде!» ⁵⁸ Хеләке шунда йәки дьн әв дит у гот: «Тө жи жь ван и». Пәтрус вир'а гот: «Пьсмам, эз нә жь ван ьм». ⁵⁹ У вәкә сьһ'әтәке жи дәрбаз бу, йәки дьн жи дьда зора хвә у дьготе: «Һәбә-т'өнәбә әва мәрьва т'әви ви бу, чьмки жь Щәлиле йә». ⁶⁰ Ле Пәтрус гот: «Фьлан кәс! Әз ньзаньм тө чь дьбежи». У хәбәр һе девда бу, дәстхвәда дик банг да. ⁶¹ Хөдан сәр Пәтрусда вәгәр'ийа ль ви ньһер'и, һьнге Пәтрус готьна Хөдан ани бира хвә, кө вир'а готьбу: «Иро һе бәри бангдана дик, те се щара мьн инк'ар ки». ⁶² У Пәтрус дәрк'әтә дәрва к'әлә-к'әл гьрийа.

Иса дьбә пек'әни у те к'өтане

⁶³ У әвед кө нобәдари ль Иса дькьрын, қәрфе хвә ль ви дькьрын, дьк'өтан. ⁶⁴ Ч'әвед ви гьредан у жь ви дьпьрсин,

дъготын: «Дә п'ехәмбәртийе бькә, к'а к'и бу кө тә хьст?»
⁶⁵ У бь гәләк готьнед майин жи әв бөһөрмәт дькьрын.

Иса ль бәр щьвина^Ф гьрәгьра

(Мәтта 26:59-66; Марқос 14:55-64; Йһ'әнна 18:19-24)

⁶⁶ У гава сьбәһ зәләл бу, к'ома р'успийед щьмә'те, сәрәкед к'аһина у қанунзана щьвийан. Иса к'аши диwanxana хвә кьрын ⁶⁷ у готьне: «Һәгәр тә йи Мәсих, мәр'а бежә?» Иса ванр'а гот: «Һәгәр әз вәр'а бежым жи, йәк ә һун бауәр накьн. ⁶⁸ У һәгәр пьрсәке жи бьдьмә вә, һун шаба мьн надьн. ⁶⁹ Жь вьр шунда Көр'е Инсан we ль к'еләка Хвәдейе һәри Зор, ль мьле вийи р'асте р'уне». ⁷⁰ У һ'әмуйа бь һәвр'а гот: «Wәки өса йә тә Көр'е Хвәде йи?» Әви ванр'а гот: «Һун хвәха дьбежьн кө әз әв ьм». ⁷¹ У вана гот: «Иди шә'дә чи мәр'а нә? Мә хвәха жь дәве ви бьһист».

Иса ль бәр Пилато

(Мәтта 27:1-2, 11-14; Марқос 15:1-5; Йһ'әнна 18:28-38)

23 ¹ У т'әмамийа ә'лаләта ван р'абу, Иса бьрынә щәм Пилато. ² У дәст бь хәйбе кьрын готын: «Мә әв мәрьва дит кө мьләте мә дьхальфинә у нә жи дьһелә кө хәрщ бьдьнә Қәйсәр. Бона хвә жи дьбежә: «Әз Мәсих П'адша мә». ³ Пилато жь ви пьрси у готе: «Тә йи п'адше щьһуйа^Ф?» Әви ле вәгәр'анд у готе: «Тә бь дәве хвә гот». ⁴ Пилато сәрәкед к'аһина у ә'лаләтер'а гот: «Әз т'ө нәһәқийе ви мәрьвида набиньм». ⁵ Ле әвана сәр йа хвә бун у дьготын: «Әви мәрьви нава т'әмамийа Щьһустане, жь Щәлиле дәстпекьри һ'әта вьра, щьмә'т бь һинкьрына хвәва т'әвиһәв кьрийә».

Иса ль бэр һеродэс

⁶ Гава Пилато бона Щэлиле бьһист, пьрси: «Эв мэрьва жь Щэлиле йэ?» ⁷ Гава пе һ'эсийа, кө эв бьн һ'өкөме һеродэсда йэ, эв шандэ щэм һеродэс, кө эв жи ван р'ожада һатьбу Оршэлиме. ⁸ Гава һеродэс ч'эв Иса к'эт, гэлэки ша бу. Эви һе зува дьхвэст кө эв бьдита, чьмки эви гэлэк тышт бона ви бьһистьбун у һ'эзрэта ви бу, кө к'эрэмэтэке бь дэсте ви бьбинэ. ⁹ һеродэс гэлэк пьрс данэ ви, ле Иса щаба т'ө пьрсе нэда. ¹⁰ Сэрэкед к'аһина у қанунзана жи сэкьнибун у гэлэки давитьнэ ви. ¹¹ һеродэс жи бь эскэред хвэва эв бегэдьр кьр, пе к'энийан, паше к'ьнще р'эвш да ле кьрьне, диса пашда шандэ щэм Пилато. ¹² Ве р'оже Пилато у һеродэс ль һэв һатьн, чьмки пешийе нава ванда дьжмьнати һэбу.

Диғанеда һ'өкөме көштьне ль сэр Иса дэрдьхьн

(Матта 27:15-26; Марқос 15:6-15; Йуһ'анна 18:39-19:16)

¹³ Пилато гази сэрэкед к'аһина, сэрвэра у щьм'эте кьр, ¹⁴ ванр'а гот: «Wэ эв мэрьва ани щэм мьн, чава йэки щьм'эте дьхальфинэ. Ава мьн ль бэр вэ һэр тышт жь ви пьрси, ле жь ван хьрабийед кө һун гьли дькьн, мьн т'ө тышт ль сэр ви мэрьви нэдит. ¹⁵ У нэ жи һеродэс дит, лэма жи ви эв ль сэр мэда вэгэр'анд. Эви тыштэки өса нэкьрийэ кө бе көштьне. ¹⁶ Эз ви бьдьмэ бэр қамчийа у бэр'дьм».* ¹⁸ У т'эмамия а'лалэте бь һэвр'а кьрэ қир'ин у гот: «Ви ль р'убари дьне нәһелә! Барабас бона мә бэр'дә!» ¹⁹ Барабас йэки бона сэрһьлдане у меркөштьна бажерда

* 23:16 Нав дэстньвисаред һьнэкада р'еза 17-а һэйэ: «Чьмки э'сэйи лазьм бу бона һэр щэжьнэке гьртик ванр'а бэр'да».

буйи һатъбу гъртъне. ²⁰ Пилато диса дэстпекър хэбэр да, чъмки ви дьхвэст кӧ Иса бьда бэр'дане. ²¹ Ле вана һе дькърэ қир'ин у дьгот: «Хач^ф кә! Әви хач кә!» ²² Әви щара сьсийа ванр'а гот: «Әви чь хьраби кьрийә? Мьн ль сэр ви нәһәқи нәдит кӧ әв бе кӧштъне. Әз ви бьдъмә бэр қамчийа у бэр'дъм». ²³ Ле әвана бь дәнге бьльнд сэр йа хвә бун у дьхвэстън кӧ әв бе хачкъръне. Сәвта ван сәрк'әт. ²⁴ Пилато қьрара хвә да, кӧ бь хвэстъна ван бә. ²⁵ Анәгори хвэстъна ван, йе кӧ бона сәрһьлдане у меркӧштъне кәледа бу, бэр'да. Ле Иса һьштә сэр хвэстъна дьле ван.

Хачкъръна Иса

(*Мәтта 27:31-44; Марқос 15:21-32; Йух'әнна 19:17-27*)

²⁶ У гава әскәра әв данә пешийа хвә бьрын, йәки курени наве ви Шьмһ'ун, кӧ жь к'әвшен дьһат, әв гьртън у хач данинә сэр мьле ви, кӧ ль пәй Иса бьбә. ²⁷ У ә'лаләтәкә щьмә'тейә гьран ль пәй ви дьчу, өса жи к'ӧлфәтед кӧ шина ви дькърън у дьгьрийан. ²⁸ Иса ль сэр ванда вәгәр'ийа у гот: «Қизед Оршәлиме! Сәр мьнда нәгьрин, ле сэр хвә у зар'ед хвәда бьгьрин. ²⁹ Чъмки р'ож we бен кӧ we бежън: «Хвәзи ль ван к'ӧлфәтед безӧр'әт, кӧ зар' нәанинә у нәмежандьнә».* ³⁰ һьнге мәрвье дэстпекън бежън: «Ч'ийано! Ль сэр мәда бьк'әвьн. Гьрно! Мә вәшерън»*. ³¹ һәгәр сәре дара тәр' аһа дькьн, ле һ'але дара һ'шк we чава бә?»

* 23:29 Аһа жи те фә'мкъръне: «Хвәзи ль ван к'ӧлфәтед безӧр'әт у ван бәт'ьна кӧ зар' нәанинә у ван бьстана кӧ нәмежандьнә».

* 23:30 һосәйа 10:8.

³² Дө мәрвөд нәһәқ жи анин, кө пер'а бенә көштъне.
³³ У гава гъиштънә ви щийе кө Qаф те готън, ль вър әв хач кърын. У әвед нәһәқ жи йәк ль мьле р'асте хач кърын у йәк жи ль мьле ч'әпе. ³⁴ һынге Иса гот: «Баво, бьбахшинә ван, чъмки нъзанън чь дькън». Сәр к'ьнщед ви п'әшк авитън вәки нава хвәда бәла кьн ³⁵ У щьмә'т сәкьнибу дьньһер'и. Сәрвер жи қәрфе хвә ль ви дькърын у дьготън: «Хәлқ хьлаз кърын, дә бьра хвә жи хьлаз кә, һәгәр әв ә Мәсиһ, бьжартийе^ф Хвәде». ³⁶ Әскәр жи ль ви дьк'әнийан, пешда дьһатън, сьркә^ф дьдане ³⁷ у дьготън: «Һәгәр тө йи п'адшайе щьһуйа, дә хвәха хвә хьлаз кә». ³⁸ У феза сәре ви бь йунани, латини у ибрани^ф ньвисар бу, кө: «ӘВА ПАДШАЙЕ ЩЬҺУЙА ЙӘ».

³⁹ Жь ван нәһәқед дардакъри, йәки Иса беһөрмәт дькър у дьготе: «Тө нә Мәсиһ и? Дә мә хьлаз кә, хвә жи пер'а». ⁴⁰ Ле һәвале ви ле һьлат у гот: «Тө жь Хвәде натьрси? Нә тө жи хут ви щәзайида йи? ⁴¹ Әв һәре мә йә, кө әз у тө анәгори ә'мәлед хвә дьк'ьшинън, ле әви т'ө хьраби нәкърийә». ⁴² У Исар'а гот: «Иса, мьн бир бини, гава бь П'адшатийа хвәва бейи». ⁴³ Иса wir'а гот: «Әз р'аст тәр'а дьбежъм, иро те т'әви мьн бөһьштеда^ф би».

Мьрна Иса

(Матта 27:45-56; Марқос 15:33-41; Йһ'әнна 19:28-30)

⁴⁴ Гава нивро сьһ'әт незики донздәһа бу, т'әмамийа ә'рде һ'әта сьһ'әта сьсийа бу тә'ри ⁴⁵ у р'уйе р'ойе һатә гьртъне. П'әр'да п'арьстгәһе нивида бу дө тиша^ф. ⁴⁶ У Иса бь дәнге бьльнд кьрә гази у гот: «Баво, р'өһ'е хвә дьдьмә дәсте тә». У гава әв йәк гот, р'өһ'е хвә да. ⁴⁷ Сәрсәд әв тьште буйи кө дит, шькъри да Хвәде у гот: «Р'асти әва мәрвәки р'аст бу». ⁴⁸ У т'әмамийа ә'лаләте, кө ль

wър бона т'эмаше щывийайи бу, эв йэка дит, сингед хwэ дхьхьстн, пашда вэдыгэр'ийанэ малед хwэ. ⁴⁹ h'эму насед wi жи у эw к'олфэтед кө жь Щэлиле hatьбун, дур сэкьни бун у эв тышт дьдйтн.

Дэфьнкьрна^ф Иса

(Матта 27:57-61; Маркос 15:42-47; Йух'энна 19:38-42)

⁵⁰ Мэрьвэки қэнщи ширh'элал у эндэме щывина гьргьра щьһуйа һэбу, наве wi Усвь^ф. ⁵¹ Эва жь бажаре Аримэтиа Щьһустане бу у хwэха жи һивийа П'адшатийа Хwэде бу. Эw т'эви шевър у кьрна щывина ван нэббу. ⁵² Эw р'абу чу щэм Пилато у щьһйазе Иса жь wi хwэст. ⁵³ Щьһйаз жь хаче ани хваре, қэдэке к'ьтанида к'эфэн^ф кьр у дани нав т'ьрба қэйеда к'олайи, кө т'ө цар веда кэсэк нэһатьбу данине. ⁵⁴ У эw р'ожа^ф т'ьвдарэккьрнеда бу, кө евара шэмийе дэстпедькьр. ⁵⁵ У эw к'олфэтед кө жь Щэлиле т'эви Иса hatьбун, эw жи пэй wi чун у эw т'ьрба кө чава щьһйазе wi теда hatэ данине, дитн. ⁵⁶ У пашда вэгэр'ийан, бьһарэт^ф у р'уне^ф бинхwэш һазьр кьрн у анэгори т'эмийа Қануне р'ожа шэмийе р'ьһ'эт бун.

Иса жь мьрьне р'адьбэ

(Матта 28:1-10; Маркос 16:1-8; Йух'энна 20:1-10)

24 ¹ Р'ожа йэкшэме сьбэһе зу, ван к'олфэта бьһарэтед һазьркьри һьлдан чунэ сэр т'ьрбе. ² Ле вана кэвър жь бэр т'ьрбе һолкьри дит. ³ Гава к'этьнэ һьндөр', щьһйазе Хөдан Иса нэдитн. ⁴ Гава эвана һе бона ве йэке мэт'элмайи мабун, нышкева дө мэри бь к'ьнще нурани ль бэр ван сэкьнин. ⁵ У гава к'олфэт жь тьрса к'этьнэ сэр р'уйе хwэ, ван мэрьва ванр'а гот: «һун чьма ль йе сах

нава мърйиада дьгэр'ьн? ⁶ Әw нә ль вьр ә, әw жь мьрьне р'абуйә. Биньнә бира хwә, кӧ чахе һе Щәлиледа бу, чь wәр'a гот: ⁷ «Гәрәке Кӧр'е Инсан бьк'әвә дәсте мәрвьед нәр'аст, бе хачкьрьне у р'ожа сьсийа жь мьрьне р'абә». ⁸ У wана готьна Иса бир анин ⁹ у жь т'ьрбе вэгәр'ийан, әва йәка һәр йанздәһа у һ'әмуйед майинр'a готьн. ¹⁰ Йед кӧ шандийар'a готьн, әвана бун: Мәрйәма Мәждәлани, Йоһана у Мәрйәма дийа Ақуб, бь т'әви һьнәкед майин. ¹¹ Шандийава чава готьнәкә п'уч' хӧйа бу у бawәрийа хwә ван к'ӧлфәта нәанин. ¹² Ле Пәтрус р'абу бәрбь т'ьрбе бәзи, қуз бу ньһер'и, т'әне к'әфәне wi wьр бу у мәт'әлмайи чу, дьфькьри гәло чава бу.

Ль сәр Р'ийа Әmwасе

(Марқос 16:12-13)

¹³ We р'оже дӧ шагьрт дьчунә гӧндәки, кӧ жь Оршәлиме донздәһ километьри дур бу, наве wi Әmwас бу. ¹⁴ Wана бь һәвр'a бона һәр тыште қәwьми хәбәр дьдан. ¹⁵ У гава әwана нав һәвда хәбәр дьдан у дышешьрин, Иса хwәха жи незики ван бу, т'әви ван чу. ¹⁶ Ле ч'ә'вед ван гьрти бун, кӧ wi нас нәкьн. ¹⁷ Иса ванр'a гот: «Һун чьма ӧса м'әдәкьри нә у ве р'еда чь һәвр'a хәбәр дьдьн?» ¹⁸ Йәки жь ван, кӧ наве wi Клепас бу, ле вэгәр'анд у гот: «Әw чава жь Оршәлиме т'әне тә нәбьһистийә кӧ ван р'ожед пашьнда wьр чь қәwьмийә?» ¹⁹ Әwi жь ван пьрси у гот: «Чь буйә?» Wана ле вэгәр'анд готе: «Бона Исайе Ньсрәте, кӧ әw бь ә'мәл у хәбәред хwә ль бәр Хwәде у т'әмамия мьләт п'ехәмбәрәки зор бу ²⁰ у чава сәрәкед к'аһина у сәрверед мә нәмамия кӧштьна wi кьрьн, хач кьрьн. ²¹ Мә т'ьре әwe Исраеле аза кә, wәки дьн жи әва р'ожа сьсийа йә, кӧ әв тышт бунә. ²² Ле чәнд к'ӧлфәтед нав

мәда жи әм ә'щербмайи кьрын. Әwana сьбәһе зу чубунә сәр т'ьрбе ²³ у щьнйазе ви ль вьр нәдитьбун, вәгәр'ийан һатьн мәр'а готьн, кӧ: «Мә мьлийак'әт дитьн, мәр'а готьн, кӧ әw сах ә». ²⁴ У жь мә һьнәк жи чунә сәр т'ьрбе, чава кӧ ван к'ӧлфәта готьбу, ӧса бу, ле әw нәдитьн». ²⁵ һьнге әви ванр'а гот: «Һәй инсанед бе фькьр, һун чьқаси гьран бавәрийа хwә һ'әму готьнед п'ехәмбәра тиньн? ²⁶ Нә гәрәке Мәсиһ щәфа бьк'ьшанда у бьк'әта р'умәта хwә?» ²⁷ У ви дәстпекьр жь Муса у һ'әму п'ехәмбәра, чь кӧ ван к'ьтебада бона ви һьвисар бун, ванар'а шьровәкьрын.

²⁸ Гава незики ви гӧнде кӧ дьчуне бун, әви ӧса да к'ьфше, йанчийә әw дьчә щики дур. ²⁹ Ле wана зор ль ви кьр у гот: «Ишәв ль щәм мә бьминә, чьмки евар ә, р'о чуйә ава». У әw чу һьндӧр', кӧ ль щәм ван бьминә. ³⁰ Ле гава әw т'әви ван сәр сьфре р'уньшт, нан һьлда, шькьрийа хwә жь Хwәде ани, кәркьр да ван. ³¹ һьнге ч'әвед ван вәбун, әw нас кьрын у әw бәр ч'әве ван бәтавәбу. ³² Wана һәвр'а гот: «Ләма, гава әви р'еда мәр'а хәбәр дьда у һьвисар мәр'а шьровәдькьрын, агьр дьле мә дьк'әт». ³³ Әw we гаве р'абун вәгәр'ийанә Оршәлиме у һәр йанздәһ т'әви йед майин щьвийайи дитьн, ³⁴ готьн: «Р'асти Хӧдан сах буйә у Шьмһ'унва хӧйа буйә!» ³⁵ Паше ван һәр дӧйа гьли кьр, кӧ чава р'еда р'асти ви һатьн у чахе ви нан кәркьр, әw нас кьрын.

Иса хwә нишани шагьртед хwә дькә

(Мәтта 28:16-20; Марқос 16:14-18; Йуһ'әнна 20:19-23; К'аред Шандийа 1:6-8)

³⁶ Wана һе бона ве йәке хәбәр дьда, Иса нава wанда сәкьни у ванр'а гот: «Ә'дьялайи wәр'а». ³⁷ Әwana жь тьрса бьздийан у ван т'ьре хәйаләки^Ф дьбиньн. ³⁸ Ле әви

ванр'а гот: «һун чьма шашмайи манэ у дөдьли нэ? ³⁹ Ава ль дэст у п'ийед мьн бьньһер'ьн, кө эз хвэха мэ. У дәсте хвэ бьднэ мьн у бьбиньн, чьмки гошт у һэстуйед р'öh' т'өнэнэ, чава кө һун дьбиньн йед мьн һэнэ». ⁴⁰ Гава эв йэк гот, дэст у п'ийед хвэ нишани ван кьрн. ⁴¹ У һе жь шабуна бавэр нэдькьрн, һ'эйр-һ'өжмэк'ар мабун, эви ванр'а гот: «Qэт тыштэки хварьне ль щэм вэ һэйэ?» ⁴² Вана чити мә'сийе пьжанди да ви*. ⁴³ Эви һьлда ль бэр ч'э'ве ван хвар ⁴⁴ у ванар'а гот: «Эв бун эв готьнед кө гава эз т'эви вэ бум, мьн вэр'а дьготьн: Гэрэке һэр тыштед кө бона мьн Qануна Муса, һьвисаред п'ехэмбэра у Зэбурада^ф һьвисар бун бьһатана сери». ⁴⁵ һьнге ф'эме ван вэкьр, кө һьвисара ф'эм бькьн. ⁴⁶ У ванр'а гот: «Ава һьвисар э, кө Мэсиһ гэрэке щэфа бьк'ьшинэ у р'ожа сьсийа жь мьрьне р'абэ ⁴⁷ у жь Оршэлиме гьрти бь наве ви т'обэйи у бахшандьна гөна нав һ'эму мьлэтада вэ бе даннасинкьрьне. ⁴⁸ У һун ьн ш'э'дед ван һ'эму тышта. ⁴⁹ Ава эзе созе Баве хвэ вэр'а бьшиньм. Оршэлимеда бьминьн, һ'эта һун қэвате жь жор бьстиньн».

Жорһьлатьна Иса

(Марқос 16:19-20; К'аред Шандийа 1:9-11)

⁵⁰ У эв һ'эта Бэйтанийае бьрн, дәсте хвэ бьльнд кьр, дөа ван кьр. ⁵¹ У һе дөа дькьр, жь ван қэтийа, бэрбь э'змен һатэ һьлатьне. ⁵² Шагьрта жи сэре хвэ бэр ви дани, бь эшқ у ша вэгэр'ийанэ Оршэлиме. ⁵³ У һэр гав п'арьстгәһеда бун, пэсьне Хвэде дьдан.

* 24:42 Нав дәстньвисаред һьнэкада аһа йэ: «У мьрт'оха һьнгьв».